


**IOSEPHI MARIANI
PARTHENII E
SOCIETATE IESU
COMMENTARII ET
ELLOGIA**

Giuseppe Maria Mazzolari





1



IOSEPH

MARIANI PARTHENI

© DOLLEMAN 1851

COMMENTARI ET VARI BOLA



ROMAE

THOMAS DOLLEMAN 1851

MCCCLV



~~XV12 35~~

IOSEPHI
MARIANI PARTHENII

E SOCIETATE IESV

COMMENTARII ET ELLOGIA



ROMAE

TYPIS CIVILITATIS CATHOLICAE

1835

IOSEPHVS BOERO

E SOCIETATE IESV

LECTORI BENEVOLO



Iamdiu cogitabam latina quaedam clarissimorum virorum opuscula evulgare, ut praesertim studiosae iuventuti consulerem, quae in collegiorum nostrorum scholis ad bonas artes et ad christianam pietatem informatur : sed aliis atque aliis occupationibus iugiter distentus consilium meum exsequi ante non potui. Nuper vero cum me et amicorum sermo et doctorum hominum auctoritas ad hoc opus invitaret, feci non modo non invitus verum etiam lubens pro meo erga latinas litteras amore, ut huiusmodi opusculorum collectionem inchoarem, quae non mediocri, ut spero, emolumento esse poterit iis omnibus, qui politiorum litterarum studiis dant operam, quique latinam linguam nostra hac aetate pepe intermortuam excitandam atque in pristi-



nam dignitatem et elegantiam revocandam putant. Iacent profecto latinae litterae, ac prope despectui habentur: quanto autem cum studiorum detrimento, nemo non videt. Atqui huic tam gravi malo nullum opportunius ac praestantius remedium afferri potest, quam si proferantur in lucem et legenda adolescentibus tradantur eorum scripta, qui dicendi copia et elegantia cum soluta tum ligata oratione prae caeteris floruerunt, quique veterum probatissimorum auctorum gloriam et laudem communi existimatione consecuti sunt. Huiusmodi autem esse Horatium Tursellinum, Iosephum Marianum Parthenium, Iulium Caesarem Cordaram, Stephanum Antonium Morcellium, Raymundum Cunicium, aliosque similis notae viros, quorum opuscula vel primum vel iterum typis edenda constitui, facile quisque opinabitur, qui in re litteraria plane rudis non sit. Ita fiet ut adolescentes optima habeant prae manibus exemplaria, quae imitentur, et quibus ad latinam linguam impensius excolendam inflammentur. Quod si id assequi nequivero, illud saltem efficiam, ut mea hac qualicumque industria meoque labore ad idem opus urgendum studia excitem aliorum.

Iamvero placuit ordiri a Iosepho Mariano Parthenio nitidissimae latinitatis auctore, cuius latina scripta quae tribus voluminibus comprehensa in publicam hominum lucem utilitatemque iam prodierunt, et notissima sunt et in pretio habentur. Alia non pauca aequae perfecta et perpolita, morte interceptus reliquit, quae e

tenebris in quibus adhuc delitescunt eruenda esse duxi. Itaque primum hoc nostrae collectionis volumen in tres veluti partes erit distinctum; quarum prima continebit commentarios de vita et sancta conversatione septem venerabilium patrum e societate Iesu; altera elogium Ioannis Mariani fratris; tertia denique brevissima quaedam elogia illustrium e S. I. italorum, qui saeculo MDCC sanctitatis opinione floruerunt et decesserunt. Quod si haec ut spero probabuntur, opportuniori tempore evulgabo vel sex integros libros epistolarum, vel ex iis omnibus selectas et exceptas, quot ad iustam voluminis molem conficiendam satis esse possint. Haec habui de editione: nunc pauca de auctoris vita.


Iosephus Maria Mazzolarius, qui pro sua in Virginem Deiparam singulari pietate Iosephus Marianus Parthenius voluit appellari, natus est Pisauri V idus iulii an. MDCCXII, parentibus nobilitate et virtute clarissimis. Pueritiam summa morum innocentia domi transiit, Caeciliae Somentiae matris pientissimae, cuius postea vitam ipse conscripsit, exemplis et hortationibus incitatus. Vix septennis Cremonam, unde Mazzolariorum familia originem ducit, cum Ioanne Mariano fratre missus est, educandus sub optima Andreae patris viri probi ac sancti disciplina. Ea in urbe grammaticae primum, humanioribus deinde litteris, tum philosophiae in gymnasio societatis Iesu operam dedit. Emenso philosophiae curriculo, annos natus decem et octo Pisaurum remigravit, et in paterna domo paucos menses con-

sedet. Inde digressus ineundae societatis causa Romam venit, et IX kalend. februar. an. MDCCXXXIII voti compos factus, ad s. Andreae tyrocinium de more posuit; eoque absoluto, recolendis humanioribus litteris aliquot menses impendit, deinde informandis pietate ac bonis artibus adolescentibus praeceptor est destinatus. Munus hoc quinque extraxit annos: primum Florentiae annos duos grammaticam, deinde humanitatem, quam vocant, annum unum; tum Firmi in piceno rhetoricam, et Romae in collegio gregoriano iterum humanitatem annos duos docuit. Confectis theologiae studiis sacerdos est initiatus, et emissa stato tempore solemniquatuor votorum professione, transactisque omnibus pro recepta consuetudine, in collegio florentino rhetoricae tradendae praeficitur, quo in munere sex annos perstitit magno discipulorum emolumento, et summa eruditum hominum laude. Inde Romam evocatus anno MDCCCLI eandem docendi provinciam, eademque optimi praeceptoris fama et commendatione sustinuit ad annum MDCCCLXV, quo in p. Contucci demortui locum suffectus, praefecturam scholarum inferiorum pari animi alacritate regendam suscepit, in eaque perseveravit usque ad occasum societatis. Haec autem calamitas eius animum gravissime perculit; at Dei bonitate subnixus, adversa omnia incredibili patientia tulit. Digressus e collegio, neglectis potentiorum qui eum expetebant obmibus, usus est hospitio Clementis Orlandii architecti, viri mediocris fortunae, sed eximiae pietatis. Quam

vero vitae rationem ibi instituerit Parthenius, habemus ex eius epistola ad fratrem, cuius verba heic referam. « Vivō ego mihi, et vel domesticorum, ipsis non abnuentibus nec sequiorem in partem interpretantibus, consortium fugio et colloquia vito. Nemo me fere extra cubiculum videt, praeter mensae accubationem et communem in sacrarium congressum. Cubiculo meo clausus aut scribo, aut lego, aut dicto. Si accuratiorem vitae meae descriptionem nosse vis, haec est. Mane surgo, oro, sacrum facio; peracto sacro et gratis de more actis, cubiculum repeto, consueta me potione recreo; deinde vel ut dixi scribo, vel dicto, utraque usus lingua, sed multo libentius latina. Ante prandium breviores horae canonicae et nobis indicta conscientiae discussio. A prandio, si caeli tempestas patitur, domo ad sacras basilicas prodeō, secus domi me contineo. Nocturnas horas, quas prolixiores molestioresque experior, orando legendove, ut possum, extraho. Generatim atque universe eam mihi constitui legem, quae me intra instituti mei fines coerceat, nec eos facile transilire patiatur. » Haec ille. Vita functo Orlandio, Parthenius in aliud hospitium divertit, donec anno MDCCLXXXI, devexa iam aetate se recepit in domum professam, in qua non pauci e veteribus sodalibus habita a Pontifice facultate, communem vitae rationem interant. Paulo post hydropē tentari coepit, qui diu multumque serpens, tandem pectus obsedit, et hominem ad extrema deduxit. Quare divino refectus viatico et sacro oleo inun-

ctus, vir religiosissimus aeternae beatitatis portum quem unice concupierat spectans, placido exitu migravit e vita postridie id. septembris, anno reparatae salutis MDCCLXXXVI et aetatis suae LXXIV. Corpus in templo farnesiano tumulatum; cor autem, uti vivens mandaverat, in aedem B. Virginis Mariae, quam vocant de Mentorilla, in dioecesi tiburtina illatum est. Fuit vir graecis latinisque litteris excultus, praestans philosophus, poeta elegans, disertissimus orator. De eximiis eius virtutibus, de singulari pietate, qua in Deum ac Deiparam ferebatur, malo silere, quam pauca et per summa capita attingere. Non deerit fortasse suo tempore qui tanti viri memoriam copiosa narratione illustratam posteritati commendabit.

IOSEPHVS . MARIANVS . PARTHENIVS
SVA . OMNIA . VOLVMINA
TIBI . DEIPARA . VIRGO . MARIA
INSCRIBIT
QVIDQVID . RECTE . SCRIPTVM
DIVINAE . SAPIENTIAE . MATRI . TRIBVIT
QVIDQVID . MINVS . RECTE . ET . PERPERAM
SIBI VNI . ATQVE . IGNORANTIAE . SVAE . ATTRIBVIT



DE VITA
ET SANCTA CONVERSATIONE
SEPTEM VENERABILIVM PATRV
E SOCIETATE IESV

I.

P. PAVLVS SEGNERVS SENIOR

I. P. Paulus Segnerus cuius vitam paucis describere aggredior, merito inter eos recensendus est, qui alternam a societate condita saeculum doctrina et sanctitate illustrarunt. Nam et doctrina fuit tanta, ut summus theologus et disertissimus orator habitus fuerit; sanctitate vero adeo insigni, ut sociis tamquam perfectum virtutum omnium exemplar proponi ad imitandum possit.

II. Natus est Antii, quod oppidum est longe vetustissimum ad mare tyrrhenum, anno ab ortu Christi **MDCXXIV** die **XXI** martii. Parentes habuit et pietate et nobilitate praestantes, **Franciscum Segnerum** et **Victoriam Blancam**, quae viro suo decem et octo liberos peperit. Horum primus **Paulus**

dedit. In theologia audivit p. Sfortiam Pallavicinum, qui postea ob insignia in christianam rempublicam merita cardinalis est renunciatus. Et Sfortiae quidem apprime carus fuit, tum propter excellens ingenium, tum propter insignem probitatem. Medium, quod fuit aliquot annorum inter eas quas diximus facultates spatium, in tradendis humanioribus litteris occupavit. In his autem occupationibus, quae persaepe animum a divinis rebus avocare solent, nihilosecius perfectionis cursum quem ab ipso tyrocinio currere instituerat, urgere instituit. Nam tanta fuit morum innocentia, quanta vix dici potest. Exstat eius rei viri gravissimi testimonium, qui eo familiarissime usus est, nnaque fuit ab inito tyrocinio ad absolutum theologiae curriculum. Is affirmare non dubitavit, se in Paulo Segnero, ut in eius acta ac dicta omnia animum curiosius intendisset, se, inquam, nihil, quod notari iure posset, unquamprehendisse: multa vero in eodem esse se admiratum, quibus vehementer ad perfectionis studium incitaretur. Non est hoc loco praetermittendum, quod in eius nomen lussit p. Sfortia Pallavicinus, qui ex eius nomine ac cognomine, videlicet *Paulus Segnerus*, immutato litterarum ordine, hanc sententiam elicit: *Purus Angelus es*. Hoc ideo minime omitendum duxi, quia et ad declarandam singularem Segneri innocentiam, et summam Pallavicinii de eo opinionem non minimnm valet.

IV. Confectis igitur tanta innocentia studiis, decursisque cum laude eximiae ac singularis doctrinae graviorum disciplinarum spatiis, qua erat animi demissione a praesidibus petiit, ut eius opera in infima grammatica tradenda adhiberetur. Satisfactum demissae petitioni a Superioribus fuit, docuitque grammaticam Pistorii Etruriae urbe, quam in ur-

bem et maiorem sacramentorum frequentiam invenil, et alia multa pietatis opera instituit quae adhuc vigent. Sed ad maiora vocatus a Deo, hoc ipso tempore conciones illas suas longe celeberrimas et eloquentissimas elucubrare aggressus, tantum contentioni hoc in opere adhibuit, ut ex assiduo humorum a cerebro defluxu gravissimum surditatis incommodum contraxerit; quod quidem adeo moderate tulit, ut hoc potissimum nomine Deo gratias egerit, illud Davidis usurpans *Psal. 37 Sagittae tuae infixae sunt mihi; confirmasti super me manum tuam*: Deumque praeterea obsecravit, ut quas semel auribus suis infixerat, ne toto vitae suae tempore sagittas inde divelleret. Perductis ad exitum concionibus, statim eas in celebrioribus Italiae urbibus habere ad populum coepit eo successu, qui expectandus erat ab homine et sanctissimo et eloquentissimo. Quamquam multo maiorem ex sacris missionibus, in quibus fere totam contrivit aetatem, fructum cepit, quam ex concionibus quae quadragesimalibus tantum feriis haberi solent. Sacrae igitur missiones campus illi extiterunt longe patentissimus atque uberrimus, in quo et dilatavit spatia caritatis, et immensos animarum manipulos collegit.

V. Perusii cum esset, eaque in urbe conciones diebus festis haberet, nactus id temporis quod ei feriae autumnales a concionandi munere vacuum fecerunt, in exercitia spiritualia secessit, seque totum sacris commentationibus dedit. In his tanta rerum divinarum luce perfusus est, quanta nunquam antea. Omnia terrena illi vilesce, ad caelestia tantum anhelare, animarum Christo lucrandarum studio mirum in modum incendi atque ad divinam amorem voce quodammodo e caelo emissa invitari. In commentanda aeternitate adeo terrore concussus fuit, ut plures noctes duxerit insomnes. Itaque

ab illo secessu alius plane homo prodiit. Quae sibi curae ad spiritualem animi sui profectum magis esse debere intellere-
rat, ea in scripto retulit, poenitentiam videlicet, orationis et
paupertatis studium, discussionem conscientiae, ab humano
commercio, quantum quidem instituti nostri ratio patitur,
fugam: quae omnia uno comprehensa vocabulo, et grandiori-
bus litteris exarato sibi ob oculos constituit ad eum finem, ut
nunquam memoria exciderent et quotidie proposita haberet.
Vocabulum porro erat; *prope*: quae vero hoc vocabulo in-
dicabantur, ut iam commemoravimus, erant, poenitentia, re-
cessus, quem itali dicimus *ritiramento*, oratio, paupertas,
examen. Itaque divini amoris ardore, et invandarum anima-
rum desiderio inflammatus, totum se sacris missionibus de-
dere, et reliquum vitae suae tempus in opere omnium divi-
nissimo, ut a magno Dionysio appellatur, decrevit impendere.

VI. Exposito Superioribus consilio, quos uti divinae vo-
luntatis interpretes in re tanti momenti consulendos censuit,
factaque ab ipsis potestate, tanquam missus a Deo apostoli-
cum munus alacriter suscepit, in eoque ab anno 1665 ad an-
num 1692 constantissime perseveravit. Consortem apostolici
muneris nactus est p. Ioannem Petrum Pinamontium, virum
sanctissimum eundemque doctissimum. Tale ac tantum vi-
rorum par similitudo studiorum, imo potius Deus ipse con-
iunxit, qui *misit illos binos* in plurimas civitates atque pro-
vincias, ac prope in Italiam universam. Ambo sanctitate sin-
gulari eximiaque doctrina, ambo divino amore succensi, ani-
marumque cupiditate flagrant, ambo denique ad apostolicum
munus nati factique. Laborem suscepti ministerii ita partiti
sunt inter se, ut Pinamontius qui mira quadam elocutionis
facilitate et suavitate praestabat, populum in iis quae ad re-

rum credendarum summam moresque corrigendos atque ad divinae legis normam conformandos pertinent, erudiret; Segnerus vero, utpote qui et firmioribus lateribus, et in dicendo vehemens et acer erat, conciones haberet.

VII. Divisis hoc pacto muneribus, ubi ad eum locum qui tanquam sacrae missionis sedes ac statio constitutus erat venissent, coacto in laxiore aede aut foro populo, p. Paulus Segnerus fere ab illis Apostoli verbis 2 Corinth. V concionem suam exordiebatur: *Pro Christo legatione fungimur, tanquam Deo exhortante per nos: obsecramus pro Christo, reconciliamini Deo.* Multa deinde subtexebat quae auditores ad poenitentiam excitarent. Concionum argumenta fere ex turpitudine peccati, ex divino odio in malos ac nefarios homines, ex sempiternis inferorum poenis, quae mortem peccatorum pessimam consequuntur aliisque huiusmodi gravioribus christianae religionis dogmatis sumebantur, quo vehementius concuterentur auditorum animi et acrius ad poenitentiam excitarentur; quanquam et de divino in homines amore ac praesertim misericordia, qua ad poenitentiam Deus allicit peccatores, nunquam non sermonem habere consueverat: quod argumentum miro quodam artificio, et cum ingenti animorum motu tractabat. Quod reliquum erat temporis, in audiendis confessionibus impendebatur; publice quidem a p. Pinamontio, privatim vero atque in cubiculo a p. Segnero, propter aurium, quod supra indicavimus, incommodum. Vix aliquot horae in reficiendis somno ciboque viribus dabantur.

Neque vero voce tantum auditores ad poenitentiam Segnerus excitabat, sed ubi in dicendo maxime incaluerat et praesertim in perorationibus, nudatis repente humeris, atrociter adeo sibi terga ferreo flagello cruentabat, ut non tantum

copiosum sanguinem exprimeret, sed frustula carnis inde divelleret. Quo spectaculo commotus populus lacrimas tenere non poterat, et vocem intensius contendens divinam clementiam inclamabat. Hoc eo pertinebat, ut si qui obstinatores durioresque in concione essent, eorum animi mollirentur atque ad poenitentiam flecterentur.

VIII. In his sacris exercitationibus octo vel decem dies, prout cuiusque vel oppidi vel pagi necessitas postulabat, insumebantur. Ubi extremus missionis dies advenerat publica supplicatio habebatur, quae plurimum valebat non minus ad placandum Deum, quam ad omnium animos in sancto suscipiendae melioris vitae proposito confirmandos. Procebant igitur agmine perpetuo pueri, puellae, viri, mulieres, oppidani denique omnes in suas quique classes, habita sexus et aetatis ratione, distributi. Nemo erat in tanta multitudine, qui non aliquem poenitentiae habitum prae se ferret. Puellae ac mulieres spineas coronas gerebant in capite; ex viris partim se flagellis ad cruorem usque caedebant, partim humeris immanes truncos in crucis formam compactos sustinebant, alii catenis, alii funibus e collo suspensis, et supra pectus decussatis nudisque pedibus incedebant. Reperti interdum pueri, qui se immiscere viris et in tenera corpuscula flagris saevire non dubitarunt. Interea lugubri voce et flebiliter inflexa psalmus *Miserere*, aliaque id genus carmina, quibus iterum ad poenitentiam animi permoverentur, decantabantur. Quo processerant ordine in aedem sacram, sive in forum (neque enim sacrae aedes, ut ut laxae admodum, tantam multitudinem fere capiebant) totum agmen congregabatur. Hoc coacto, novissimam concionem habebat p. Segnerus, cuius summa eo spectabat, ut quam divini numinis iustitiam tot tantisque animi

vere poenitentis significationibus placassent, ne iterum novis perpetrandis flagitiis irritare in se vellent, et quo certius et efficacius a novis sceleribus populum deterreret, multa de laesa misericordia quae saepe fit furor, de divinis animadversionibus, praesertim in eos qui per summam improbitatem Dei ipsius bonitate et clementia ad licentius effraenatusque peccandum abutuntur, graviter vehementerque dicebat. Haec inter novi rursus gemitus, lacrimae, suspiria, eiulatus instaurabantur. Absoluta concione, monitus quosdam maxime salutare, veluti in pignus sui erga populum amoris relinquebat, quibus vitam sancte ac pie traducerent. Ad extremum in medio foro excitato repente rogo, aleae, lusoriae tesserae aliaeque huiusmodi nequitiae instrumenta incendebantur. Haec fere erat methodus, quam in sacris missionibus tenuit p. Paulus Segnerus, quamque nos paullo accuratius exposuimus, ne omnino nostrae societatis hominibus extra Italiam degentibus ignota esset, ut siqui his vestigiis, a quibus temere discedendum non putamus insistere voluerint, eam hic a nobis si non expressam, saltem adumbratam inveniant. Haec enim methodus praeterquamquod sanctissimum ac doctissimum virum auctorem habet, usu probata ad Dei gloriam animarumque salutem longe fructuosissima reperta est.

IX. Sed ut eo revertar, unde digressus sum, tanta erat hic vir eloquentia, quanta vix dici aut credi potest. Pendebant auditores ab ore loquentis, nec facile divino eloquio quod tamquam ros fluebat de labiis eius, satiari poterant. Qui oratoris tenebat artem, omnium animos flectebat ad arbitrium. Itaque eius eloquentia mirum in modum cum in extirpandis vitiis omnibus, tum tollendis praesertim odiis ac dissidiis valuit. Ad huius rei confirmationem pauca quaedam o

multis exempla subiiciam. Summum exortum erat dissidium in vico quodam ligusticae ditionis. Accolae omnes in duas factiones divisi se mutuis caedibus conficiebant, et brevi tempore ad XL necatis, multo pluribus idem exitus atque infortunium parabatur. Illo venit opportuno tempore Deo sic disponente p. Segnerus: venit, concionem habuit, dissidia sustulit: atque in tam subitae atque admirandae conciliationis monumentum de communi oppidanorum sententia erecta crux. Matronae nobili interfecto per summam iniuriam magnae spei atque egregiae indolis filio ab eaque unice dilecto, tanta repente inter interfecti et interfectoris familias exarsit discordia, ut omnes magnum hinc excitatum iri incendium quo plures ex utraque parte absumerentur, pertimescerent. Huc quoque peropportuno p. Segnerus se contulit. Vix femina nobilis cuius dolor reliquos ad odium vindictamque incendebat, p. Segnerum concionantem audivit, repente mutata pacem interfectori offerre non dubitavit. Hoc omnibus prodigio simile visum est; erat enim furilis adeo agitata, ut de ea placanda desperaretur. Oblata pace, eam statim interfector ipse domi convenit, se ad eius pedes fune collo suspenso abiicit, multis lacrimis admissi facinoris veniam implorat; quem pia matrona humanissime exceptum et amantissime amplexatum, se illum in posterum filii loco habituram dixit. Quo facto commota civitas universa, Deo publice gratias egit. In oppido quodam Ducis mutinensis odia rixaeque adeo inter oppidanos gliscebant, ut vulgo caedes fierent hominesque necarentur. Tantum malum atque adeo animis corporibusque exitiale, adventus p. Segneri sustulit, et ita, ut firmata inter dissidentes sincera stabilique concordia, ii qui sibi ex alienis calamitatibus honesto utique compendio lucrum ac victum quaerunt,

apud Ducem expostularint, se eo in oppido vitam amplius sustentare non posse, quod restinctis odiis omnibus compositisque dissensionibus nullae fierent de vi ac caede quaestiones.

X. Neque vero dissidia solum, sed cuiusque generis scandala sublata sunt. Quocumque cum socio veniebat p. Segnerus, vitia loco cedere cogebantur. Hoc adeo vulgo cognitum erat et exploratum, ut ii qui obstinatius in suscepta inquinatissimae vitae ratione perstare vellent, ii inquam, adventante p. Segnero, statim relicto oppido in aliud longe remotius concederent, ibique tandiu donec sacrae missiones absolverentur, latitarent. Non enim dubitabant, quin si p. Segneri concionibus interfuissent, aut male parva restituere, aut in gratiam cum inimicis redire, aut si quas habebant concubinas, eas dimittere cogerentur. Hac igitur quam exposni ratione, tantoque cum divinae gloriae incremento et animarum salute, una cum socio totam prope Italiam peragravit spatio annorum sex et viginti, quos in apostolico munere consumpsit. Loca singula quae adivit enumerare non possum: dioeceses tantum commemorabo, quas totas excoluit sudoribusque irrigavit suis. Atque haec quidem sunt: lucensis, placentina, faventina, tarentina, mutinensis, parmensis, mantnana, nonantulana, regiensis, carpensis, aretina, bononiensis, ianuensis, anconitana, sarzanensis, albengana. Ex his nonnullas semel atque iterum peragravit; multo plures, sin minus totas, magna tamen ex parte obivit. Fere in vicis et castellis operam locavit suam, quod uberius inde fructus percipi solet. Urbium celebritatem defugit, quod maiori labore minori compendio, ibi operam impendi existimabat.

XI. Quanquam interdum repugnare non potnit, quin summorum Episcoporum efflagitatu se ad urbes conferret.

Itaque in nobilissimis frequentissimisque Italiae urbibus sacras missiones quandoque habuit. Inter ceteras Bononia fuit, quam adeo concussit, ut grandiores natu maiores in ea civitate motus numquam excitatos fuisse meminerint: qui vero annales legerant, Segneri accessus ad eam urbem cum s. Bernardini senensis ad eandem adventu conferre non dubitarint. Neque hoc incredibile videri debet, propterea quia summa de hoc viro tota Italia percubuerat existimatio quae fiebat ut miri ad eum audiendum concursus fierent. Saepe templa quantumvis laxa ingentem populi ex remotioribus pagis certatim confluentis multitudinem capere minime poterant. Ipsa fora interdum angusta erant; itaque exire oppido, et in apertum locum herbosamque se conferre planitiem cogebatur. Ut minimum tria, vel quatuor hominum millia censebantur; quandoque ad viginti, et interdum etiam ad triginta capitum millia auditorum multitudo excrevit; tanta frequentia ac celebritate, quantam de paucis vel sanctissimis et apostolicis viris legimus.

XII. Tantam porro frequentiam non solum perspecta viri sanctitas, sed etiam prodigia quibus Deus sanctitatem hanc ipsam adstruere voluit, conciliarunt. Prorsus mira de Segnero narrantur, atque haec quidem ab idoneis auctoribus iureiurando confirmata. Nos praecipua seligemus. Carpi cum esset, et ad confertissimam populi multitudinem aperto ac patienti loco concionaretur, repente ingens procella ac tempestas coorta est. Imminentis pluviae timor concionem dissipasset, nisi a p. Segnero stare iussa constitisset. Summus itaque descendit imber, sed totus extra concionis ambitum effusus est. Mensis erat augustus, aestus summus saeviente canicula, et ferventissimi solis radiis exposita multitudo. Incubata a P.



in aere ad palmos a terra circiter quatuor adspexit; et quo testatius miraculum esset parochum accersivit, eumque tanti prodigii spectatorem esse voluit et testem.

XIV. Constat etiam prophetiae spiritu afflatum multa praedixisse, animique secreta penetrasse. Vita functo Innocentio XI cum haberentur comitia, a Cardinalibus demortuo Pontifici suffectum iri Ottobonum diserte Fadulpho asculanorum antistiti pronuntiavit; Ottobono autem consequentibus comitiis, Pignatellum successurum sine ulla haesitatione praedixit. Utramque praedictionem eventus confirmavit. Mulierem quamdam apud se peccata confitentem sua, cum iterum et saepius interrogasset, num aliud memoriae occurreret quod enunciari oporteret, negassetque illa: infelix, ede, inquit, quod in sterquilinio occuluisti. Improvisa denunciatione perculsa mulier et ingenti rubore suffusa, se eo in loco filii cadaver, quod scelere suscepisset, occultasse confessa est; eandem vero multis lacrimis veniam perpetrati facinoris implorantem, rite confessam absolutamque dimisit.

XV. Nunc ut eius virtutes perstringamus, praeter ardentissimam in Deum proximosque caritatem, quorum causa tot labores in sacris suis peregrinationibus suscepit ac pertulit, singulari fuit humilitate; quae tanto admirabilius in eo exstitit, quanto maioribus ingenii ac doctrinae ornamentis abundavit. Itaque insigniora munera quae ei delata sunt, constanter recusavit, et sola obedientia coactus suscepit. Orationis studio maxime deditus, quod a reliquis occupationibus superabat otii, totum orando extrahebat. Erga sanctissimum Eucharistiae sacramentum devotionis sensu mire afficiebatur; lacrimas cum rem divinam faceret tenere non poterat. Beatissimam Virginem parentis loco habuit, de eaque egregium scripsit

volumen, in quo ea omnia complexus est quae ad divinae Matris cultum augendum prope dici aut excogitari possunt, ut mirum sit tot ac tanta in angustum volumen cogi potuisse. Laboris amantissimus nunquam otia batur. Redux a suis expeditionibus et labore confectus, se in collegium florentinum tamquam ad hiberna recipiebat, ibique in scribendis praeclaris illis suis operibus occupabatur, quae ei tantam existimationem pepererunt. Quanquam in iis scribendis non suam, sed Dei unice gloriam spectavit, cui se totum iam inde ab ingressu societatis consecravit.

XVI. Sed quoniam de operibus a p. Paulo Segnero conscriptis sermo incidit, non est omittendum praeclarum opus ac saluberrimum, quod ab eo inscriptum fuit: *Concordia inter laborem et quietem*; et res tota, quae multum valet ad declarandum eius zelum pro catholicae fidei integritate, paulo fusius exponenda est atque altius repetenda. Vivebat Romae Michael de Molinos ex eorum genere, de quibus Christus in evangelio, *veniunt ad vos in vestimentis ovium, intrinsecus autem sunt lupi rapaces*. Ore ad pietatem composito, summam apud omnes existimationem sibi collegerat, ut vulgo sanctus et haberetur et appellaretur. Nemo de fraude in tanta simulatione virtutis suspicabatur. Interim pessimus homo non cessabat pravos errores disseminare, et nescio quas de contemplatione Quietis, unde haeresi Quietismi nomen adhaesit, pestiferas opiniones. Qua erat his in rebus sagacitate p. Segnerus odoratus est praedam, lupumque sub ovis pelle latitantem detexit. Libellum conscripsit, quo Molinos errores egregie confutabantur. Sed bona hominis existimatio adeo romanorum animos pervaserat, ut omnium odio in libri auctorem converso, Segnerus tota urbe passim male audiret,

perinde quasi sanctissimum atque innocentissimum virum haeresis insimulare per summum scelus atque impudentiam ausus esset: liber vero a Segnero editus inter proscriptos auctoritate publica relatus est. Factum modestissime tulit p. Segnerus, remque omnem Deo commisit, qui tandem callidi veteratoris patefecit insidias. Igitur deprehensa fraude, damnatus Molinos, absolutus p. Segnerus; eiusque liber de proscriptorum numero sublatus. Itaque singulari Dei providentia effectum est, ut qui privatorum bono excolendis tot dioecesium laboraverat, communi etiam totius ecclesiae utilitati extirpandis haeresibus inserviret.

XVII. Verum inter ceteras virtutes singularis in p. Segnero extitit poenitentia. Hirsuto cilicio, ex setis verius quam ex hispidis pilis contexto induebatur. Catenulas ferreas acutissimis exstantibus acuminibus ad nudam carnem adhibebat. Se catenis ferreis ad lauienam usque cruentabat. His non contentus novum tormenti genus excogitavit. Acus plusquam tercentas confixit in subere, quo sibi fodicare pectus horrendum plane in modum solebat, eodemque etiam in missionibus utebatur, maxime cum alicuius obstinatoris expugnanda esset pertinacia. Cum paene vires tractandis flagellis deficerent, vicariam sacerdotis cuiusdam adhibebat operam, qui triste ministerium minime refugiens eum dirissime caedebat. Hunc sacerdotem totos duodecim annos ad nutum habuit, a quo fere quotidie ad horae dimidium et eo amplius caedebatur: quo facto se ad eius pedes abiiciebat, et quam maximas poterat agebat gratias. Interdum nudato corpore ad columnam alligari ab eodem voluit, atque hoc habitu ad sanguinem usque verberari, quo Christi patientis imaginem expressius repraesentaret. Saepissime etiam detractis vesti-

bus accensaque face, defluentes inde flagrantæ cærae guttae excipiebat intrepidus. Cum iam senuisset, nec sacerdotem hunc, de quo diximus, praesto haberet, idem sibi officium a domestico fratre praestari cœlius postulavit, sed impetrare non potuit. Adhuc in tyrocinio s. Andreae instrumenta, quibus ad sui corporis afflictationem utebatur, in arcula asservantur, et horrendam intuentibus speciem exhibent.

XVIII. His aliisque virtutibus, quas brevitatis causa omittimus, iam ad provectam pervenerat ætatem nihil magis exoptans, quam in suscepto sacrarum missionum ministerio vitae suae cursum conficere. Verum defuncto Romae p. Nicolao Maria Pallavicino, qui et theologi sacrae Poenitentiariae, et episcoporum examinitoris muneribus fungebatur, utrumque munus Innocentius XII p. Segnero detulit. Oblatum honorem quantum potuit a se deprecari conatus est vir humillimus, sed frustra. Itaque relicta Florentia, ubi tum diversabatur, Romam venit. Additum et tertium munus, habendi nempe conciones ad sacrum cardinalium collegium, quibus muneribus egregie pro sua singulari doctrina cumulateque satisfecit.

XIX. Sed iam homini tot laboribus perfuncto, ac paene confecto aeterna requies debebatur. Et sane gravi incommodo tentari coepit, quo admonitus mortem sibi in foribus adesse cognovit. De medicorum sententia Tibur se contulit, sed nullum ex acris mutatione levamen capiens Romam reversus, die VII decembris decubuit, statimque tanta morbi vis erupit, ut de eius vita omnino desperatum sit. Instantem mortem timide, uti fit, denuntianti intrepide respondit: *Calicem quem dedit mihi Pater: non vis ut bibam illum?* Sequenti die Beatissimæ Virginis sine labe conceptæ sacro, ingrave-

scente morbo, se totum Deo obtulit illa usurpans *Benedicam Dominum in omni tempore*, et illa *Abyssus abyssum* invocat. Abyssus, inquam, ut s. Bernardus interpretatur, miseriae abyssum invocat misericordiae; tum rite confessus, sacrosanctum Christi Domini corpus summa devotione sumpsit, quo suscepto, sacroque non ita multo post oleo inunctus, inter consuetas ecclesiae atque adstantium preces, placidissime decessit IX decembris anu. MDCLXXXIV annos natus LXX, quorum quatuor et decem extra societatem innocentissime vixit, sex vero et quinquaginta in societate sanctissime transegit. Elatus est summo hominum concursu; eius funus plurimis principibus viris honestatibus. Innocentius XII, qui enim Romam evocarat, aegre admodum eius mortem tulit, et virum sanctum atque angelum semel, iterum, tertio decessisse pronuntiavit.

XX. Et sane vir fuit aequae sanctus ac doctus. Et sanctitatem quidem haec ipsa, quae de eius moribus ac vita perstrinximus, satis ostendunt. Doctrinam vero, eius opera omnium manibus contrita et paene in omnes Europae linguas conversa, declarant. Multa scripsit quae tribus ingentibus comprehenduntur voluminibus, ut mirum sit, hominem tot tantisque pro salute animarum distractum occupationibus, tam multa tamque accurate et eleganter scribere potuisse. Eius operum stilus maxime probatur a doctis, et facile propter insignem quamdam perspicuitatem et numerum dignoscitur: quem quidem minime negligendum duxit, cum diceret, gladium non minus acie ferire, quam fulgore suo hostium oculos perstringere. Sed non de stilo tantum, sed etiam et multo magis de rebus laboravit, quod eius opera pervolutantibus apparet. Eteum et in ss. Patrum lectione egregie versatus fuit, et theologorum non solum placita omnia sententiasque

cognovit, sed de iisdem subtilissime indicavit. Quod autem ad eloquentiam attinet, prorsus exstitit singularis, et iure ac merito habitus est eloquentissimus unus et disertissimus ita-
 lorum. A Cicerone multa mutuatus in rem suam transtulit; eiusdem acerrimam in dicendo vim, ac maiestatem mirabili-
 ter expressit; unde illi Ciceronis italici cognomen adhaesit. At-
 que hoc non ei vitio dandum, sed potius laudi, quod homi-
 nem ethnicam christianae religioni, ac Christo ipsi servire
 coegerit.

XXI. Floruit summorum principum amicitiiis, ex quibus nihil unquam in privatum suum commodum derivavit, sed eas contulit aut ad levandam tenuiorem inopiam, aut ad tol-
 lenda scandala, aut ad alia eiusmodi constituenda, quae ce-
 derent in Dei gloriam, ac salutem animarum. Inter hos prae-
 cipue numerantur Duces parmensis et mtinensis et Inno-
 centius XII de quo supra mentionem fecimus. Tenuit quoque
 summum gratiae locum apud Cosmum III magnum Etru-
 riae Ducem, qui plurimum spectatae hominum sanctitati,
 doctrinae ac prudentiae detulit. Eo suasore multa constituit,
 quae et Etruriae toti et maxime christianae religioni valde
 salutaria extiterunt. Eius in iis, quae ad animi sui spiritua-
 lem profectum pertinebant, consiliis potissimum usus est.
 Praesentem tanquam divinae interpretem voluntatis audie-
 bat, absentem litteris consulebat. Extant adhuc litterae nltro
 citroque missae, quae et eximiam illius principis pietatem, et
 singularem p. Segneri doctrinam, prudentiamque declarant.

XXII. Fuit aspectu ad gravitatem, maiestatemque com-
 posito, colore albo, optima corporis habitudine, ingenio acer-
 rimo, eloquentia singulari. Quae tot ac tanta bona a Deo lar-
 gitore illi impertita Dei, ipsius obsequiis et animarum saluti
 prorsus impendit.

II.

P. PAVLVS SEGNERVS IVNIOR

I. P. Paulus Segnerus innior appellatus patris Pauli Segneri senioris fratris filius fuit. Proposita clarissimi patris exempla tanto studio ac diligenti imitatione persecutus est, ut ea non tam imitari quam aemulari visus fuerit. Natus est Romae nobili genere, anno ab ortu Christi MDCLXXIII die XVIII octobris. Patrem habuit Ioannem Segnerum et Matrem Magdalenam Inghiramiam, Ioannis Inghiramii filiam, qui dignitatem senatoriam Romae obtinuit quae quidem dignitas, propterea quia nni tantum mandatur, Romae longe amplissima habetur. Quanquam spectata nobilitas multo reliquis animi et virtutis ornamentis inferior fuit. Nam sanctissime vixit, ab obitu praesertim viri et filii ingressu in Societatem, ac singulari probitatis opinione decessit. Eius virtutes collegit diligenter ac mandavit litteris Cherubinus Cavalinus Abbas ex olivetana familia, quem ipsa sibi conscie tunc suae moderatorem delegerat.

II. His ortus parentibus Segnerus non minus liberaliter quam pie educatus est. Quae sanctitatis et apostolici zeli indicia perspecta diximus in patruo, eadem in fratris filio observata. Saepe enim ad aequalium coetus de eminentiore aliquo loco verba faciebat, et quidem ita pro aetate eloquenter, ut omnes ardorem animi ac facundiam admirarentur. Adolescens gymnasium collegii romani celebravit in eaque frequentia singulari pietatis et ingenii laude floruit. Interim ei moritur pater alienissimo familiae tempore. Mater ne quam de filio expectationem conceperat eventus falleret, Viterbium mittendum censuit, ut esset apud avunculum Bernardinum Inghiranium qui illi urbi totique Provinciae cum potestate nomine Pontificis praeerat. Hic cum litteris in vostro collegio operam daret, et nihil minus quam de ineunda societate sed potius de constituenda propaganda familia cogitaret, mutato repente animo cognitaque rerum vanitate, valedicere statuit rebus humanis seque Deo in societate Iesu consecrare.

III. Verum ut eius consilium innotuit, dici non potest quantum inde avunculus aegritudinis ceperit. Nec minor matris dolor fuit, quae filii consilium a iuvenili levitate profectum existimans, non illud quidem omnino improbare ausa est, sed carissimum a se filium divelli in quo familiae spes nitebatur, ferre non poterat. Itaque ad eum epistolam scripsit, qua nescio an fortior machina ad concutiendam filii constantiam a quoquam potuerit admoveri. Epistola erat plena luctus, plena moeroris et lacrimarum. Sed maternam caritatem vicit Dei caritas. Intrepidus iuvenis restitit carni et sanguini, maluitque vocem Dei se ad perfectionis vitae genus vocantis audire, quam reclamantis naturae a sanctoque proposito revocantis. Multo iniquiorem hoc in negotio avunculum

expertus est, qui praeterquamquod ei omne commercium cum nostris hominibus interdixerat, ne verbum quidem hac super re audire patiebatur. Sed eius tandem animum, et constantiam iuvenis, et patris Pauli Segneri auctoritas expugnarunt. Itaque tum ab avunculo tum a matre, exorata societatem ingrediendi facultate, disruptisque feliciter laqueis omnibus quibus detinebatur, nobilis adolescens ad romanum tyrocinium convolvavit anno MDCLXXXIX die XXV iunii.

IV. Vix societatem ingressus totum se studio perfectionis dedit, tantumque in ea palaestra profecit, quantum eius postea sanctitas declaravit. Multa ad eius spiritnalem profectum patruī cohortationes ac praecipue exempla contulerunt quae ob oculos quotidie proposita habebat: eadem enim in domo diversabantur.

V. Absoluto tyrocinio animum ad ea studia adiecit in quibus exerceri nostra iuventus solet. Inter haec e vivis eripitur p. Paulus Segnerus ea sanctitatis opinione quam illi et suae virtutes et singularia in omne hominum genus merita conciliaverant. Mors tanti viri tum omnibus tum praesertim ipsi multo acerbissima accidit, qui in clarissimo sibi patruo, et hortatore virtutis et religiosae perfectionis magistrum amisit. Non parum tamen ex eius obitu emolumenti percepit. Nam observatum est ad defuncti patris feretrum multas horas orando immotum perstitisse, quo tempore nonnulli nec temere coniectarunt illud potissimum a Deo flagitasse ut *patruī spiritus fieret in se duplex*, idque interpositis venerabilis viri precibus impetrasse eventus docuit.

VI. Et sane ab eius obitu ardentissimo coepit apostolicae vitae desiderio flagrare, incensusque est mirum in modum zelo animarum. Patruī mortem matris obitus excepit, cuius

acerbitatem singulari moderatione tulit, utpote qui illam eximia pietate complectebatur. Cuius quidem moderationis singulare edidit documentum. Nam eodem tempore quo -matri iusta persolvebantur in templo s. Mariae Novae fiebatque concursus populi ad spectandum eius cadaver ob insignem et notam feminae probitatem, eodem, inquam, tempore in adiacenti foro ac paene in ipso defunctae matris conspectu ad affusam multitudinem concionari non dubitavit, omnibus qui eum noverant, tantam tamque inusitatam animi constantiam demirantibus.

VII. Absoluto philosophiae curriculo senensi collegio destinatus, ea in urbe grammaticam et humaniores litteras docuit. Ob ingentes labores, qui necessario in docendi munere subeundi sunt illosque multo maiores quos ipse sponte sua suscipiebat, tentari eius valetudo coepit. Nihil tamen ad moderatores ea de re perscripsit illud usurpans: *esto ibi usque dum dicam tibi*. Consumptis aliquot annis in puerorum institutione et regressus Romam theologiae operam dedit.

VIII. Concussa sub haec tempora terrae motu Roma, sacrae missiones ad placandam divinam indignationem a Pontifice indictae sunt. Delecti concionatores, sua quibusque attributa templa in quibus ad populum verba facerent. Templum s. Angeli in foro piscario Segnero obtigit, et tum quidem primum patuit quantis a Deo praesidiis ad apostolicum munus comparatus esset. Ingens concursus, summa animorum commotio, fructus commotioni respondens, singularem concionatori apud omne hominum genus existimationem conciliarunt. Creber denique atque adeo honorificus de eo illis diebus tota urbe sermo fuit, ut fama usque ad aurem Pontificis Maximi pervenerit. Verum cum novis terrae motibus urba

succuteretur, Segnerus iterum in concionem prodivit. Electus celebrior urbis locus est ad ripam tiberis gernalis ac navicularis frequentissimus, quos in proximo valetudinario s. Rochi, quod tum forte vacuum erat, spiritualibus s. Ignatii exercitationibus excolendos suscepit. Fructus prope culturam superavit. Nemo exstitit ex tanta multitudine, qui conscientiam non expiaverit suam, atque ad sacram synaxim summa cum devotione non accesserit. Indicta a Patre ad basilicam s. Petri supplicatione, processerant omnes tanta oris compositione, ut effusa ad hoc spectaculum civitas externum procedentium habitum vebementer admirata fuerit.

IX. In hunc modum prolusit p. Segnerus apostolico muneri, cui iam communibus omnium votis destinabatur. Nemo dubitabat, quin absoluto theologiae curriculo prodeundi in sacras missiones ei a moderatoribus potestas fieret. Verum secus evenit. Nam seminario romano addictus est, et regendis adolescentibus nobilissimi illius convictus rectori adiutor ac minister datus. Oblatum munus, etsi ab eo quammaxime abhorreret, ex obedientia suscepit, nec eorum sequutus est consilium qui suadebant, ut odiosam provinciam a se deprecaretur. Verum Deus tantam virtutem intra unius domus angustias circumscribi non est passus, et qui ad eius obedientiae periculum faciendum illam destinationem ordinarat, brevi ad sacras missiones ei aditum patefecit.

X. Cosmus eius nominis III magnus Etruriae Dux, qui singulari benevolentia patruum complexus fuerat, multaque de fratris filio praedicari audierat, societatis moderatoribus ad excolendos ditionis suae populos Segnerum nominatim petivit. Tauti principis et benemerentissimi de societate, societatis moderatores voluntati statim obsequuti sunt. Itaque mis-

sus Florentiam, omnibusque benevolentiae significationibus a Cosmo exceptus, quo paratior ad sacrum munus esset, tertium probationis annum confecit. Illic si unquam alias, in id totus incubuit, ut virtutes apostolico viro maxime necessarias sibi compararet, humilitatem, patientiam, mansuetudinem. Paupertatis studio reculas quas habebat abiecit omnes, nihilque retinuit praeter imaginem Christi crucifixi et sacram horarum codicem: libellum quoque in quo recitandae psalmodiae ratio diurna perscribitur ad superiorem detulit, eo contentus qui publico usui in aula prostabat. Hoc modo quo rebus omnibus spoliatur, eo instructor ad apostolicum munus accessit.

XI. Atque in primis eandem omnino tenuit methodum quam p. Segnerus eius patruus reliquerat, ac prope consecrarat. Prodibat singulis diebus in locum concioni destinatum, concionabatur ad effusam populi multitudinem, idemque, prout se dabat occasio, christianae doctrinae summam explicabat, utrasque enim partes et concionatoris et doctoris obibat egregie. Supplicationes quas poenitentiae vocant, eodem habebat modo quem in patrum vita descripsimus. Nocturnos quoque conventus, exclusis feminis, ad peculiarem viro- rum cultum nunquam omisit. In perorationibus ferreis se flagellis atrociter caedere consuevit, quo obstinatiores flecteret ad poenitentiam. Ad haec, exemplo patrum nudis semper incessit pedibus, peregrini habitu, demissa e collo ad pectus Christi crucifixi imagine, baculo in manibus viatorio et brevi humeros protegente sagulo.

XII. Atque hoc modo non paucas obivit dioeceses, lustraturus utique universam Italiam cum infinita populorum utilitate, si diutius ei vita suppeditasset. Sed in medio cursu, et

magna agentem, et maiora cogitantem inopina mors intercepit. Iam tota Italia eius fama pervagata erat, adeo ut frequentes ad eum episcoporum ac principum virorum litterae pervenirent, quibus ad suam quisque vel dioecesim vel ditionem illum pertrahere certatim conabantur. Ubi vero fuit, satis explicari non potest quanto cum incolarum bono atque utilitate fuerit, ut ii beatissimi haberentur apud quos diutius commoraretur. Mitto hoc loco recensere sublatas discordias, conciliatas amicitias, compressas libidines, coercitam blasphemantium impietatem, meretrices extractas e luto ac sordibus: contra vero bonos ubique mores inductos, frequentem sacramentorum usum commendatum atque alia huiusmodi, quae quod omnibus patris Segneri missionibus communia erant, usu paene ipso viluerant. Duas tantum missiones commemorabo, mutinensem unam, florentinam alteram, quae reliquis a p. Segnero habitis, et rerum gestarum amplitudine et commotione animorum, nobiliores insignioresque fuerunt.

XIII. Mutinam a Raynaldo I Duce evocatus amplissimo urbis loco, qui septuaginta hominum millia capere dicitur, ad conventus populi habendos electo, vix in conspectum se dedit p. Segnerus, non solum totam civitatem, sed etiam tantam tamque incredibilem ex vicinis pagis castellisque excitavit multitudinem, ut pacne omnem patentissimae illius areae amplitudinem compleverit. Quid plura? hebraei ipsi magno numero ad audiendum apostolicum virum concurrerunt: quamquam non tanti infinita prope hominum multitudo facienda est, quanti aestimandus est fructus qui collectus fuit uberrimus. Hunc licet coniectare ex perditis mulieribus quae relicto infami quaestu e coeno ac sordibus, in quibus iacebant miserrime, ad viginti emerсерunt. Nec vero hebraei quos

Patris concionibus interfuisse diximus, non aliqua ediderunt signa pietatis; ferunt enim apostolici concionatoris eloquentia permotos, ingentem pecuniae vim ad usus pios liberaliter erogasse. Haec aliaque huiusmodi patrata sunt praeter consuetudinem, quorum memoria ne intercideret, grata civitas marmoreo monumento insculpta ac testata esse voluit. Monumenti autem exemplar hic exhibemus.

DEO . OPTIMO . MAXIMO
 QVOD . APOSTOLICA . MISSIONE
 A . P . PAYLO . SEGNERO . SOCIETATIS . IESV
 HOC . IN . LOCO
 ADMIRABILI . CORDIVM . COMMOTIONE
 DECEM . INTEGRIS . DIEBVS . PERACTA
 IAGNVN . SVI . TIMOREM . PARITER . AC . AMOREM
 VNIVERSO . POPVLO . MVTINENSI
 INFVDERIT
 PRIDIE . IDVS . IVNII . ANNO . MDCCXII
 REGNANTE
 RAYNALDO . I . MVT . REG . MIRAND.
 DVCE

XIV. Nec minor Florentiae animorum motus fuit. Hic quoque ad capiendam immensam multitudinem electum forum, quod est ad templum s. Crucis amplissimum. Praeivit omnibus singularis pietatis exemplo ipse magnus dux Cosmus III, qui quotidie Patris concionibus interfuit. Principis exemplum tota civitas sequuta est. Sementi iactae per eos dies respondit messis, qua sudores servi Dei abunde compensati sunt. Nostri quotquot debebant Florentiae, tum in collegio,

tum in domo tertiae probationis, vix capere partem quietis aliquam potuerunt, assidue in excipiendis poenitentium confessionibus occupati. Verum tantae multitudini non suffecissent, nisi in laboris partem sacerdotes omnes ex ordine tum regulari tum saeculari successissent. Seniores numquam, nec sua nec patrum memoria tantum in ea urbe motum concitatum tantamque morum factam esse conversionem, passim affirmarunt. Cosmus vero qui populos sibi creditos, tam probe exscultos vidit, credi non potest quanto gaudio exultaverit. Perscripsit hac de re litteras ad societatis moderatores honorificentissimas, in quibus iis gratias agit quam maximas, quod sibi hominem adeo sanctum subditorum suorum bono utendum concessissent, collaudat apostolici viri fervorem ac zelum, affirmatque apud se tanti beneficii memoriam nunquam interituram: ad extremum devotionem suam erga societatem universam, quam appellat ordinem de ecclesia catholica benemeritum, perpetuam fore pollicetur.

XV. Hos fere motus animorum ubicumque fuit Segnerus excitavit. Quod de florentina ac mutinensi missione dictum a nobis est, de lucensi atque aretina dici potest. Aloisius Horatius Spada lucensis episcopus idemque cardinalis, rerum a p. Segnero in sua dioecesi gestarum narrationem perscripturus, ab illis s. Ioannis verbis magnifice non minus quam vere exorsus est « *Quod audivimus, quod perspeximus, et manus nostrae contrectaverunt testamur et annuntiamus vobis* ». Quo exordio satis declaratur, quae et quanta ad Dei gloriam ac salutem animarum a p. Segnero gesta sint. Non minus egregium de missione quam habuit Aretii atque honorificum testimonium, eius urbis episcopus dedit. Affirmavit enim ex prope infinita multitudine, quae ad quadraginta ho-

minimam millia convenit, neminem inventum esse qui se Deo salutari poenitentia non reconciliavit. Addidit etiam tantam existisse ferventissimi Patris eloquentiam, tot excitatos clamores misericordiam veniamque implorantium, tot denique lacrimas vulgo ab omnibus profusas, ut vel saxea corda emolli ad poenitentiam ac scindi omnino debuerint.

XVI. Iam vero ex his facile colligi poterit, non solum quae gesserit p. Segnerus, sed etiam quae ad Dei gloriam gesturus erat, si diutius uti supra indicavimus vixisset. Sed quoniam Deo placuit sanctum virum ad sempiternam quietem maturius evocare quam tot populorum salus postulare videbatur, divinae voluntati acquiescendum fuit. Verum quod ipse e vivis ereptus per se efficere non potuit, per alios effecit qui ex eius disciplina prodierunt. Constans perspectae sanctitatis fama multos illi comites conciliavit, qui eius methodum edocti et cohortationibus inflammati, apostolici viri et multis provinciis saltares evaserunt. In his plane digni sunt, de quibus mentio cum laude fiat pp. Ascanius Simi, Ignatius Xaverius Constantius, Felix Lana, Ioannes Cribellus et Ioannes Baptista Cancellotus, atque hi quidem omnes ex nostra societate, qui universam Italiam adiectamque Corsicam sacris missionibus obierunt, et in vinea Domini strenne naviterque laborarunt. Et in Corsica quidem messis praeter modum copiosa fuit. Tradunt enim, discordias tot tantasque in illo regno sedatas, ut ad telorum omnisque generis armorum quadraginta et eo amplius millia unum in locum comportata sint; summo illorum populorum bono, quibus firmata inter ipsos pace, rixarum quoque incitamenta atque instrumenta caedis ablata sunt.

XVII. Neque vero nostri tantum se p. Segnero in disciplinam tradiderunt: sed etiam externi ac praesertim duo patres ex franciscana familia, quos adeo illexit p. Segneri consuetudo, ut una cum eo quamdiu vixit esse voluerint. His accessit tertius non sine insigni laude commemorandus, venerabilis p. Leonardus a Portu Mauritio ex eodem ordine s. Francisci strictioris observantiae. Hic se comitem addidit p. Segnero, tum sacrarum missionum rationem totam probe edoctus omnem Italiam peragravit, singulari cum animarum fructu et divinae gloriae incremento. Non multos ante annos obiit Romae plurimis a Deo illustratus prodigiis. Hoc idcirco commemorandum duximus, propterea quia nos servi Dei gratiam inituros existimavimus, si quod ipse vivens prae se ferebat, idem eodem mortuo vulgaremus.

XVIII. Sed quoniam de sociis p. Pauli Segneri sermo incidit, duo nobilissimi gennenses non sunt silentio praetermittendi Ioannes Thomas Centurionus et Iacobus Lomellinus, qui raro exemplo repudiatis honoribus quos consequi in republica in qua nati erant poterant amplissimos, Patri adhaeserunt. Et Lomellinus quidem, quo omnem propagandae familiae spem praecideret, sacerdotio voluit initiari. Hic ita se p. Segnero addixit, ut ab eius latere nunquam discesserit. Ab obitu vero Patris tantum abfuit ut se reciperet in patriam, ut constantissime usque ad mortem in suscepto proposito nostros in sacris expeditionibus comitandi patres perseveraverit. Decessit demum Sarzanae singulari opinione virtutis. Cadaver ingenti concursu populi elatum fuit et nobili tumultu, contra atque ipse testamento mandaratum, compositum.

XIX. Verum sacrarum p. Segneri missionum fructus non solius Italiae finibus se continuit, sed in Germaniam usque

pervasisit. Anna Aloisia serenissimi magni Etruriae Ducis Cosmi III filia et Electoris Palatini nxor, duos e nostris e Germania in Italiam mittendos curavit ad eum finem, ut a p. Paulo Segnero, de cuius eximia virtute singularem habebat opinionem, ad apostolicum munus erudirentur. Et vero probe tanto magistro atque doctore eruditi sunt tantumque profuerunt, quantum postea copiosissima collecta messis declaravit. Exstant litterae Dusseldorfio et Aquisgranio ad supremum societatis moderatorem perscriptae certissimum uberissimi fructus testimonium. In his mira narrantur: catholici ad meliorem frugem traducti, haeretici bene multi Deo et ecclesiae romanae conciliati, concursus extraordinarii ad viginti et quandoque ad triginta hominum millia.

XX. Et sane non est cur miremur, si ratio quam descriptissimus habendarum missionum, in exteris nationibus nova quadam specie tantos excitavit motus, cum in Italia ipsa in qua iampridem viget tanta cum animorum commotione adhibeatur: neque enim aliter esse potest, si rem ipsam attentius investigemus. Tot enim ac tam potentes peccatorum cordibus machinae admoventur, ut divina praesertim adspirante gratia, vel obstinatissimi expugnari omnino debeant. Cuius rei certissimum testimonium mihi est, quod mali homines, malo utique instigati daemone, hanc methodum criminari nunquam destiterunt: unde inferri licet, et Deo gratiam et animis salutarem et inferno maxime infestam esse atque exitialem. Atque hi quidem obtrectatores p. Segnero non defuerunt: verum eorum calumniae facile diluuntur plurium episcoporum testimonio, ac praesertim gravissimo Clementis XI iudicio, qui p. Segnerum plurimi fecit eumque ad excolendum recepto iam atque usitato more Picenum

ipsemet allegavit. Qua in legatione obvennda, uti paulo post narrabimus nbi praecipuae eius virtutes a nobis fuerint indicatae, vita functus est.

XXI. Nulla fuit virtus apostolico viro digna quae in eo non emeretur. Atque humilitas quidem quae reliquarum virtutum fundamentum est in p. Segnero mire eluxit. Etiam si tot ac tanta quanta demonstravimus pro Dei gloria ac salute animarum gessisset, de se tamen humiliter sentiebat seque inutilem servum appellabat. Summa erat apud omnes existimatione et sanctus vulgo ab omnibus appellabatur et habebatur; *non tamen ambulavit in magnis et in mirabilibus super se*, sed qua erat animi demissione, quanto magis laudibus efferebatur, tanto magis se infra omnes abiciebat. Itaque semper aliis subesse maluit quam praeesse, parere quam imperare. Quod autem ad paupertatem attinet quae humilitatis comes est, eam sibi, ut S. Bonaventurae verbis utar, *desponsasse visus est*. Iam diximus quomodo se ad apostolicum ministerium comparaverit, abdicatione nempe rerum omnium quae non modo superfluae essent, sed etiam necessariae videri possent. Vestibus incedebat detritis atque laceris. Quae ei dono oblata erant constantissime repudiabat, et nihil magis horrebat quam quidquam a quoquam acceptare, quo eius labores unice ob divinam gloriam ac salutem animarum suscepti compensari aliquo modo viderentur. De obedientia vero quae humilitatis comes merito iudicatur, nihil dicam nisi morigerum adeo se prae buisse superioribus, ut nihil ageret ac prope ne cogitaret quidem sine eorumdem facultate.

XXII. Orationis studio apprime deditus fuit. Quod illi occupationes quibus distinebatur reliquum faciebant tem-

poris, totum precationibus rerumque caelestium contemplationi impendebat, et sacris quidem occupatus missionibus, in quibus respirare vix licet, nihil nunquam de praefinito meditationis, lectionis et examinum tempore praecidit. Solebat etiam interdum colligendi sui causa se in solitaria loca recipere, in quibus se totum orationi dabat. Huiusmodi porro loca fere in Etruria erant, aut altissima Alverniae iuga aut montosa Camaldulensium nemora; haec s. Romualdi, illa s. Francisci secessibus consecrata. Ex his montibus tamquam alter Moyses ex Orebo divini amoris igne inflammatus descendebat, quo postea longe lateque diffuso omnium corda animosque corripere. Ex hoc orationis studio mirus quidam in eo oriebatur devotionis affectus. Hinc iuges lacrimae illi profluerebant ex oculis cum sacra mysteria celebraret. Hinc etiam singularis devotionis sensus erga sacrosanctam Christi humanitatem et sanctissimam eiusdem Parentem; et hanc quidem ita dilexit ut eius etiam cultum mirifice propagaverit. Inter eius conciones illa maxime probabatur, quam de beata Dei Genitrice sub finem sacrae missionis habere consueverat. Eius exemplaria manu exarata circumferuntur, sed vereor ut fideliter descripta sint.

XXIII. Iam ut aliquid de eius singulari innocentia dicamus, haec talis fuit qualem luculentissima gravissimorumque virorum qui eum intime norant testimonia confirmant. Haec porro testimonia legere est in eius vita copiose luculenterque a p. Francisco Maria Galluzio conscripta. Ceterum si ut inquit S. Ambrosius, *imago quaedam animi loquitur in vultu*, ex ore p. Segneri sese eius prodebat innocentia. Angelus vulgo appellabatur, et angeli quidem erat aspectus et

hoc nomine dignissimi mores. Non defuit qui luderet in eius nomine atque anagramma conficeret quo *angelus nix purior* dicebatur. Hanc tantam innocentiam veluti candidissimum lilium poenitentiae spinis munivit ac sepsit. Hac in re asperimum illud afflictationum genus, quo in genere excelluit patruus, prope est assequutus. Cilicio asperrimo utebatur ad nudam carnem, lineis vero indusiis texturae crassioris ut cilicii vices obire possent. Flagra adhibebat ferreis compacta laminis quibus sibi humeros non diverberabat sed concidebat. Nullus vero in se caedendo modus, praesertim ubi incaluerat in concionum peroratione. Prudentum hominum opinio fuit, tot suscipiendis voluntariis afflictationibus tantaque sanguinis effusione (erat enim gracili admodum ac delicato corporis habitu) opinio inquam fuit, sibi ante tempus mortem arcessivisse.

XXIV. Et sane cum Senogalliam se contulisset iussu Pontificis Maximi ibique consueta sacrarum missionum impigre exsequi munia coepisset, morbo correptus est. Hunc primum contempsit, quamquam non obscuris significationibus lethalem illum sibi futurum multis ante praedixisset. Verum non ante morbo cessit quam paene ad exitum sacram missionem perduxerit; quo vehementer ingravescente, tandem eiusdem violentiae cedere coactus est. Nihil praetermissum ab amantissima civitate quo sanitati restitueretur. Evocati praeter eos qui medicinam ea in urbe faciebant ex vicinis urbibus medici. De communi omnium sententia multa adhibita remedia, sed nullo aegrotantis levamento. Ubi vulgatum est summum in discrimen vitam sancti viri adductam esse, dici non potest quantum hoc nuncio perculsa fuerit civitas uni-

versa. Itaque omnium vota ad exorandam divinam clementiam implorandamque conversa, proinde quasi de communis parentis vita ageretur. Indicta sacerdotibus ab Episcopo oratio pro infirmis est et in aede principe sacrosanctum Christi corpus publicae venerationi expositum. Fraternitates, quas vocant, eo se contulerunt poenitentium habitu. Alii funes e collo suspenderant, alii se flagellis ad sanguinem usque diverberabant, omnes nudis pedibus incedebant, nudis item pedibus ac supplicantis ritu puellae et coronas spineas in capite gestantes processerunt. Susceptum quoque iter est habitaeque supplicationes extra urbem ad templum B. V. tribus distans milliariis, quo divinam atque amantissimam matrem pro carissimi patris valetudine exorarent.

XXV. Haec dum agerentur, ex proxima urbe Fani eius collegii rector Senogalliam advenit, quo decumbenti patri solita caritatis officia praestaret. Adventu rectoris iniecta civitati suspicio est, illum ad eum finem venisse ut inde post obitum Patris ad fanense collegium cadaver asportaret. Haec suspicio adeo hominum animos invasit, ut excitato tumultu clausisque repente tabernis, domus in qua decumbebat Pater ingenti multitudine fuerit circumsessa. Clamare omnes nunquam se permissuros tantum sibi bonum eripi ac carissimum pignus auferri. Itaque diu noctuque excubiae habitae sunt. Interea Pater ingravescente morbo morti appropinquabat. Expiato sacramentali confessione animo, nihil cupiebat ardentius quam sacrosancto refici Christi viatico. Sed violentia morbi qui paulo post eum mente deturbavit, effecit ut illud sumere nequaquam posset. Sacro igitur oleo inunctus, defixo in B. Virginis imaginem obtutu, in ipso annorum ac

laborum cursu discessit e vita solemui die Corpori Christi sacra, hora post ortum solis secunda anno MDCCXIII die XV iunii annos natus quadraginta nondum expletos, quorum septem in apostolico ministerio incredibili divinae gloriae incremento ac animarum salute consumpserat.

XXVI. Quibus honoris significationibus vivum exceperat amantissima civitas, iisdem atque adeo maioribus eundem mortuum prosecuta est. Nostri qui aderant volebant peragi eius fuus ulla pompa, et recepto apud societatem more. Reclamatum est ab universa civitate, quae velle se diceret haec apud posteritatem votam subire ut pateretur efferrī privato funere virum quem tamquam sanctum venerabatur. Igitur magnificentissima pompa funus celebratum est. Habita primum Corporis Christi, quandoquidem in diem illum sacrum mors Patris inciderat, supplicatio fuit. Qua absoluta iidem ipsi qui Christi corpus deduxerant, eodem et numero et procedendi ordine defuncti patris cadaver ad aedem principem detulerunt.

XXVII. Praeibant fraternitates omnes, quas religiosas familiae excipiebant: subsequebatur clerus universus, succedebat scutrum nostrorum humeris elatum stipatumque militibus tercentis, qui evaginatiis gladiis affluentem multitudinem arcerent; claudebat totum agmen magistratus una cum nobilioribus civitatis. Sequenti vero die exsequiae celebratae ac solemnis missa a musicis decantata est adstante capitulo et urbis magistratu, incredibili omnis generis ac loci hominum concursu. Funebrem orationem egregiam sane ac luculentam habuit unus ex patribus sancti Philippi Neri. Absolutis exsequiis ad manus ac pedum osculum primores

quique accesserunt. Cadaver denique in arca compositum in sepulchrum ipsum senogalliensium episcoporum illatum est additumque huiusmodi elogium:

D. O. M.

P. PAVLVS . SEGNERVS . SOCIETATIS . IESV

MISSIONARIVS . APOSTOLICVS

QVI VIX . SEPTENNI . SACRARIUM . MISSIONVM

MYNERE . SENOGALLIAE . PERACTO

OBIT . XV . IUNII . MDCCXIII

AETATIS . XXXX

CVIVS . FVNERIS . ACERBITATEM . RECVRRENS . EO . ANNO

AC . DIE . SOLEMNITAS . CORPORIS . CHRISTI

AN . MINVERIT . AN . AVXERIT . NESCIAS

III.

P. IOANNES PETRVS PINAMONTIVS

I. Qui p. Pauli Segneri cognomento senioris vitam legerit, is non magnopere res a Ioanne Petro Pinamontio gestas cognoscere desiderabit. Una enim fere semper fuerunt et quod in sacris missionibus quibus divinam gloriam coniunctis studiis propagarunt actum ab uno narratur, ab altero quoque gestum debet existimari. Quare iis omissis quae cum p. Segnero communia fuerunt, illa tantum quae propria ac singularia p. Pinamontii sunt breviter persequemur.

II. P. Ioannes Petrus Pinamontius piis ac nobilibus parentibus Ioanne Pinamontio et Catharina Campanellia, Pistorii Etruriae urbe natus est, anno ab ortu Christi **MDCXXXII** die **XXVII** decembris. Eluxit statim in puero egregia indoles atque ad pietatem proclivis; egregiae indoli singulare adiunctum ingenium effecit ut iam tum sanctum ac doctum evasurum homines coniectarent. Nec vero coniecturam fefellit eventus; utraque enim laude praestitit. Annos

natus XIV vocatus a Deo ad societatem Iesu: ideo vocanti statim obtemperandum duxit et post sublata quae viam obsepiebant impedimenta, sui ac mundi victor ad romanum tyrocinium convolvavit; eoque praeter egregias alias animi doctes singularem innocentiam detulit, quam ad exitum usque vitae suae immaculatam servavit.

III. In tyrocinio eius virtus sic enituit ut exemplo aliis praeiret. Confecto tyrocinio et nuncupatis de more votis, rhetoricae primum, tum philosophiae studuit; post haec studia ad tradendam adolescentulis grammaticam missus, quos nactus est discipulos non litteris magis quam pietate informandos curavit. Aliquot in hoc munere consumptis annis Romam evocatus, iussus est theologum audire. Summa animi alacritate magnaue propter excellens ingenium expectatione omnium eius facultatis ingressus curriculum, non modo illud conficere non potuit, sed haerere ad carceres coactus est. Nam vix duobus in theologiae studio exactis mensibus, acri adeo ac vehementi dolore capitis affligari coepit, ut de medicorum sententia illi facultati quae non minorem contentionem quam ingenium postulat, nuncium remittere coactus sit. Ea res omnes et praecipue societatis moderatores qui summam in eo spem collocarant maxime perculit. Ictus quoque ipse Pinamontius vehementer tam repentino ac subito casu; sed qua erat animi moderatione divinae providentiae de se sic statuentis consiliis acquievit. Illud unum eius angebat animum, quod theologiae praesidio destitutus minus ad iuvandos proximos quorum caritate flagrabat, idoneus futurus esset. Sed hoc etiam divinae permisit voluntati. Verum hoc contentus sacrificio Deus servum suum quem iam tot populorum saluti destinarat, minime otiari atque in um-

bra delitescere passus est; sed illum alia via (*neque enim viæ meae viæ vestrae, dicit Dominus*) emisit in lucem hominum in aciemque produxit. Itaque praeter expectationem summus evasit theologus et in vinea Domini strenue laboravit. Nam et divina adiuvante gratia et inusitato quodam animi robore sustentante corporis infirmitatem, tantum privato studio in theologia profecit, quantum adhibito quovis excellenti doctore proficere potuisset.

IV. Transegit in ministeriis levioris momenti quinquennium, quo tempore quod nactus est otii, totum ad animi sui cultum ac profectum contulit, quo ad apostolicum munus instructior accederet atque paratior. Ubi se satis collegisse virtutis arbitratus est, consilium suum sacris missionibus iuvandi proximos quod iam diu fovebat superioribus aperuit; quibus et consilium approbantibus et facultatem libentissime impertientibus, apostolicum munus suscepit an. MDCLXV in eoque perstitit ad annum MDCCIII, qui eius vitae ac laborum finis fuit, idemque initium caelestis sempiternaeque quietis. Multos annos una cum p. Paulo Segnero hoc in munere versatus: quo Romam evocato a seque distracto, nihilo secius in incepto perseveravit.

V. Iam vero quas illi partes sacris in missionibus a p. Segnero impositas diximus, erudiendi nempe docendique populum, quomodo impleverit videamus. Hoc vere dici potest, neminem maiora vel naturae vel doctrinae praesidia ad eam provinciam attulisse. Exstat eius rei ipsius p. Segneri testimonium, qui scribens ad societatis moderatores, *se, inquit, verbis assequi non posse, quam egregie in tradendis christianae doctrinae rudimentis cumulateque omnibus p. Pinamontius satisfaciat. Populum pendere ab ore dicentis: sibi*

quidem persuasum esse, neminem reperiri qui hac in re cum p. Pinamontio comparari possit. Quod vero privatim scribebat p. Segnerus, idem de eodem publice profitebatur. Addebat etiam, quidquid ex sacris missionibus fructus colligebatur, id paene omni comiti suo acceptum esse referendum, qui apposite adeo bene vivendi credendique rationem populo explicabat. Quare pro concione nunquam auditores non monebat suos ut catechismo interessent: rogabat etiam atque etiam, ut si per occupationes tum concioni tum catechismo interesse non possent, concionem omitterent, catechismum vero audiendum curarent. Quod testimonium adeo p. Pinamontio honorificum sanctus vir non amicitiae dedit sed veritati.

VI. Et sane pressus erat in tradendis iis, quae sive ad dogma fidei sive ad praecepta decalogi pertinent: ita summa doctrinae paucis comprehensa verbisque quam aptissimis explicata, facilius a populo et intelligebatur et memoriae mandabatur. Tradita hoc modo doctrinae summa, non sine artificio delabebatur ad ea persequenda quibus auditores de propriis officiis commonefacti, pravos mores corrigerent et virtutem amplecterentur. Stilus erat non quaesitus, sed simplex et rudium auditorum ingenio maxime accommodatus. Captabat ex rebus notissimis similitudines quibus res, de qua agebatur, nota fieret atque perspicua. Hoc orationis genus simplex et nitidum, summa affabilitas oris et modestia mirum in modum commendabant. His de causis eum omnes cupidissime audiebant, docti iuxta atque indocti. In maritima genuensis ditionis ora missiones cum haberet, eius unius audiendi causa bene multi ad XX passuum millia conficere non dubitarunt. Neque vero rustici solum, sed etiam viri nobiles feminaeque

primariae. Fiebat etiam quandoque, ut ingentem concursum nullae sacrae aedes quantumvis amplissimae caperent. Quare etsi aperto loco, soli, ventis pluviisque obnoxio consistendum esset, nullum tamen horum incommodorum adstantem populum deterrebat, quominus Patrem caelestem doctrinam explicantem stans atque immotus audiret.

VII. Atque hoc quidem modo in munere docendi erudientique populos se gessit p. Pinamontius, labore utique non mediocri, sed quem fractae eius debilitataeque vires ferrent. Aliud vero onus longe gravissimum subire coactus est, quod paene solus sustinuit, indefessam videlicet in sacramentalibus confessionibus excipiendis assiduitatem. Neque enim p. Segnerus propter aurium incommodum illud, de quo diximus in eius vita, publico in loco poenitentes audiebat, sed tantum privato in cubiculo nonnullorum excipiebat confessiones. Ita onus longe gravissimum, quod ex aequo divisum ferri a duobus tolerabilius poterat, paene totum Pinamontio incubuit. Igitur quamquam dolore capitis assiduo conflictaretur, quindecim et eo amplius tamen horas in sacro tribunali perstabat cognoscendis poenitentium expiandisque conscientiis; ut miraculo habitum fuerit, hominem eo incommodo laborantem tot continenter horas potuisse aures confitentibus praebere. Et sane miraculum intervenit. Nam cum se huic ministerio dedidisset, acriter adeo dolor capitis intendi coepit, ut omnino exsequi se posse hoc munus desperarit. Verum implorata sancti Xaverii ope, quod flagitavit obtinuit; et quidem ita, ut qui scribens aut commentans aliquid per semihorae spatium, sine summa capitis defatigatione sedere ad pluteum vix poterat, in sacro tribunali ad XV horas, ut diximus, et eo amplius perstaret immotus.

VIII. Quomodo autem hoc ipso in munere se gesserit, operae pretium est cognoscere. Locum in quo confessiones excipiebat, verius obsessum quam stipatum confluentium multitudine dixisses. Ipse autem peramanter excipiebat omnes, patienter audiebat, excitabat ad poenitentiam, erigebat ad spem consequendae veniae, demum saluberrimis impletos monitis et in sancto proposito de nova ineunda vita confirmatos dimittebat. Haec caritas plane eximia ac singularis qua poenitentes excipiebat, non solum ei infinitam hominum tenuiorum multitudinem attraxit, sed illexit etiam viros nobiles feminasque primarias. In his omittenda non est Maria Lucretia Barberina serenissimi mutinensium Ducis uxor, cui a confessionibus fuit. Modestissimus pater quantum potuit hunc honorem detrectavit, sed instanti nobilissimae feminae coactus est cedere, ea tamen conditione, ut adventante vere, sibi ad sacras missiones cum bona eius gratia liceret exire. Qnas quidem adamavit adeo, nihil ut in vita sacris missionibus habnerit carins, nihil timuerit seu potius exhorruerit magis acceptissimi sibi muneris vacatione.

IX. Itaque in apostolico ministerio ad mortem usque perseveravit. Nam etsi distractus a p. Paulo Segnero, quem Innocentius XII Romam evocavit, nihilo tamen secius perstitit in incepto. Alio quidem usns est socio; sed nihil eorum, quae iam cum p. Segnero instituerat, immutavit. Septuagenario maior nndis pedibus, sacris in missionibus incessit exemplo p. Segneri. Cum in parochi cuiusdam domo diversaretur, ne ad aliquot quidem passns, quantum videlicet spatii intercedebat ecclesiam inter et parochi domum, ad rem divinam faciendam progredi calceatus snstinuit, sed secum sub alas crepidas deferens, tum demum eas pedibus induxit, cum

ad celebrandum sacrum prodivit. Rogatus quare id faceret, hoc se ab optimo p. Segnero accepisse respondit, a cuius vestigiis, ne latum quidem unguem, quamdiu viveret confirmavit se esse discessurum; tanti apud eum illius viri summi erat auctoritas. Quo responso docemur non temere ea, quae sancti viri experientia non minus edocti quam caelesti lumine illustrati constituerunt, esse immutanda.

X. Eadem igitur, quam a p. Segnero didicerat, methodo religiosissime retenta, multas Italiae regiones ac dioeceses ingenti cum animarum fructu lustravit. Quarum plerasque totas obivit, aliquas autem ex parte peragravit. Anno MDCC Romam ad iubilaei celebritatem venit; neque tamen se continuit, quin vicos et castella identidem adiret et ubique divini verbi semina spargeret. Verum quo facilius ei ad sanctam urbem indulgentiarum consequendarum causa regressus esset, intra agri romani fines se coercuit. Transacto anno piaculari, ad dioecesim bononiensem excolendam contendit. Annis vero MDCCI et MDCCII cum magnam Italiae partem percurrisset innumerabilesque mortales Christo lucratus esset, tandem anno MDCCIII Ortae, uobili oppido ad lacum Larium, plenus meritis laboribusque confectus decessit. Sed priusquam eius obitum describamus, pauca de virtutibus delibemus.

XI. Atque ut a caritate quae virtutum princeps est sumamus exordium, ea huiusmodi fuit quae in tali viro esse debuit. Illud Apostoli propositum habens *videte qualem caritatem dedit nobis Deus*, tantam caritatem pro viribus respondere conatus est. Ardor ille divinus quo aestuabat, facile ex vultu eminebat; iudicabatur etiam ex sermone qui fere erat de rebus divinis, aut certe ad Deum aliquo modo spe-

ctautibus. Ex eodem fonte caritatis in Deum profluxit caritas erga proximos, quorum non solum animos omni ope sublevandos suscepit, sed corpora etiam omni officio fovenda curavit. Quamdiu Romae fuit, e tyrocinii domo ubi diversabatur, fere quotidie ad lateranense valetudinarium se contulit. Atque hic quidem nulla erant ministeria adeo abiecta ac sordida quae eius caritas aversaretur: cuiusmodi illa sunt, verrere pavementum, lectulos steruere, vestes consuere, eluere sordes, subsecare ungues, purgare immunda vasa aliaque id genus. Praeterea singulos circuibat lectos et unumquemque ad poenitentiam adhortatus, multorum excipiebat confessiones ignarosque rerum divinarum erudiebat. Nulla aeris intemperie impediabatur quominus eo se singulis fere diebus conferret. Quadam die flante vehementius borea, qui Romae rigidissimus est, ad sociam conversus: o nos beatos, inquit, si tam pia de causa mortem oppeteremus! Et sane anno **MDCLXXXIV** cum ex eodem valetudinario domum rediret, et solito intensius boreas debaccharetur, morbo correptus gravissime decubuit. Verum divina bonitate servatus, vix bene discusso morbo, eodem reversus est eadem repetens caritatis officia.

XII. Tantam caritatem mirum in modum rerum divinarum contemplatio et assiduum orationis studium auxit. In ea plures continenter horas perstabat immotus; ex eaque, quasi ex consortio Domini, ad salutem animarum ferventior prodibat. Hiuc etiam summam cordis munditiam consecutus est. Aliquot autem menses quam moreretur, conscientiam suam generali confessione cum apud sacerdotem expiasset, nihilque retinisset eorum quae sibi minus aut recte facta aut cogitata viderentur, nihil tamen edere potuit, quo a se graviter

laesam divinam bonitatem iudicare posset, ut sacerdos tantam innocentiam satis demirari non potuerit.

XIII. Hanc porro sanctorum virorum exemplo non solum perpetua sensuum ac praecipue oculorum custodia, sed etiam vexatione atque afflictatione corporis tutatus est. Cilicium ad nudam carnem gerebat asperrimum. Primo mane statim ac lectulo consurrexerat, se flagellis ad sanguinem usque cadebat. Saepe etiam interdum lanienam illam iterabat, prout sese offerebat occasio placandi Numinis eiusque exorandae clementiae. Fere quotidie constrictam ad lumbos catenulam gerebat, ferreis acuminibus introrsus exstantibus, ac lumbos ipsos non sine acerbo doloris sensu fodicantibus. Summam in victu moderationem adhibuit. Quidquid deliciarum aut exquisitioris obsonii forte apponeretur cum mensae communi accumberet, intactum relinquebat. Quae ei muneri bellaria mittebantur, si recusare non poterat, valetudinarii aegrotis dispartiendi servabat. Duobus postremis vitae suae annis vino abstinuit omnino, nec iuxta indulgentiam Apostoli ad reficiendum languentem stomachum eo usus est.

XIV. Porro regularis disciplinae cultor eximius fuit. Nihil malebat, quam praesidium voluntate atque arbitrio regi. Hoc in obsequio erga superiores, tyronibus ipsis quibuscum vivebat praeivit exemplo. Nullam unquam etiam ingravescente aetate a communibus oneribus vacationem admisit. Regulas omnes quantumvis minimas sanctissime religiosissimeque observavit, easque tamquam formam aliquam vitae recte atque ordine instituendae divinitus acceptam venerabatur. Mirabantur omnes hominem id aetatis, qui multo maiorem anni partem extra claustra vitam agere libito suo consueverat, intra domus septa ita se gerere, perinde quasi num-

quam e claustris pedem extulisset. Documentum insigne iis, qui idem vitae genus sequuntur.

XV. Quod ad reliquas virtutes attinet, nemo illo egentior ac rebus omnibus spoliator fuit. Idem patiens iniuriarum: calumnias quibus ab invidis hominibus et daemonis causam agentibus, cui intererat sanctum virum mala fama laborare, impetebatur, negligebat; permittebatque Deo innocentiae suae causam defendendam. Et vero Deus causam suscepit, effecitque ut nunquam daemonis artes impedimento essent, quominus divinam gloriam amplificare et animarum saluti consulere posset.

XVI. Verum inter omnes quibus excelebat virtutes, praecipue enituit humilitas. De se admodum demisse sentiebat et loquebatur: non modo honorem, sed honoris umbram omnem ac speciem aversabatur. Nihil malebat quam *nesciri ac pro nihilo reputari*. Quidquid in sacris missionibus prospere gestum esset, secundum Deum sociis adscribebat suis. Res ad Dei gloriam praeclare gestae in missione quadam typis vulgatae sunt. In narratione perhonorifica fiebat de p. Paulo Segnero et crebra mentio; de Pinamontio autem nulla, aut certe perexigua. Ex stilo sagaciores conieciarunt scriptum illud ab ipso Pinamontio fuisse exaratum. Res tandem nti erat comperta est verusque auctor detectus, ipse videlicet qui pro sua animi demissione ac modestia, quam socio tribuit, sibi laudem ademit. Solemnem quatuor votorum professionem non emiserat, propterea quia theologiae curriculum valetudine impeditus, uti diximus, vix inchoatum relinquere coactus erat. Hoc tantum abfuit ut celaret, ut etiam prae se ferret, illud addens, se propter infirmitatem ingenii, eo apud societatem loco indignum esse iudicatum.

XVII. Ceterum excellenti fuit ingenio et eximia eruditione, ut praeclara eius opera declarant. Multa scripsit quae manibus hominum teruntur summoque in pretio habentur, propter insignem doctrinam quae ex rebus quae tractavit elucet, et propter eximium quemdam stili nitorem quo usus est. Inter cetera opusculum conscripsit vere anream et *sacrum Mariae cor inscripsit*. In eo collegit omnia diligentius quae de Virginis laudibus a ss. Patribus evulgata leguntur; multa adiecit quae excogitavit ipse pro sua erga sanctissimam Dei Genitricem eximia plane ac singulari pietate. Hoc volumen magni fit ab omnibus, et prope geminum cum altero de eodem argumento et eiusdem molis a p. Paulo Segnero conscriptum, existimatur. Neque vero hic tacendum est, plurimum adiumenti patri Segnero contulisse Pinamontium ad praeclara illa conficienda volumina quae Segnerus posteritati reliquit: ferunt enim magnam materiae partem suppeditatam a Pinamontio, a Segnero autem recte atque ordine digestam, ornatissima copiosissimaque oratione tractatam. Ita modestissimus vir proximorum saluti prospiciebat et suae obsequabatur humilitati. Hoc ad hominum notitiam non pervenisset, nisi orta inter sanctos viros humilitatis contentione, quod Pinamontius celatum volebat, Segnerus prodidisset.

XVIII. Iam ut eius mortem exsequamur, lustratis non paucis dioecesis novariensis pagis, Ortam devenit. Hic maiore animi contentione quam eius fractae vires sustinere possent, solita exorsus sacrarum missionum munera exsequi, morbo corripitur. Sequenti die cum pedibus non posset insistere, hominum manibus brachiisque sublatu, in templum deferri voluit ubi ab infinita multitudine expectabatur. Primo vix

loqui posse, deinde vocem sensim intendere, tanto demum ardore spiritus, tanta contentione vocis verba facere, ut adstantium nemini dubium fuerit, quin eos iam e vita emigraturus, quod etiam ex oris pallore colligebant, postremum alloqueretur. Itaque perinde ab omnibus quae dixit excepta sunt, ac novissima morientis amantissimi patris ad carissimos filios verba. Et saue concione absoluta, morbi violentiae cedere coactus est. Nihil praetermissum a sex medicis qui ex proximis vicis advolarunt quo sanitati restitueretur. Sed iam sancti viri ex hac vita migratio adventabat quam ipse multo ante praesenserat. Itaque adhibitis frustra remediis, de eius vita desperatum est. Ubi hoc in vulgus efferri coepit, omnes periinde luctu ac moerore affecti sunt, ac si de communis parentis obitu ageretur. Ipse vero quieto ac tranquillo animo, certissima melioris vitae spe sustentatus, mortem opperiebatur. Libellum conscripserat de ratione se ad extremum agonem confirmandi; eo usus in illo rerum articulo, plurimum inde solatii cepit.

XIX. Inter haec ostentum oppidanis oblatum fuit quod mirum in modum servi Dei opinionem auxit: cubiculum in quo iacebat, paulo ante obitum iugenti circumfusum splendore atque illustratum apparuit. Quae res incredibilem hominum multitudinem attraxit, incenditque cupiditatem videndi servum Dei antequam e vita migraret. Verum qui iacenti assidebant, nequid inde aegroto crearetur incommodi, arcebant a cubiculo multitudinem. Ut id venerabilis senex animadvertit, filios sibi carissimos a conspectu patris minime arcendos ratus, cubiculum omnibus patere voluit. Itaque reclusis valvis, magna repente hominum irruptio facta est. Omnes

lectulo affusi, cum lacrimis morientem patrem intueri, benedictionem exposcere: ipse benignissime exceptos alloqui, peramanter complecti et sublata dextra benedictionem omnibus impertiri. Non defuit qui ab eo peteret, ut eius confessionem exciperet; excepit libentissime Pater et rite confessum, clara et distincta voce formulam pronuntians, absolvit; tanto devotionis sensu, ut appareret, nihil malle quam ut sacra illa verba quae toties in vita iterarat, sibi morienti novissima essent. Et sane paulo post sacramentis omnibus ex instituto ecclesiae procuratus, placidissime decessit die XXV innii anno MDCCLIII cum ageret aetatis annum unum et septuaginta; quorum quindecim in domo paterna innocentissime vixit, sex et quinquaginta religiosissime transegit in societate, octo et triginta in apostolico ministerio, summa cum laude et immenso divinae gloriae incremento consumpsit.

XX. Ingens concursus ad demortui cadaver factus est; omnibus non sine admiratione faciem contemplantibus, in qua venustas quaedam effloruit, ut satis vultus ipse gaudium quo animus in caelo iam fruebatur, indicaret. Hac occasione quid quisque potuit, de capillis ac vestibus sancti viri carpsit secumque abstulit, non memoriae minus quam religionis causa. Paupercula quoque eius snppellex horae momento distracta est, aliis aliud sibi certatim vindicantibus. Ex incisa post XX horas defuncto vena magna sanguinis copia profluxit; facies item iugi sudore manavit, ut novis subinde linteis esset abstergenda: quae quidem signa ab artis medicae peritis praeter naturae ordinem iudicata sunt. Exsequiarum pompa sollemnis fuit, convenientibus ex XXX vicis qui lacum Larium circumstant sacerdotibus et infinita hominum multi-

tudine. Cadaver illatum est in aedem maximam praecedentibus longo agmine fraternitatibus et clero universo, et Patri insta persoluta: habita quoque laudatio funebris et sancti viri inculentissima oratione virtutes celebratae.

XXI. His peractis, praecipue ortani curam in id converterunt ut sacrum pignus ipsis eriperetur; qua de re appellatus unus ex nostris quem socium Pater secum eduxerat, respondit, se nihil incognito supremo praeside societatis posse statuere. Igitur de communi sententia et XXX vicorum nomine Romam perscriptum est, Romaque rescriptum et aequis postulationibus satisfactum. Ortani voti compotes effecti, cadaver quod deposnerant, dum Roma litterae perferrentur, novo monumento compositum locarunt ad sinistrum latas sacelli, quod erat Deiparae sine labe originali conceptae sacrum; tum lege cautum, nequis unquam in illud inferretur, et monumento elogium additum. Multa prodigia implorata divina ope et servi Dei interventu patrata sunt; eiusque sepulchrum ab indigenis iuxta ac peregrinis religionis causa celebratur.

XXII. Fuit mediocri corporis modo, capillo nigro, facie subfusca. Nactus erat ingenium excellens; et nisi contentioni dolor capitis paene assiduus obstitisset, multo plura quam habemus, ingenii sui monumenta reliquisset. Multa tamen reliquit quae simul collecta ingenti volumine comprehenderentur. In his eius non minus doctrina quam pietas elucet, quibus rebus fit ut a doctis atque indoctis summo in pretio habeantur. Natura proclivior erat ad iracundiam, sed divina adinvaulte gratia, vitiosam haec animi sui partem corripuit et incredibilem lenitatem consecutus, ubique mansue-

tudinem Iesu Christi prae se tulit: dignus propterea qui tum ob eximias virtutes, tum praesertim ob perfectam apostolicae vitae formam, nostris hominibus idem vitae genus sequentibus ad imitandum proponatur. Ellogium imagini additum est huiusmodi.

P . IOANNES . PETRVS . PINAMONTI

SOC . IESV

XXXVIII . ANNOS . MISSIONARIVS

HMILITATE . ET . CARITATE . INSIGNIS

OB . XXV . IVN . MDCCIII . AETAT . SVAE . LXXI.

VEN. P. ANTONIVS BALDINUCCIUS

I. Pater Antonius Balducci loco nobili nascitur Florentiae, anno ab ortu Domini MDCLXV die XIX iunii. Genitores nactus est Philippum Balduccium virum eruditum et editis libris celebrem et Catharinam Scholariam singulari pietate feminam. Infans mortis discrimen adiit, quo divina providentia ereptus, ad magna pro Domini gloria et salute animarum gerenda servatus est. Nam cum a famula negligentius gestaretur in sinu, repente decidit in terram tanta membrorum ac capitis praecipue collisione, ut teneri artus comminui omnino debuerint. Sed non gravi inde damno accepto brevi convaluit. Vix septem annos attingit, non obscura futurae sanctitatis indicia edidit, quae et observavit pater, et observata attentius collegit ac mandavit litteris ne eorum memoria intercideret.

II. Vix adolescentiam ingressus de ineundo sacro Praedicatorum ordine cogitavit, motus exemplo fratris qui in eum-

dem ordinem fuerat paulo ante cooptatus. Re cum patre communicata iussus est spiritualia apud nostros exercitia peragere, quo certius divinam voluntatem in re summi momenti exploraret. Paruit pius adolescens libentissime, sed susceptum consilium non mutavit. Peractis exercitiis, cum patrem opperiretur quocum remeare domum debebat, isque ad dictam horam nescio qua de causa non adesset, tempus illud dum pater adventaret orando extraxit. Inter orandum non solum in proposito nutare coepit, verum etiam subito divinae gratiae illapsu aliam sibi mentem iniici, allicique se ad societatem Iesu ac prope sensit impelli. Tam subita mutatione percussus, et inimici fraudes veritus, decrevit ad aliquot dies exercitia spiritualia protrahere, quo certus de divina fieret voluntate. Verum cum se magis ac magis ad societatem sentiret impelli, de eadem ineunda deliberavit. Domum itaque reversus, rem omnem patri aperuit, qui summopere ei susceptum consilium gratulatus, facultatem quam petebat ineundae societatis libentissime concessit, et eo quidem libentius, quod de sanetimoniali quadam femina prophetiae dono insigni acceperat, filiolum eius Antonium et societatem ingressurum et sanctum evasurum.

III. His certissimis divinae voluntatis indiciis confirmatus adolescens, alacri animo societatem Iesu amplexus est, et Romae tyrocinium posuit in domo sancti Andreae. Nuncupatis de more votis, iis studiis operam dedit quibus excoli nostra iuventus solet; tum docendi munere defunctus, Romam ad theologiam audiendam evocatur, cui facultati cum impensius studet gravem in morbum incidit, ut medici de eius salute prope desperarent. Hoc ubi nunciatum est patri, dici non potest quantum inde moeroris contraxerit, de filii salu-

te non minus quam de vaticinii eventu sollicitus. Sanctimoniam illam feminam, de qua supra mentionem fecimus adit, docet quo loco res sit, preces apud Deum exposcit eiusque sententiam de aegrotantis valetudine exquiri. Illa patrem bono animo esse iubet atque eo morbo filium minime extinctum iri affirmat. Et sane ita fuit. Nam aliquantum morbo recreatus, si non convaluit omnino (usus enim est fere semper haud multum firma valetudine), at saltem potuit inceptum theologiae curriculum conficere.

IV. Hoc confecto et sacerdotio iam initiatus Florentiam reiiit, ibique in domo tertiae quam vocamus probationis se totum propriae perfectioni dedit. Huic cum impensius studet se ad sacras missiones a Deo sensit vocari. Nihil ei poterat accidere optatius, quam vitam suam proximorum saluti impendere, qui iampridem animarum Christo lucrandarum cupiditate flagrabat. Igitur re cum Superioribus communicata, quos semper uti certissimos divinae voluntatis interpretes veneratus est, et facta ab iis potestate, laboriosissimum munus ad Dei gloriam et salutem animarum suscepit, in eoque totes viginti annos usque ad obitum perstitit, ut prope miraculo habitum sit hominem, qui gracili admodum esset corporis habitu et variis identidem conflictaretur doloribus, tantam tamque diuturnam contentionem ferre potuisse.

V. Apostolicum exorsus ministerium illud sibi proposuit, nunquam sibi esse quiescendum, nullam salutis ac valetudinis curam habendam, unice de divina gloria cogitandum. Itaque ab uno ad alium vicum se conferebat, ab uno ad aliud pergebat oppidum, ubique apostolicae suae caritatis vestigia relinquens. Atque hoc modo triginta et amplius dioeceses lustravit immenso labore, non minore proximorum utilitate.

Pedes semper ad locum sacrae missioni destinatum pergebat. Inchoata missione multorum operatorum vires atque animos gerens nunquam cessabat. Idem conciones habere, idem docere populum ea quae ad mores animique salutem pertinent. Atque haec quidem diurno tempore: nocturno autem novas iterum habere conciones ad virorum coetum, seclis feminis, et plerumque se flagello cruentans ac prope dilanians excitare obstinatiores ad poenitentiam. Praeterea suam quoque ac pecuniariam sacerdotibus curam impendere, quos separatim a reliquo populo adloquebatur, quo liberius eos proprii officii commonefaceret. Ad haec ne sacrarum quidem virginum monasteria, siqua erant eo in oppido praeterire, quibus quantum poterat, operam non denegabat suam. Ad extremum invisere aegrotos, ne qui adesse concionibus morbo impediebantur, divini verbi pabulo destituerentur. Atque haec fere erat occupationum series: ita se singulis in missionibus gerebat vir apostolicus non laboribus, non sibi, non vitae parcens, quo multos mortales iuvaret animasque orco ereptas caelo transcriberet.

VI. Et sane apostolici viri missiones ingenti semper cum animorum motu atque insigni emolumento peractae sunt. Hoc vel ex eo conici potest, quod certatim ad illum audiendum tanto numero populi confluebant, ut quandoque ad triginta hominum millia auditores censerentur. Ex tanta autem multitudine pauci admodum reperiebantur, quos sancti viri sermo vivus et efficax meliores non efficeret. Ipsi facinorosi homines prodibant e silvis, in quibus maleficiorum causa latitabant, ad eumque audiendum accurrebant. Atque hi quidem mansuefacti optimi patris concionibus, ac mansuetudine deliniti, ferocissimum ponebant ingenium et relictis silvis,

Deo bene iuvante, ad bonam frugem revertebantur. Inveni quoque bene multi, qui pecudum magis quam christianorum ritu vitam degentes, interdicto sibi a multis annis omni sacramentorum usu, tamen in semet reversi atque aliam in euntes vitae rationem, non obscura sinceræ conversionis indicia ediderunt. Quid multa? ipsos quoque turcas Christo lucratus est, cum ad Centumcellas in celeberrimo tyrreui maris portu sacras missiones haberet.

VII. Iam in tollendis inimiciis, quod præcipuum apostolicorum virorum pacem evangelizantium munus est, prorsus fuit insignis. Sæpe uno verbo dissidentes animos conciliavit; quos verbis vincere non poterat, flagellis expugnabat, nec prius a se diverberando abstinebat, quam pacem vel ab inivitis extorqueret. Neque vero sola privata dissidia sustulit, sed etiam publica, quæ sæpe inter ipsa oppida gravissima ferocissimaque gliscebant. Itaque quocumque vir sanctus pergebat, suorum itinerum ac laborum pacem habebat comitem, ut propterea vulgo *pacis angelus* et vocaretur et haberetur.

VIII. Ex his quæ diximus de simultatibus, quid de reliquis abusibus ab eo sublati sentiendum sit facile conici potest. Nulla erant scandala tam altis defixa radicibus, quæ penitus non extirparet. Itaque ubique mulierum compressa licentia, puellarum coercita inverecundia, blasphemi homines a prava pessimaque consuetudine deterriti. Nec vero vitia tantum, sed vitiorum etiam instrumenta sublata: aleæ tesseraeque lusoriae, libelli amatorii aliaque huiusmodi nequitiae incitamenta igni tradita sunt; denique cuiuscumque modi zizania ex agro dominico radicitus extirpata.

IX. Contra vero boni inducti mores, sacramentorum commendatarequentia, sodalitia passim ad fructus perennitatem

instituta, praecipua vero sacerdotibus cultura adhibita, ex quibus populi fere totius christiana pendet disciplina. Quibus rebus obtinuit p. Baldinuccius, ut suarum missionum fructus non ad exiguum tempus quaesitus videri posset, sed ad proximorum utilitatem quam diutissime perduraret. Illud documento sit, quod quidam sacerdos, cum in oppido nescio quo, post diurnam ab eodem patris absentiam confessiones exciperet affirmavit, se nempe ex trecentis quos adventante Paschate peccata sibi confitentes audierat, ne unum quidem lethali culpa contaminatum deprehendisse. Atque haec quidem de laboribus quos cum sacris missionibus distinebatur, gravissimos tulit, deque eorundem laborum fructu quem percepit uberrimum, dicta sint satis.

X. Cum vero inter nostros atque in collegiis versabatur, alius quidem vitae tenor, sed non minus laboriosus. Domicilium fere stabile habuit in residentia tusculana. Hic in angustissima cella habitavit, qua in eligenda praeter studium paupertatis, duo praesertim commoda consequutus est, alterum quod erat contigua templo, unde fiebat ut ad orandum alliceretur: alterum quod in proximum forum prospectum habebat, unde item fiebat ut facile de ipsa via ab eius operam exquirentibus, nocturno praesertim tempore evocari posset. His commodis accessit tertium, quod si quae rixae ac iurgia uti fit in vicino foro orirentur, promptior ad ea comprimenda dabatur accursus. Et sane vix rixantium voces clamoresque patris aures percellabant, advolabat statim iurgantesque componebat; atque hoc pacto multa iurgia ante sedata sunt, quam in caedem ac sanguinem erumperent. Extra cellam nullibi magis erat assiduus, quam in sacro poenitentiae tribunali.

XI. Hic residebat quotidie, ut concurrentibus nunquam non praesto esset. Ceterum pedem domo non extulit, nisi caritas aut ad invisendos aegrotos, aut ad confirmandos extremo in agone morientes foras hominem prodire cogeret, alienis unice commodis ac proximorum saluti inservientem. Et domi quidem praeter assiduitatem in excipiendis confessionibus duplex rexit sodalitium, primum quod ipsemet Tusculi instituit, alterum quod eodem in domicilio iam ante coa-luerat.

XII. Praeter has quas diximus occupationes perinde quasi toto otia-retur anno, aliam sibi sumpsit et laboris quidem immodici. Nam adventantibus quadragesimalibus feriis ad habendas singulis diebus conciones in minoribus oppidis se conferebat. Tot porro conciones conscripsit, quot tribus ut loquimur habendis quadragesimalibus sufficere possent, ut omnes mirarentur tantum ei potuisse suppetere temporis et otii, quantum necesse erat impendi in operosissima lucubratione. Cum autem sacro illo tempore concionabatur, haec fere erat temporis dimensio et rerum agendarum distributio. Summo mane concionem habebat tenniorum hominum atque agricolarum causa, quo maturius egredi ad opus possent. Paulo ante meridiem nova iterum concio, cui interesse cives solebant. A prandio autem pueris puellisque christianae fidei rudimenta tradebat. Feria vero sexta paullo ante solis occasum disserebat de passione Domini; tum feminis abire iussis, solos iterum viros alloquebatur, distributisque flagellis ferventissima concione eosdem ad poenitentiam excitabat. Quod supererat temporis, cibi, somni, quietis immemor totum audientibus insumebat confessionibus. Quae quidem vitae ratio uti non

multum aberat ab ea quam tenere in missionibus consueverat, ita fructu prope pari compensabatur.

XIII. Talis igitur cum esset p. Antonius Balducci, qualem hactenus descripsimus, longe lateque fama eius sanctitatis diffusa est, ut potens opere ac sermone summa apud omnes valeret auctoritate, et quidquid cuperet quod ad divinam gloriam et ad salutem conduceret animarum (nihil enim unquam concupivit aliud) obtineret. Hanc opinionem sanctitatis quae summa erat, auxit quoque Deus ac singularibus prodigiis confirmavit. Multa de eo narrantur supra naturae modum, quae ego hic strictim ac cursim persequar. Qui plura velit, adeat eius vitam luculentissima oratione a p. Francisco Maria Gallizio insignis sanctitatis viro conscriptam. Inter cetera illud non est silendum, quod et omnium voce celebratum fuit et celebratur adhuc, et multam ad servi Dei gloriam, plurimum vero contulit ad salutem animarum. Concionabatur verno tempore ad confertissimum populum ingenti protectus ulmo, et densis convestita frondibus; et cum multa ad ostendendam incredibilem eorum multitudinem qui morte obita sempiternum cruciandi in tartari barathrum detruduntur, graviter vehementerque dixisset, divino repente afflatus spiritu: *putatote, inquit, tot animas nunc in inferos prolabi, quot modo hac ex arbore folia decidunt*. Dicto citius folia omnia deciderunt, et spoliata ac nudata arbor horrendum toti populo exhibuit spectaculum. Hoc autem eo admirabilius visum est, quod et in reliquis arboribus quibus locus erat consitus, folia manserunt omnia et tale tantumque prodigium illo patratum est anni tempore, quo folia recens nata ramis tenacius haerent, nec ita facile ulla aut ventorum, aut tempestatis vi evelluntur.

XIV. Velitris cum sacras missiones haberet, Petrus quidam cui cognomen Herba, nna cum filio urbe egressi obvium habuere pastorem, cui cum multa de p. Antonio Velitris tunc agente commemorassent, qui hoc fieri potest, inquit pastor qui patrem noverat, si egomet nunc ab eodem digressus apud socios concionantem reliqui? Altercantibus nti fit, visum est ad litem dirimendam regredi eodem puncto temporis, ac vestigio in urbem, unaque pastorem deducere, qui ut patrem in ecclesia confessiones excipientem conspexit, haesit attonitus miraculo, nec alio modo composita lis fuit, quam quod eodem tempore et in nrbe et in agro inusitato genere prodigii geminatus versaretur.

XV. Prodigiiis etiam servi sui famam non semel asseruit Deus. Nescio quis malo utique daemone instigatus multa de eo de eiusque missionibus obloquebatur. Supplicationum praecipue quae haberi solent pompam carpebat: res huiusmodi ad popularem captandam auram inventas esse, nec nisi ad inanem quamdam speciem et vanam ostentationem valere; imagines vero quae animas aeternis cruciatibus addictas exhibent ostendi populo, vana esse simplicium ac rudium hominum terriculamenta. Haec aliaque huiusmodi homo improbus iactabat in sanctum virum. Talia iactantem non tulit Deus, et repentino apoplexiae ictu perculsum, merita affecit poena sic ut infelix simul et vivendi et obloquendi finem faceret.

XIV. Grandines vero et procellas paene in sua habere videbatur potestate, quae quidem saepe eorum agros populatae sunt, qui potiore agrorum quam animi culturam habentes, sacras missiones excipere renuerant. Contra vero eorum inusitata fecunditate locupletati sunt agri, qui se illi libenter sacris missionibus excolendos praebuere. Hoc cum saepe ac-

cidisset, ac iam plane constaret adventum sancti viri camporum ubertatem frugumque copiam afferre, vulgo a ruricolis excipiebatur libentissime, quocumque tandem anni tempore ad illos veniret, ne eo quidem excepto quo maxime operariorum manus atque assiduitatem, arva flagitant ac requirunt.

XVII. Prophetiae etiam spiritu afflatus fuit, et multa praedixit quae eventu suo non caruerunt. Nec vero curationum ei virtus defuit, multique a certissimo mortis discrimine atque adeo a lethi ipsius faucibus erepti sunt. Quid plura? in daemones etiam mirum exercuit imperium, ab obsessisque corporibus saepius abire iussit. Eliciebat daemonem a nescio quo, cum nequam spiritus ira percitus se duos in caelo sibi maxime adversarios habere exclamavit, Michaellem archangelum, et conditorem societatis; coactus huius nomen edere, multa prius recusavit, tum demum horrendum in modum infrendens *sanctum Ignatium*, inquit, editoque ut iussus fuerat Ignatii nomine confestim abiit.

XVIII. Atque haec de prodigiis dicta sint satis: nunc aliqua de eius virtutibus perstringamus. Flagrantissima in primis fuit in Deum caritate. Crebro illa usurpabat: *quid mihi est in caelo et a te quid volui super terram?* unum nempe Deum atque unicum cupere se ac velle declarans. Illa etiam sanctissimi parentis verba saepius iterabat: *amorem tui solum cum gratia tua mihi dones et dives sum satis*. Hinc zelus ille inexplebilis et cupiditas salvandarum animarum; hinc assiduum orandi studium, cui totum illud tempus quod reliquis supererat occupationibus impendebat. Orationis vero tempore, animo a rebus humanis evocato, in Deo unice conquiescebat. Hoc ipse orandi habitus indicabat; haerebat immotus, facies divino igne succensa flagrabat, ro-

rabant oculis ubertim defluentes lacrimae, crebri anhelitus atque suspiria. In itineribus fere socios anteibat, quo remotis arbitris coram Deo et cum Deo ambularet. Nactus solitudinem et ad divinum amorem camporum amoenitate invitatus, amor ipsi laxabat habenas et Deum incensissimis adspirationibus compellabat. In ipsis congressibus hominum nihil nisi de Deo aut de salute animarum loquebatur; quod si alius inferretur sermo, aut statim loquendi finem faciebat, aut si aliquid intersereret, aliud cogitare aliud loqui satis apparebat. Tanta denique aestuavit in Deum caritate, ut se non laboribus, quos ceteroquin immodicos tulit confici, sed animi aegritudine quam ex offensis in Deum capiebat, absumi confessus fuerit.

XIX. Post Deum divinam parentem impensissime dilexit. Eius cultum sacris in missionibus mirifice propagavit. Ad eum finem imaginem Deiparae puerulum Iesum in sinu gestantis, eo oris habitu qui peccatores in spem consequendae veniae erigeret, coloribus exprimendam curavit. Usus est opera pictoris admodum vulgaris, sed praeter expectationem nec sine prodigio opus evasit excellens. Imaginem hanc suis in missionibus circumtulit, hanc semper habuit secum et itinerum comitem et levamentum laborum. Serico locatam conopeo magna pompa publicae exponebat venerationi. Pompam augebant plurimae circumquaque collucentes faces; fiduciam vero ac spem tabellae votivae argenteae, quae pendebant magno numero, excitabant. Pater ipse testatus est nullam obstinatoribus peccatorum cordibus ad ea expugnanda vehementiorem machinam a se fuisse admotam, atque ita quidem, ut qui non adhortationibus, non minis, non ullo pacto emolliri ad poenitentiam poterant, solo illius sanctissimae

imaginis obiectu adspectuque commoverentur. Vix enim in sanctissimae parentis effigiem nequissimi homines obtutum defigebant, lacrimas tenere non poterant. Hoc adeo usitatum erat, ut idem ipse affirmare non dubitavit, si lacrimae quas sacrae illius imaginis adspectus exciverat, in unum locum confluiscent, lacum effici potuisse. Sic ille incredibile lacrimarum vim declarabat. Deiparae igitur post Deum quidquid sacris in missionibus prospere atque e sententia gerebatur, referebat acceptum. Nunc haec sacra imago colitur in aede nostra tusculana magnifico constructo sacello, et eleganti e marmore ad eam excipiendam excitata ara. Aurea quoque corona a capitulo basilicae vaticanae donata insignitur; qui honos celebrioribus tantum Deiparae Virginis imaginibus, et ant prodigiorum fama aut vetustatis commendatione illustrioribus habetur. Hic autem honos sacrae illi imagini non multo ante quam pater obiret, quod unice habebat in votis et ardentissime concupiscerat, decretus est.

XX. Iam reliquae virtutes huius sancti viri tot ac tantae sunt ut paucis complecti non possint. Animi demissione fuit singulari. Honores qui illi vulgo habebantur, si poterat declinabat, si secus excipiebat invitatus. Nobilium oppidorum lucem splendoremque defugit, contentus unice ignobilia obire oppida, vicos et castella, atque operam suam in rudibus infimique generis hominibus erudiendis ponere. Liburni, quod est oppidum et portus Etruriae celeberrimus ad tyrrhenum mare, cum feriis quadagesimalibus sacras conciones haberet, re male gesta (desertus enim prope ab auditoribus fuit in urbe ceteroquin frequentissima) laetatus est, ut nemo magis. Hoc non celavit modo sed etiam prae se tulit, atque hac in posterum excusatione usus est quo splendidissimorum oppi-

dorum frequentiam declinaret, illud affirmans se tantum tenuioribus ac infimae sortis hominibus idoneum esse et vicis solum castellisque obeundis uatum.

XXI. Hoc humilitatis studium paupertatis amore cumu-
lavit, quam veluti parentem suavissimam, ut a s. Ignatio
suis in constitutionibus praecipitur, dilexit. Pedibus uadis in
sacras expeditiones processit, detrita tunica, nullis sarcinis,
si sacram suppellectilem quam missionum usus requirit,
excipias. Cubiculum in quo Tusculi habitavit, nudum, hu-
mile, angustum, paupertatis ipsius domicilium videri po-
terat. Quod vero obedientiam attinet, in hac quoque virtute
excelluit. Superiores observabat, nec quidquam unquam extra
praescriptum eorum quorum se arbitrio permiserat, aut egit
aut aggressus est.

XXII. Afflictiones vero corporis praeter eas, quae a sa-
cro suo ministerio separari non poterant, multas ultro ac
sponte suscepit, utpote qui carui bellum prope exitiale in-
dixerat, ne adversus spiritum rebellaret. Postremo patientia
fuit tanta, quanta esse decuit apostolicum virum, qui fere
semper inter rudes ac iudociles populos versatus est, quorum
et ferenda fuit asperitas et mansuetudine lenienda feroci-
tas. Eius patientiae meritum non homines tantum auxerunt,
sed ipsi daemones cumularunt. Constat enim saepe malos
spiritus ira in eum a quo tot sibi eripi praedas ferebant aeger-
rime, excauduisse, et terrae afflictum miserandum in modum
fustibus verberasse. Saepe etiam, quod multo maiorem san-
cto viro molestiam creabat, cum de superiore loco verba face-
ret, concionem terculamentis atque praestigiis dissipare
conati sunt, sed irrita successu. Quo enim plus illi his aliis-
que veluti offeudiculis divinae gloriae cursum remorari cona-

bantur, tanto ille vehementius ad eam ubique sanctissimi parentis exemplo propagaudam incumbebat.

XXIII. His aliisque virtutibus egregie ornatus cum esset, et tot tantisque quot demonstravimus pro salute animarum defunctus laboribus, tandem ad vitae suae exitum perductus est, quem et ipse multo ante viderat et sibi instare diserte praedixerat. Etenim hoc anno qui postremus ei fuit, multo maturius solito egressus Tusculo, se non ad sacras missiones habendas sed ad mortem obeundam pergere affirmavit. Igitur cum in pago quodam Latii, cui Pophio nomen est, missionum causa versaretur, morbo corripitur, quo adhibita statim medicorum opera ita relevari visus est, ut omnes ei et medici ipsi recuperatam valetudinem gratularentur. Verum ipse qui se eo morbo extinctum iri certo sciret, medicis fidem non habuit, sed impensius se ad extremum diem pie sancteque obeundum parare studuit. Generali confessione apud patrem nostrae societatis, qui statim atque de eius morbo nunciatum fuerat Tusculo advenerat, conscientiam expiavit suam, seu verius innocentiam prodidit. Ut enim penitiores animi sui latebras scrutatus fuerit quo peccata omnia sacerdoti aperiret, nullam reperire vocem potuit quae quidem lethalis esset.

XXIV. Peracta confessione et ex improvise latentis morbi vi erumpente, sacrosancto Christi viatico refici voluit, quod singulari devotionis affectu suscepit. Tum ut sacra illa Dei-parae effigies de qua supra diximus, sibi in cubiculum deferretur postulavit; nihil enim optabat magis quam in conspectu dulcissimae parentis emori, atque adeo in castissimo eius siu extremum spiritum reddere. Delatam effigiem perinde excepit, ac si divina ipsamet parens aegrotantis cubiculum ingressa advenisset. Defixo in sacram imaginem obtutu,

eamque suavissimis verbis compellans, *monstra te esse matrem* iterabat; tum converso sermone ad puerum Iesum quem gerebat in sinu, o *bone Iesu*, exclamabat, *dulcis amor meus, ego morior pro te*. His aliisque similibus alloquiis agonem solabatur et Deo ac divinae Matri commendabat suum, donec sacro oleo inunctus, cum diu multumque cum morte luctatus esset, cum admirabilis praesertim patientiae in gravissimis cruciatibus documenta edidisset, intermortuis labiis suavissima Iesu et Mariae nomina saepius repetens, incredibili omnium qui aderant moerore vivere desiit die VII novembris anno MDCCXVII annos natus tres et quinquaginta, quorum triginta quinque sanctissime in societate exegerat, atque ex his viginti in sacro missionum ministerio impenderat.

XXV. Funus pro loci modo magnifice celebratum est, toto illud prosequente pago, et vicinis oppidanis ad idem honestandum turmatim confluentibus. Cadaver expositum in templo patrum s. Francisci quos reformatos vocant, omnium lacrimas clamoresque excivit, templo ipso gemitibus ac suspiriis personante. Iustis ecclesiae ritu persolutis, pictores plastaeque qui Roma advenerant, imaginem expressere. Dissecto cadavere cor mirae magnitudinis inventum est, quod in vitreo vase separatim a reliquo corpore adservandum seposuerunt. Corpus vero in eodem templo s. Francisci arca inclusum humatum est, qua post sex menses reclusa quo corpus ipsum in plumbeam inferretur, prorsum integrum illibatumque repperit fuit.

XXVI. Multa ab eo post obitum patrata miracula celebrantur, quae nos omittimus, et sedis apostolicae iudicio expendenda relinquimus. Speramus enim fore, ut probatis vir-

tutibus atque prodigiis, viro apostolico et de divina gloria
ac salute animarum insigniter merito sanctorum honores de-
cernantur. Eius imago ad vivum aeri incisa circumfertur cum
ellogio quod hic subiicimus.

VENERABILIS . DEI . SERVVS

P . ANTONIVS . BALDINYCCI . SOC . IESV

MISSIONARIVS .

HVMILITATE . CARITATE . ET . CVLTV . IN . DEIPARAM . INSIGNIS

NATVS . FLORENTIAE . XIX . IVNI . MDCLXV

SOCIETATEM . INGRESSVS . ROMAE . XXII . APRIL . MDCLXXXI

OMIT . POPHIS

VII . NOVEMBRIS . MDCCXVII.

V.

P. ANTONIVS THOMASINVS

I. P. Antonius Thomasinns nobili genere natus est Tipherni, quae est urbs ditionis pontificiae in Vmbria, anno, ab ortu Christi MDCXXXII die XX septembris. Patrem habuit Thomam Thomasinm et matrem Victoriam Fondaciam. Ferunt gravidam matrem cum in suburbanum forte divertisset partus dolore ex improvise correptam in stabulum secessisse, ibique partum enixam esse: quod ab omnibus tanquam bonum ac faustum omen habitum est. Aliis quoque indiciis Deus futuram Antonii sanctitatem declaravit. Nam quod de s. Nicolao bariensi legitur, feria sexta lacte abstinuit omnino, quod postea ieiunium toto vitae suae tempore religiosissime servavit; nihil enim aliud eo die ad cibum ac potum adhibuit praeter panem et aquam.

II. Ut primum per aetatem licuit patribus societatis in disciplinam datus est, ad eorumque scholas ventitavit: tum a patre Romam missus inter collegii quod vocant Fuccioli, alu-

mnos a p. Vincentio Carafa adlectus est. Sic eo in convictu se gessit ut post aliquot annos in societatem recipi meruerit. Itaque die XXIV maii MDCLIII ad tyrocinii domum se contulit, ubi se totum religiosae perfectionis studio dedit. Peracto tyrocinio, cum iam ante ingressum in societatem philosophiae studuisset, statim eius opera in erudiendis adolescentibus adhibita fuit. Docuit grammaticam Tibure et Romae; quo defunctus munere et theologiam auspicatus, eius cursum non sine ingenii ac doctrinae laude confecit.

III. Iam pridem animarum saluti se totum devoverat, certus quantum quidem in se esset, totum vitae suae tempus in sanctissimo opere insumendi. Quod optarat feliciter consequutus est. Vix enim confecto theologico cursu et sacerdos iam rite consecratus, a moderatoribus sacris missionibus destinatur. Primam omnium dioecesim aretinam excolendam accepit, in eaque veluti apostolici ministerii rudimenta posuit. Tum Fabrianum concessit, apostolico ac ferventissimo nostrae societatis viro qui ea in urbe versabatur, comes datus. Hinc evocatus Florentiam, vix tribus tertiae probationis mensibus confectis, iterum in aciem prodivit una cum p. Felice Barnabeo, qui maritimam Senarum oram felici successu et incredibili animarum proventu excurrerat.

IV. Inter haec solemnem quatuor votorum professionem emisit anno MDCLXVII die XV augusti. Verum cum iam nihil nisi sacras missiones cogitaret, praeter expectationem Senis consistere iussus, primum humaniores litteras ea in urbe docuit; tum in formandis bonis moribus ac pietate nobilibus collegii Ptolemaei convictoribus addictus operam impendit. In utroque munere mire probatus egregie tum nostris tum civitati satisfecit, et praesertim nobilissimis feminis Olimpiae

et Virgiuiae Ghisiis, quæ eum sibi animi moderatorem adlegerat. Sed has ob causas et præcipue ob susceptum earum femiuarum regimen, parum abfuit quin omnino a sacris missionibus quas uice spectabat avocaretur. Neque vero non hoc tempore breves aliquot in proximam maritimam oram tentavit excursus, non miuore animi sui voluptate quam proximorum utilitate. Sed tandem aliquando Deo adiuvante omnibus solutus viuculis pedicisque expeditus libere exsultare potuit, et quod ardentissime concupierat est consequutus.

V. Facta igitur a moderatoribus potestate et acceptis apostolici muneris insignibus gratisque Deo actis, exiliens ac gestiens periude Senis discessit, ac si a tetro ac tenebricoso carcere eductus atque in libertatem viudicatus fuisset. Magna animi alacritate ac fervore munus exorsus sacrum, in eo ad extremam usque atque adeo decrepitam perstitit senectutem, illud solitus a Deo quotidianis precibus efflagitare ut in suscepto ministerio vitam absolveret. Saepius affirmabat se tria tantum a Deo exposcere: *Deum* nempe *ipsum*, *sacras missiones* et *salutem animarum*: se his tribus contentum esse, nec præterea quidquam aliud cupere ac desiderare. Quare nihil ei grātius accidere poterat quam ut crebris litteris ab episcopis eius opera exposceretur; quod cum crebro fieret nihil unquam causatus est, quin statim eo quo vocabatur se couferret, nunquam laetior atque hilarior quam cum uovi labores pro diuina gloria ac salute animarum suscipiendi proponebantur.

VI. Ac primo quidem cum socio in campum prodire cousevit, more iam apud nostros recepto, cui etsi quantum poterat parceret, eiusque valetudinis curam miuime negligeret, tamen eo brevi res redacta est, ut nemo inueiretur qui

tantam contentionem ferre se posse confideret. Itaque sibi fratrem ex adiutoribus socium dari postulavit; verum cum ne hic quidem sibi ubique praesto esse posset, ad extremum impetrata a moderatoribus venia, unum aliquem e saecularibus sacerdotem secum edncere instituit. Quem morem postea retinuit semper, illud praecipue spectans, non iam habere secum consortem muneris, sed actionum suarum testem.

VII. Ex hoc autem colligi potest, quantos quamque immensos pro divina gloria labores vir hic apostolicis tolerarit, qui multorum vires fregit, ac solus tot annos enns longe gravissimum portavit. Nulla pars anni labore vacabat. Labor laborem excipiebat. Nulla quies, otium nullum, nulla cessatio. Ab uno ad alium vicum properabat, ab una ad aliam festinabat urbem. Nulla unquam tanta fuit caeli intemperies, quae eum ab itinere deterroerit. Pluvias, nives, procellas, ventorum vim, fervorem aestatis algoremque hyemis atque omnia contempsit semper: illud usurpans, qui harum rerum rationem habendam duceret apostolico muneri non esse idoneum. Feriis quadragesimalibus, quibus non in urbibus modo, sed in vicis atque castellis divini verbi pabulum satis large populo ministratur, quo quidem tempore in tanta concionatorum copia otium ei aliquod dari atque concedi videbatur, nunquam tamen quievit nec tempus sibi illud ad otium datum atque concessum unquam existimavit. Quare pluribus in urbibus quadragesimali tempore conciones habuit non sine ingenti animarum fructu. Quod supererat a concionibus tempus totum confessionibus excipiendis impendebat. Velitris cum esset quamquam repente febri correptus, non eo tamen die a concionando abstinere voluit, sed more solito concionem

habuit; qua absoluta, quod amicis eum a concionando dehortantibus ante praedixerat, convaluit.

VIII. Sed ut de sacris eius missionibus paullo accuratius disseramus, in iis habendis non eandem semper methodum tenuit, sed pro loco ac tempore, quam magis e re ac divina gloria iudicavit, secutus est. Simili divinae gloriae studio non habuit definitum aliquod in uno separatim oppido stationis tempus, sed in eo tamdin persistebat quamdiu res ac necessitates postularent. Ubi vero stationem fixerat, conciones habebat quotidie, quotidie summa christianae doctrinae capita singulos edocebat, eadem saepius inculcabat, singulorum audiebat confessiones, atque ita vico toto exulto ac probe subacto ad alium vicum progrediebatur. Atque hoc modo totam maritimam Senarum oram, quam longe lateque pertinet, peragravit. Hoc item modo Clusentinum et Alpes et regionem quam Arsenatam vocant, saltuosam et asperam obivit, singula lustrans castella vicosque singulos adiens, quorum plerique abdit in silvis aut inaccessi summis in rupibus quemcumque deteruissent, qui par animi robur et divinae gloriae studium non attulisset. Ad hoc accedebat aliud incommodum longe gravissimum, quod aestivo praesertim tempore ora Senarum maritima sine vitae discrimine adiri non potest. Hoc autem discrimen vir apostolicus numquam non contempsit, nihil sibi optatius evenire posse existimans quam si tam pia ac iusta de causa mortem oppetere contigisset.

IX. Iam vero quantum quamque copiosum et uberem fructum ex sacris missionibus collegerit vir hic apostolicus, non est huius nostrae brevitatis singillatim persequi atque exponere. Illud universim dici potest, messem plerumque respondisse culturae, quae cum talis esset qualem supra de-

monstravimus, non poterat non magnos proventus afferre. Incredibile enim dictum est quantum sancti viri ad salutem animarum industria illa indefessa conferret, qua non solum singulis oppidis, sed singulis prope oppidanis operam suam impendebat. Neque enim satis habebat omnes generatim erudire, sed ab unoquoque eorum quae tradebantur rationem exquirebat. Eadem semel, iterum, tertio inculcabat, nec ante quamquam dimittebat quam probe edoctus esset ea quae ad animi salutem pertinent. Simili modo se gerebat in excipiendis singulorum confessionibus, nihil eorum praetermittens, quae quibusque accommodata ad excitandam veram sinceramque peccatorum contritionem valerent. Hac exquisitissima usus diligentia, fructum non solum percepit maximum sed etiam, quod caput est, eundem perennavit. Itaque cum ex itinere vicos a se ante aliquot annos exultos adiret, non sine magno animi sui gaudio et accolae probe eruditos in christianae fidei dogmatis, et mores ad omnem christianam moderationem exactos compositosque invenit: uno verbo tales, quales ipse fingendos formandosque curaverat. Quod cum illi saepius accidisset, sua ipse edoctus experientia animum numquam induxit ut quam susceperat stationariae, ut ita dicam, missionis methodum commutaret.

X. Neque vero, quamquam p. Thomasini missiones non multum strepitus ac fragoris haberent, non insignes peccatores excitarunt ad poenitentiam. Nescio quis eo nequitiae processerit, ut non modo medicinam omnem respueret sed phreneticorum more in medicum ipsum insaniret. Itaque maledictis atque omni probrorum genere sanctum virum coepit impetere; nec vero ipsum solum sed societatis institutum pessimis modis proscindere ac calumniari. Hic igitur subito oppressus

morbo et in summum vitae discrimen adductus, praeter expectationem patrem evocat in eoque spem omnem suam secundum Deum se collocare affirmat. Quae iecerat in eum ac totam societatem maledicta damnat, tanta demum contritione confessionem suam peragit, quam ante annos triginta non obierat, ut cum bona spe impetratae a Deo veniae et consequendae salutis aeternae decesserit.

XI. Alium quoque horum e genere hominem, non solum Deo sed societati cui erat infensissimus, amicum reddidit p. Thomasinus. Iuvenis erat quidam nobili stirpe et magna apud principem virum gratia. Quo erat erga societatem odio capitali, eius nomen maledictis ac calumniis omnibus quae ab impotentis animi acerbitate suggerebantur, incessere non dubitabat. Incidit, Deo sic disponente, in p. Thomasinum, cuius caritate ac patientia ita delinquitur est, ut aegre admodum contineri potuerit quin coram immensa populi multitudine maledicta eiraret sua. Hoc facere prohibitus, domi patrem convenit eiusque pedibus provolutus magno cum gemitu veniam ab eo petiit, quam quidem se ab universa societate, si adesset, coram petiturum fuisse affirmavit. Tradidit insuper patri proscindendum flammisque abolendum pestiferum quemdam libellum maledictis in societatem refertissimum, unde odium illud hauserat quod tanto cum animi sui damno et audientium scandalo effuderat.

XII. Cum in urbe quadam Vmbriae sacras magna populi frequentia missiones haberet, unus adfuit qui praeterquam quod concubinae laqueo constrictus tenebatur, se diabolo devoverat. Sancti viri concionibus homo pessimus ad poenitentiam excitatus, sanctum virum domi convenit et multis cum lacrimis peccata confessus devotionem illam suam exsecratus

est. Accidit autem non multo post, ut lethali morbo correptus decumberet. Aderat aegrotanti continuo pater ne in summo discrimine miserum desereret, abigeretque malum daemone, si forte ius suum repetiturus accederet; et vero accessit minitabundus, sed frustra: coactus discedere et praedam quam spe devoraverat, relinquere. Abscedente daemone, nescio quo irrepens pacto malo daemone peior mulier, quaecum pravam habuerat consuetudinem successit, multis lacrimis se desertam conquerens. Haec quoque ab ipso constanter eiecta fuit. His defunctus periculis, praeter expectationem morbi vi remittente convaluit, et memor accepti beneficii reliquum vitae suae tempus in divina exoranda clementia placandaque iustitia consumpsit.

XIII. In dioecesi collensi meretrix fuit nequitia sua ac improbitate insignis. Hanc cum forte Patris concionibus adesset, tantus divinae iustitiae timor perculit, ut repente e turba prosiliens peccata sua non flere solum ac detestari coeperit, sed eadem adstante infinita populi multitudine, palam confiteri non erubuerit. Deo reconciliata longe aliam vitae rationem iniit. Non solum non rediit ad vomitum, nec se pristinis unquam sordibus inquinavit, sed adeo puriter vitam instituit, ut virginum ipsarum castimoniam aemulari studuerit. Eius postea confessiones excipiens p. Thomasinus tantam innocentiam animique candorem satis demirari non poterat, praesertim in femina quae tot annos in foedissimis sordibus miserandum in modum iacuisset.

XIV. In placandis inimicorum animis tollendisque dissidiis, quod est aliud emolumenti genus quod percipi ex sacris missionibus solet, insignis ac plane singularis exstitit p. Thomasini felicitas. Eserat capitale odium inter duos, nec in-

terposita principum virorum opera restingui poterat: illud nullo negotio restinxit pater Thomasinus, et electus a dissidentibus arbitrio omne dissidium sustulit et utriusque animos firma stabilique pace coniunxit. Graviter quidam fuste percussus in omnem perdendi percussoris occasionem imminabat, et quo vehementius ad vindictam incitaretur, fustem ipsum omni studio quaesitum apud se retinebat. Ubi hoc rescivit Pater, statim hominem adiit, iratum demulsit, caritate ac mansuetudine sua pervicit adeo, ut et inimico conciliavit, et fustem ipsum acceptae iniuriae monumentum atque incitamentum odii abstulerit. Concionem de pace inimicis exhibenda cum haberet ad populum, nescio quis repente profugit, veritus ne sancti viri oratione commotus ad pacem compelleretur. Sensit fugam Pater et causam non inani coniectura assequutus, absoluta concione ut erat totus sudore diffuens, hominem domi abditum convenit, blandis appellat verbis, obtestatur, obsecrat. Quid multa? pacem extorquet non solum, sed hominem ad concionem quae nondum dilapsa erat retrahit, et coram populo inimico conciliat. Mutui amplexus, lacrimae ubertim fusae conciliatae pacis indicium minime dubium fuerunt.

XV. Distractus erat clerus in quadam Etrusiae urbe in factiones duas. Saeviebant utrinque animi prope ad internecionem: populi autem scandalum huiusmodi consequebatur, quod coniectare licet. Omnem lapidem frustra moverat episcopus, ut tam exitiale dissidium tolleret sed nullae pacis conditiones audiebantur, imo pacis ipsius nomen efferati animi exhorrebant. Unum in uno p. Thomasino huic malo remedium constituitur, quod si frustra fuisset adhibitum, actum esse de salute dissidentium ac conclamatatum vulgo

pronuntiabant. Itaque evocatur Pater: summo concursu habentur missiones, pari commotione populi; nulla vero cleri cuius praesertim gratia illa missio habebatur. Ad extremum habita a Patre concio de pace fuit: hanc tanta tamque inusitata populi animorum concitatio consequuta est, ut perturbatis ordinibus suum quisque inimicum in confusa illa multitudine quaeritaret, invento in collum rueret, multis cum lacrimis pacem exposceret, oblatamque mutuis amplexibus atque osculis firmaret. Tanto spectaculo quod vel saxea corda potuisset scindere, nihil animi cleri dissidentis commoti sunt. Itaque de pervincenda edomandaque tanta pervicacia iam desperabatur: verum ne quid intentatum relinqueretur, e re visum est remoto populo separatim ad clerum ipsum habere sermonem: atque ita factum, multis quamquam e clero ipso id aegre ferentibus ac tumultuantibus. Hic enimvero obstinatissimi animi amplius resistere non potuerunt, et orationi ferventissimi Patris cedere coacti sunt. Exortus utrinque clamor pacem veniamque inclamantium, lacrimae, suspiria, amplexus. Ne longum faciam, firmata pax fuit iis quas episcopus aequissimas proposuerat conditionibus. Festo acris campani sono laetitiae signum e turri editum, quod incredibili laetitia a tota civitate exceptum est, et tandem Deo bene iuvante scandalum perniciosissimum gravissimumque sublatum est.

XVI. Pari felicitate ac successu alia quoque gravissima scandala sustulit. Quodam in pago die sacratissimo Christi corpori festo mos obtinebat, ut puellae flores de fenestris iacerent et praetermeantes amasios conspergerent. Gravissima evocione tantam licentiam coercuit p. Thomasinus, effecitque ut flores illi non modo non iacerentur in posterum, sed ad

ecclesiam ornando Christi simulacro deferrentur. Hoc autem quam Deo gratum fuerit miraculo comprobatum est. Nam cum sequenti die horribilis grando decidisset qua passim agri devastari debuissent, non modo eos saxea grando non laesit, sed ne frondem quidem unam arboribus decussit. Pari concione earum mulierum inverecondiam compressit, quae prodire in publicum prope nudato pectore consueverant. Pessimum hunc morem ubicumque fuit, et graviter increpuit et funditus sustulit. Nec vero satis habuit illud libidinis incitamentum tollere, sed praeterea obtinuit ut feminae non nisi collo tenus velo obtectae domo prodirent.

XVII. His de causis vulgo ab episcopis eius opera expetebatur, cuius industriam noverant, et prosperos apostolici eius zeli successus non ignorabant. Nunquam vero et maiorem operam adhibuit et feliciorem eventum sortitus est, si felicitatem rei difficultate aestimare velimus, quam in componendo quodam virginum sanctimonialium coenobio. Hae defecerant omnino ab instituto, aliam iniverant vivendi formam feminis Deo sacris prorsus indignam; homines vero societatis incredibilem in modum aversabantur in quibus episcopus spem collocarat suam, et praecipue in p. Thomasino, cuius industria plurimum confidebat collapsam posse restitui disciplinam et virgines illas ad officium reduci. Ubi rescitum est a sanctimonialibus, episcopum cogitare uti opera nostrorum hominum, omnes vehementissime repugnarunt. Cedendum tempori existimavit p. Thomasinus atque expectandum, dum se mollior praeberet opportunitas. Verum cum hac super re Deum consuleret, sibi vocem quodammodo audire visus est, qua ei divinum iudicium denuntiabatur, si occasionem oblatam conciliandi Deo tot sacras virgines sibi e

manibus elabi sineret. Hac denuntiatione perterrefactus Pater sine cunctatione negotium aggreditur. Itaque coenobium adit, quae mandata habebat ab episcopo exponit, preces adhibet, demulcet animos et non sine prodigio impetrat omnia quorum causa veuerat, rebusque ex sententia episcopi et sanctionum compositis, abiens magnum sui reliquit desiderium, nec minorem de societate existimationem.

XVIII. Multo maioribus obseptum difficultatibus aliud sacrum virginum coenobium fuit, quam ut facili negotio adiri posset. Collapsa prorsus iacebat disciplina regularis, gravissimi irreperant abusus et effrenata licentia monasterium totum occuparat. His incommodis accedebat summa ab hominibus societatis aversio, quorum uel nomen quidem ferre poterant. Contra episcopus pro sua erga societatem benevolentia hos esse uicos qui tanto malo remedium afferre posset existimabat. Eorum itaque opera uti decrevit: evocatoque p. Thomasino ei negotium dat, videat quid fieri posset ut res e sententia conficeretur. Interim moniales clam submittere exploratores ad alia sacrarum virginum coenobia, ad quae accessisse iam Patrem acceperant, ut de Patris ipsius moribus cognoscere ac referrent. Hi quod erat et ipsi comperebant renuntiant, virum esse sanctum, incredibili lenitate ac mansuetudine. His renuntiationibus aliquae flecti, non tamen omnes: quaedam ceteris pervicaciores manebant in sententia excludendi omnino iesuitam a coenobio. Ubi primum hic aditus patuit, rem tentandam existimavit Pater. Adit igitur coenobium et sacras illas virgines more illo suo modestiae et lenitatis plenissimo adloquitur et tantum primo congressu proficit, quantum optari vix poterat. Et vero rem confecisset, nisi una reliquis pervicacior obstitisset. Haec enim pravae con-

suetudinis laqueo irretita, nihil ferebat aegrius quam ut regularis disciplina restitueretur. Quae quidem ubi sensit rem prope confectam omnium fere monialium consensione, omnem lapidem movere non destitit, donec unamquamque sororem prensando et singularum cubicula adendo ad triginta in suam sententiam pertraxit. Ipsa vero publice profiteri non exhorruit, se prius inferos adituram quam ut animum induceret, peccata apud patrem confiteri sua. Accidit autem ut per eos dies sanctae Theresiae vita in triclinio legeretur et Deo sic disponente illud incidit caput, in quo praeclara de societate sanctissimae illius virginis testimonia recensebantur. His auditis tanto exarsit furore, ut si libri potestatem habuisset illum utique discerpere non dubitasset. Verum illa lectio ei saluti fuit; ut se ab illo subito furore collegit, melioribus consiliis locum dedit et paulatim divina operante virtute ad sanitatem rediit. Eiuravit quae male iactaverat, et sui victrix quas a p. Thomasino sorores abduxerat, ad eundem exemplo suo reduendas curavit. Itaque prior adit Patrem, multis cum lacrimis veniam implorat et omnes conscientiae maculas illi detegit et sincera confessione abstergit. Reliquae eius exemplum sequutae sunt; atque ita omnia scandala de monasterio sublata, domestica disciplina restituta, unaque cum ea omnia bona reddita, quae regularum observantiam consequuntur. Hoc modo res quae difficillimum atque implicatissimum exordium habuerat, secundo ac felicissimo exitu explicata fuit.

XIX. Sed iam aliquid de eius virtutibus dicamus. Ardentissimo imprimis animarum zelo flagravit, quod ex dictis colligi satis potest. Iam diximus, quot quantosque quamque incredibiles tolerarit labores, qui utique multos oppressissent

nisi opportuno consilio provisum esset. Hinc primum socios, alios subinde atque alios mutare, tum omnino relinquere coactus est. Nemo enim reperiebatur cuius tantae essent vires, quem labor ille assiduus atque immodicus qui ab eo alacriter ferebatur non frangeret.

XX. Iam vero labores qui necessario in sacris missionibus suscipiendi sunt, voluntariis corporis sui afflictationibus cumulavit. Duriter admodum sustentabatur parcens potui atque cibo usque ad inediam. Toto fere anno ieiunabat ac coenare solitus, prandio abstinebat. Ad coenam porro nihil fere aliud adhibuit, nisi pulmentum ex pane cocto berbisque confectum. Somno brevissimo contentus totam fere noctem orando extrahebat. Neque vero flagris ac flagellis pepercit, imo se horrendum in modum cecidit. Nullus erat plagarum modus, nullum laniationis definitum tempus ut quandoque psalmi poenitentiales ante absolvi possent, quam ipse a verberatione cessaret. Flagellis autem neque semel in die, sed saepius se cruciabat: neque tantum privatis in aedibus, sed etiam in publico foro in peroratione concionum ad commovendos excitandosque ad poenitentiam auditorum animos. Nudis fere semper incessit pedibus saepe offendiculo discerptis. Hoc modo incedens montium cacumina superabat, atque in ipsa apennini conscendebat iuga; mirantibus incolis hominem sic posse incedere per asperas ac salebrosas vias, quando ipsi ferratis calceis uterentur, necessarium contra acutos scopulos silicesque munimentum.

XXI. Iam vero de paupertate nihil dicam, quae satis vel ex ipso corporis indumento apparebat. Detrita vestis et saepe lacera. Nactus cubiculum aliquanto instructius quam eius ferre paupertas posset, illud prorsus nudavit, ea tantum re-

linquens quae necessitati negari omnino non poterant. Obedientiae quoque eximins cultor fuit : nihil nisi ex superiorum licentia aggressus est atque in omnibus eorum semper exquisivit voluntatem. Castimoniae fuit tantae, ut vel ipso adspectu ad eius virtutis amorem intnentes alliceret. Quod ad religionem attinet, singulari pietate complexus est sanctissimam Dei parentem; illam non alio nisi matris suae vocabulo appellabat. Inter ceteros sanctos eximie coluit s. Franciscum Xaverium, quem non solum advocatum sibi adoptarat, sed tamquam exemplar imitandum sibi proposuerat. Eius invocato nomine multos sanitati aegrotos restituit. Singulari affectu devotionis in sacrosanctum Encharistiae sacramentum ferebatur. Cnm divinum missae sacrificium celebraret totus lacrimis diffinebat. Praeter has quas diximus virtutes quae sanctitatem constituunt, alia sanctitatis indicia in patre Thomasino minime desiderata sunt. Inter concionandum caelesti circumfusus lumine visus est. Interdum etiam elatus a terra cnm nocte quadam in ecclesia solus oraret.

XXII. Multa praedixit quae eventu suo non caruerunt. Inter cetera sibi duos etiam nunc superesse vitae annos p. Ambrosio Centurionio provinciae praeposito diserte scripsit; et quod praedixerat evenit. Cum gravi morbo decumberet, hospitesque unum aliquem e nostris qui morienti adesset, ex proximo collegio evocandum censerent, id minime necesse esse affirmavit, quia *nondum*, inquit, *venit hora mea* : et vero contra omnem expectationem convaluit. Cum res aliquando minus e sententia in missionibus procederent, multa interminatus est quae eventus non fefellit. Hinc mirum in modum erga sanctum virum apud populos aucta veneratio est, quae fiebat ne quid admitterent, quod Patri displiceret et sacrarum

missionum fructum interciperet. Contra preces saucti viri certatim expetebantur. Cum quodam in oppidō Piceui uou mediocris futurae caritatis iniectus esset timor, eius apud Deum efflagitata oratio est. Postulatis auuuit Pater et tum pluuiam sequuturam praedixit cum oppido pedem extulisset. Dies profectionis adueit et multis oppidauorum millibus comitautibus discessit. Vix aliquautum processerat, ingeus pluviae vis consequuta est quae Patrem uuaque comitatum omuem regredi in oppidum coegit.

XXIII. Abdita quoque cordium penetrauit. Illud documento sit quod solus cum solam mulierem iu ecclesia orantem forte conspiciatus esset, ad eam accedeus, *utere*, inquit, *opportunitate*, *confitere peccata quae admisisti gravissima*. Hac denuuntiatione perterrita mulier ad eius pedes accidit et maculas conscientiae suae salutari confessione abstersit. Quod autem ad gratiam quam vocat curationum attinet, multos ab eo accepimus sauitati restitutos, non precibus tantum sed earum rerum usu quae ad ipsum aliquo modo pertiuerent. Hiuc paupis quae ei supererant reliquiae clam subducebantur et diligentissime servabatur: aqua ipsa qua manus abstersisset iu pretio habebatur, propterea quia multi illam iu morbis salutarem experti fuerant, eaque pota valetudinem recuperauerant.

XXIV. Sed reliquum est, ut quam brevissime eius mortem exsequamur. Correptus morbo in quodam oppido seuensis orae maritimae cui uomen Saxo: vix decubuit socio ad se vocato, *moriendum est*, iuquit, *iam venit hora mea*. Et saue advenerat, quamquam medici de eius salute miuime desperareut. Igitur siugulari devotione sumptis ecclesiae sacramentis, horam illam ipsam quam praedixerat, pleno in

Deum fiduciae animo opperiebatur. Paulo ante quam moretur ad socium conversus *obsecro*, inquit, *ut corpus meum terrae mandes et congestis saxis aliquot contumules, vereor enim ne inhumatus relinquer.* Adeo de se demisse vir sauetissimus sentiebat, ut qui omnibus benefecerat, defuturum existimaret qui tenue illud pietatis officium quod omnibus impenditur corpori suo praestaret. Haec aliaque huiusmodi identidem iterabat quae et animi demissionem singularem ostendebant, et adstantium lacrimas eliciebant. Tandem post acerbissimos dolores patientissime toleratos, senio morboque confectus, coniectis in caelum oculis excessit e vita die III martii an. MDCCXVII annos natus LXXXV nondum expletos, quorum LIII in sacris missionibus exegerat.

XXV. Quem vivum populi venerati sunt, pari honore mortuum atque adeo multo maiori habuerunt. Exsequiae solemni pompa celebratae sunt: conveniente ex oppidis vicisque proximis infinita populi multitudine. Pro concione laudatus est a p. Seraphino Giardonio abbate cisterciensi. Absolutis exsequiis de cadavere certatum est. Oppidani sibi sacrum illud pignus eripi aegre patiebantur, senenses repetebant et collegio nostro deberi affirmabant. Crassetum vero quae est urbs princeps illius orae maritimae, illud sibi suo iure vindicabat. Certaminis palmam Crassetum tulit, quam in urbem sacrum cadaver illatum est, relictis tantum intestinis ut essent Saxi oppidanis solatio. Ut Crassetum appropinquavit magnificentissima pompa exceptum est, obviam prodeunte tota civitate, militari praesidio, religiosis ordinibus, clero universo, ipso denique episcopo pontificiis vestibus induto. Exsequiae iterum celebratae sunt; tum separatim in arca clavibus sigillisque munita depositum cadaver est et in

aede maxima tumultum. Multa narrantur prodigia quibus Deus servi sui sanctitatem multis modis confirmavit. Post annos duos arca reserata est, cadaver inspectum et non sine admiratione intactum repertum. Hac ipsa occasione additum elogium marmoris insculptum impensis Ioannis Baptistae Petracelli, qui p. Thomasini multos annos in sacris missionibus comes fuerat eumque singulari veneratione prosequabatur. Ellogium autem est huiusmodi:

OSSA

P. ANTONII. THOMASINI. TIPHERNATIS

SOCIETATIS. IESV

QVI. MAXIMIS. ASSIDVISQVE. LABORIBVS

IN. PROCVRANDA. ANIMARVM. SALVTE

PER. QVINQVAGINTA. ET. VLTRA. ANNOS

STRENVE. TOLERATIS

AC. SENIO. TANDEM. CONFECTVS

IN. OPPIDO. SAXI. MARITIMI

RELIGIOSISSIME. OBIIIT

CRASSETVM. TRANSLATA

IN. HOC. TVMVLO. CLAVDVNTVR

DIE. VI. MARTII. AN. MDCCXVII

VI.

P. FRANCISCVS MARIA GALLVZIVS

I. Recentiora nobis edidit exempla et singularis innocentiae et apostolici zeli p. Franciscus Maria Galluzius. Natus est Florentiae anno ab ortu Christi MDCLXXI die IX ianuarii: patrem habuit Iacobum Galluzium patritium volaterranum et egraginum iurisconsultum; matrem vero Alexandram Pignoriam ortam nobili apud florentinos familia. Infans vitae discrimen adiit, sed divino praesidio liber periculo evasit. Parentes coniunctis studiis non liberaliter modo sed etiam pie educarunt: ipse vero qui docilem nactus erat indolem, egregie educationi respondit. Propositis sibi s. Aloisii Gonzagae exemplis, eius innocentiam non solum sed etiam abstinenciam studuit imitari. Parce admodum vescabatur; non raro solo pane et aqua contentus ieiunabat. Surgebat interdum e lectulo intempesta nocte, et quod furabatur corporis quieti tempus impendebat orationi, solitus etiam se flagellis caedere et catenulis ferreis sibi lumbos praecinge-

re. His rebus factum est ut cum scholas societatis Iesu celebraret, et satis pro aetate in litteris profecisset, nostrorum consuetudine illectus de ipsa societate ineunda cogitavit.

II. Verum eius votis intercessit pater et distulit facultatem; sed dilata facultas fervidi adolescentis auxit cupiditatem. Non defuit interea qui eius constantiam labefactare aggressus multa in societatem Iesu ore impuro evomere non dubitavit, sed irrita conatu: neque enim pium adolescentem de sancto proposito movit, sed potius in suscepto consilio confirmavit. Itaque ardentius quam antea et optare societatem, et vehementius pro facultate impetranda patri supplicare coepit; qua tandem extorta se ad romanum tyrocinium contulit et XXIV maii MDCLXXXVIII in pervigilio nempe sanctae Mariae Magdalenae de Pazzis quam singulari cultu prosequabatur, inter tyrones cooptatus est.

III. Iam exorsus novum vitae genus, iis comparandis virtutibus se dedit quae a sanctissimo parente Ignatio requiruntur ab alumnis suis, quo sibi et aliis prodesse possint. Nuncupatis votis, decursis philosophiae spatiis, perfunctus item docendi munere et postea theologiae confecto curriculo, sacerdotio iam initiatus ac denique absoluto tertiae, quam vocamus, probationis anno, emissaque tandem quatuor votorum professione, cum se in tanta munerum varietate ita gessisset ut sibimet constasset semper, dignus habitus est qui gravioribus muneribus admoveretur.

IV. Docuit itaque primum philosophiam in collegio praetensi, tum Romam evocato concionatoris munus in oratorio s. Francisci Xaverii deferretur. Atque hoc quidem oratorium abunde p. Francisco suffecit, unde incredibilis eius zelus et insatiabilis quaedam divinae gloriae propagandae cupiditas

et veluti fames expletrnr. Est enim ita institutum, nihil ut ad Dei gloriam ac salutem animarum conducat, quod non faciat sibi proprium. Conciones per compita ac urbis fora diebus festis, singulis vero diebus nocturnae conciones vel colloquia in ipso oratorii templo habentur. Tota intra anni curriculum sacris missionibus lustratur nrbs, suo quibusque nrbs regionibus mense assignato quo illa praecipue regio excolitur. Nec vero interea carcerum ac valetudinariorum omittitur cura. Ad haec sodalitiis plurimis abndat et sacerdotnm et opificum, in quibus propria quibusque ac peculiaris adhibetur institutio. Uno verbo, tanta est sacrarum exercitationum tamque apta ac colligata connexio, ut illis sibi perpetno succedentibus, ne hora quidem diei propemodum una vacua sit et immunis.

V. Igitur vir Dei qui divinae gloriae amplificandae studio ardebat, oblatnm munus non accepit solum sed arripuit. Conciones habebat quotidie ad confertissimam multitudinem, quam et sanctitatis opinio et eximia quaedam eloquentia quae valebat plurimum, illi nunquam non attraxit. Correcti eius concionibus multorum mores, mnlti e vitiorum coeno educti, et nonnulli quorum prope desperata animae salus videbatur, a sempiterno interitu vindicati. Verum minime confectns quotidiani concionatoris munere aliud quoque catechistae sibi sumpsit, atque nrbs regiones una cum sacra missione obiens, rndem plebem quae magna frequentia cogi solet christiana doctrina instituendam suscepit. Porro utrumque gravissimi muneris laborem excipiendarum confessionum assiduitate cummulavit. Atque haec quidem tanta fuit, quanta dici aut credi vix possit. Excipiebat omnes indiscriminatim singulari benignitate; nulla utebatur excusatione aut intempestivi tem-

poris aut tuendae valetudinis. Saepe totus sudore diffuens statim ab ipsa concione ad sacrum tribunal pergebat ibique tandiu commorabatur, dum confluentium multitudini faceret satis.

VI. Haec strenue cum ageret vir apostolicus, aliam de proximis bene merendi occasionem ei obtulit Deus. Concussa fuit per id tempus ingenti terrae motu Nursia, quod est oppidum s. patris Benedicti incunabulis longe nobilissimum. Nursiam Clementi XI visum est hominem mittere, qui afflictam tanta calamitate civitatem recrearet, et salubriori motu illorum civium animos ad poenitentiam concuteret. Missus itaque est p. Galluzius, de cuius virtute singulari ac satis spectato apostolico zelo magnam Pontifex habebat existimationem. Iniunctam provinciam suscepit Pater alacri animo, et valde incommodo usus itinere, viis glacie nivibusque concretis, eo tandem quo missus erat pervenit. Quanto illorum civium gaudio exceptus fuerit tamquam a caelo legatus, quanta ibi ad Dei gloriam ac salutem animarum gesserit, coniectare licet, exponere non licet, propterea quia et ipse omnia silentio pressit, et non multo post ingravescentis terrae motus urbem illam totam oppressit.

VII. Reversus Romam locum quem eius discessus vacuum fecerat, ab altero occupatum offendit cui concionatoris munus superiorum voluntate delatum fuerat. Hoc aegre admodum tulit Pater. Verum non causas novi consilii curiose investigandas existimavit, sed munus sibi carissimum alteri delatum peccatis unice propriis adscribendum censuit.

VIII. Verum in hoc ipso divinae providentiae consilium eluxit, quae sanctum virum externorum auditorum qui magna frequentia collegii romani scholas celebrant saluti de-

stinarat. Auctus igitur novo munere florentissimam illam iuventutem modis omnibus excolendam suscepit. Illud vero dici potest, ex tot adolescentibus, si non omnes, incredibilem certe eorum numerum, sibi illum conscientiae suae arbitrum ac moderatorem elegisse. Uti, vero potuerit unus tam multis sufficere ex eo credibile fit, quod apostolicus Pater nullam prope diei horam labore vacuum sibi fecerat. In sacro poenitentiae tribunali sedebat assiduus, quod fere semper adolescentium turba stipatum erat ac circumsessum. Incredibili patientia et animi lenitate affluentes iuvenes excipiebat. Nullum in eo taedii aut defatigationis indicium observare erat, perinde quasi non a diuturno labore fessus, sed a quiete semper atque otio recens esset.

IX. Atque huius quidem assiduitatis uberrimos tulit fructus. Longissimus posset eorum texti catalogus qui Patris verbis et adhortationibus permoti contempto saeculo, se diversis religiosorum hominum familiis aggregarunt. Multi sanctam vitam quam pio eius consilio instituerant pretiosa morte clausurunt, ut non mediocrem sanctitatis opinionem post se reliquerint. Neque est tacendum hoc loco quod de pio quodam adolescente narratur, cui cum homo nequissimus pudicitiam conaretur eripere, ille nova ac singulari ratione a se iniuriam propulsavit. Nam cum mori mallet quam turpiter perpeti, arreptam altera manu Christi crucifixi imaginem tenuit, altera vero flagellum strinxit, quo se tamdiu cecidit dum impurus aggressor inusitato spectaculo commotus atque adeo deterritus aufugit. Haec erant solidae pietatis indicia quae ab adolescentibus qui se Patri in disciplinam tradiderant, edebantur.

X. Verum etsi totus in excolendam collegii romani iuventutem incumberet, non tamen omnino oculos ab oratorio s. Francisci Xaverii deiecerat, tantumque precibus apud Deum institit, ut praesides tandem aliquando seu necessitate compulsi, seu potius Deo sic disponente permoti, pristinum ei concionandi munus detulerint. Anctus hoc onere tantum abfuit, ut alterum externos collegii auditores instituendi deponeret, ut alacri animo cura incredibili, divinae gloriae incremento ntrumque portarit; atque ita operam suam oratorio praestitit, ut unice illi occupatus iudicari posset, atque e contrario ita eandem collegio navavit, ut tantum de unius collegii scholasticis cogitare videretur.

XI. Et sane mirabantur omnes quomodo unus tot munera obire posset ac tam diversas uno tempore sustinere personas. Sed Pater *omnibus omnia factus* qui omnem de propria valetudine curam abiecisset atque unam animarum salutem quaereret, rationem invenit qua id efficeret quod alii ne conari quidem auderent. Et vero quo cumulatiùs utrique muneri satisfaceret, quod ad collegii discipulos attinet, sodalitiis ab apostolis nuncupati curam suscepit. Est quidem hoc sodalitium imprimis nobile a p. Pompeio de Benedictis singulari doctrina ac probitate viro iam pridem in romano collegio institutum, quod et florebat tum et hodie etiam floret viris sanctissimis, qui e frequentissimo externorum auditorum numero lecti in illud cooptantur. Ex hoc sodalitie non ita pauci prodire qui singulari decesserunt opinione sanctitatis, quorum virtutes collegit ipse Pater typisque vulgavit, ut illos omnittam qui ad honorifica sacerdotia atque etiam ad episcopatum promoti divinam gloriam propagarunt et multis saluti fuerunt.

XII. Quod autem attinet ad oratorium, ut magis ac magis augebatur eius fama sanctitatis, fiebat ut quotidie multi eum consularent ac conscientiae sibi suae adsciscerent moderatorem. Hinc aegrotantium domos obire et morientibus assidere coactus vix partem quietis minimam capere poterat. Ipse vero nunquam magis laetus et alacer quam cum maioribus esset in dies occupationibus distentus ac paene oppressus. Neque vero illud quo admiratio cumulatur est hic praetermittendum, quod perinde ac si otio abundaret sese scriptioni dedit, quo latius sua pateret industria et diuturnior laborum suorum fructus exstaret. Multa scripsit ad proximorum utilitatem quae typis impressa publici iuris facta sunt. Inter alia multae eius censentur lucubrationes, quae ad angendum sanctorum cultum praecipue conducunt. Nonnullorum etiam e nostra societate apostolicorum virorum vitas copiose luculenterque conscripsit quibuscum ei aliqua necessitudo ac familiaritas intercesserat, quosque cum optime nosset, eorum quoque virtutum imaginem ad vivum expressit. Erat enim ut mira quadam dicendi, ita egregia scribendi facultate praeditus.

XIII. Postremo nequid omitteret quo aliis prodesse posset, incredibilem epistolarum numerum singulis exarabat hebdomadis, quibus epistolis bene multos, aut in susceptae melioris vitae proposito nutantes confirmavit, aut ad sanctioris perfectionisque vitae genus traduxit. Hinc multi eius certatim eliciebant epistolas, quibus iuari se mirum in modum affirmabant. Optimus vero Pater nunquam his officium non praestitit suum, et quod quieti ac somno aliisque corporis levamentis ab a iis tribuitur temporis, id paene totum ab ipso aut exarandis epistolis, aut conscribendis sanctorum ho-

minum rebus gestis describendisque virtutibus consumebatur.

XIV. Verum hic vitae tenor atque immensum tot laborum pondus frangere necessario atque opprimere ante tempus debebat hominem, qui non admodum firmo sed gracili potius atque imbecillo habitu corporis utebatur. Et vero fregit atque adeo oppressit; sed priusquam ad eius obitum veniamus pauca more solito de eius virtutibus persequamur.

XV. Mitto dicere imprimis quo zelo fuerit quam ferventi et apostolico, propterea quod ex his quae commemoravimus colligi potest. Hoc tantum addam quod praetermitti ab historico nec potest nec vero debet. Animadverterat vir divinae gloriae ac salutis animarum studiosissimus, inopes mulierculas nullo tecto passim per urbem vagantes noctu sub dio in foris ac porticis iacere magno utique valetudinis detrimento, sed multo maiori pudicitiae periculo. Harum vicem miseratus Pater utrique incommodo sibi occurrendum esse statuit. Itaque corrogatis undique subsidiis hospitalem domum aperuit, quam miseris illis vagisque feminis patere voluit, quo et commodius cubarent, et quod caput est, a certissimo amitteudae pudicitiae discrimine submoverentur. Domum Immaculae Deiparae Virginis Conceptioni, et s. Aloisio Gonzagae dicatam pontificio diplomate stabiliendam communiendamque curavit. Viget nunc pium ac salutare institutum, iisque legibus regitur quas Pater earum feminarum generi accommodatissimas et prudentiae plenissimas scripsit. Postremis hisce aunis ornata domus meliorem in formam et aucta etiam redditibus fuit, sedulitate potissimum aequae pii atque industrii e societate nostra operarii, qui eius curam gerebat. Atque haec de eius apostolico zelo dicta sint satis.

XVI. Iam reliquae virtutes quae sanctitatem constituunt, minime in eo desiderabantur. Neque enim satis idoneus ad aliorum salutem quaerendam esse potest, qui propriam negligat. Singulari innocentia fuit, quae virtus in eo praecipue enituit, ac propterea eius elogio inscripta legitur: s. Aloisium Gonzagam, quem nti diximus iam inde a pueritia singulari cultu venerari coeperat, hac parte imitari studuit, et pari felicitate, quam sacro in baptismo innocentiae stolam accepit, eandem ad mortem usque integram immaculatamque servavit. Eiusdem angelici iuvenis exemplo innocentiam cum poenitentia coniunxit. Mitis et lenis in alios, in semet severus et asper fuit. Flagella ad corpus edonandum caedendumque adhibuit non communia, sed ferreis stellis armata quae exstantibus acuminibus magnam sanguinis vim exprimebant. Nullus vero caedendi modus, nisi quem fervor et sanctum quoddam in semet odium definiret. Parcens in sumendo cibo, toto fere vitae suae tempore incoenatus contentus fuit. Mensae communi cum adsideret, qui exquisitiores forte apponerentur cibi, eos fere relinquebat intactos. Vestitus obsoleto utebatur et saepe lacero, pileo vero adeo consumpto ut circumquaque in faciem humerosque deflueret. Ipsemet quondam affirmavit, caligas quibus erat indutus, existimare se mendico oblatas ab eodem reiectum iri, adeo lacerae erant atque discerptae.

XVII. His quas descripsimus, virtutibus studium orationis adiunxit. Commune omnibus meditationis, lectionis, examinum pensum exacte fideliterque persolvit, nec quidquam de tempore rebus spiritualibus destinato praecidit. Quidquid otii in tantis quas diximus occupationibus nanciscabatur, totum precationi dabat. Erga sacrosanctam Christi humani-

tatem eiusque dolores ac cruciatus mirum in modum affliciebatur. Par devotionis erat sensus in divinum Eucharistiae mysterium. Sanctissimam Dei Genitricem non secus coluit atque impense dilexit, ac carissimam et optatissimam matrem. Secundum hos s. Aloisium Gonzagam eximie coluit, cuius cultum non solum mirifice propagavit, sed etiam eius singulares virtutes in semet ad vivum expressit, innocentiam praesertim et poenitentiam.

XVIII. His itaque virtutibus ornatus cum esset, cum tot labores pro divina gloria ac salute animarum tolerasset, cum caelum iam respiceret, eo tandem evocatus est. Mortem sibi instare multo ante praescivit atque praedixit. Scribens enim Mariae Magdalenae Vbaldinae sorori suae, nobilissimae ac religiosissimae feminae: *anno, inquit, MDCCXXXI sistar ad divinum tribunal*. Igitur IX angusti eius quem diximus anni, gravissimis doloribus affligari coepit, qui magis magisque ingravescentes Patrem ad exitum vitae perduxerunt. In tanta dolorum acerbitate summam praese tulit patientiam, nullum eis lenimentum quaerens, nisi quod ex assidua Christi Domini cruciatuum meditatione capiebat. Illud dolebat unice, quod in lectulo tamquam piger ac desidiosus moreretur, non autem in acie tamquam fortis et strenuus miles occumberet. Quamquam nec omnino desidiosus et nihil non agens occubuit. Nam vix urbe percrebuit p. Franciscum Mariam extremo morbo laborare, tantus omnium ordinum generis ac loci hominum concursus factus est ad aedes collegii romani, ut aegre ianitores confluentem turbam submoverent. Admissi primores quique atque ex religiosis praesertim famulii homines, ad Patremque introducti, quorum alios blandis solatus est alloquiis, alios opportunis in susceptae vi-

tae sanctionis instituto confirmavit adhortationibus, multorum denique confessiones excepit. Sed cum maior in dies augeretur concurrentium numerus, nec omnes intra cubiculi angustias admitti possent, qui excluderentur rogare atque obsecrare, ut aliquid saltem quod a Patre fuisset adhibitum, solatii ac memoriae causa secum auferrent. Itaque cilicia, flagra, ferreae catenulae, pii libelli, sanctorum imagines, aliaque huiusmodi dispertiri coepta sunt. Sed neque hoc modo omnium postulationibus satisfactum est. Multi abibant moesti et conquerebantur vehementer, quod nec Patrem alloqui potuissent, nec quidquam discedentes reportarent. Igitur novo ac praecipiti consilio, impetu repente in sacrum tribunal facto in quo confessiones tum in oratorio, tum in collegii templo solebat excipere, illud in frustra conscindere coeperunt. Et vero conscidissent, nisi utrumque loco motum aeditui in tuto collocassent.

XIX. Haec dum agebantur, cum sanctus vir morti magis appropinquaret, enixe rogavit ut sacrosancto Viatico reficeretur. Sed non ante illud sumpsit, quam scriptum quoddam a se exaratum ac patri Francisco Piccolomineo insignis probitatis viro qui morienti adsidebat, traditum legeretur. Erat autem scriptum illud plenissimum opprobrii ac contumelias, quae ad sui contemptum vir humillimus collegerat; quo non sine lacrimis ac gemitibus adstantium recitato, summo devotionis sensu cepit sacrosanctum Christi corpus. Verum cum decessurus quam primum videretur, ad octo dies vitam produxit non sine divinae providentiae consilio, quo et eius merita augerentur, et alia nobis atque alia patientiae omniumque virtutum exempla suppeditarentur. His transactis sacro oleo inunctus, cum oculis ac nutibus sibi caelestis alicuius

visionis speciem oblatam esse significasset, fortasse beatissimae Virginis aut s. Aloisii clientem suum ad caelum invitantis, *venio, eamus* intermortuis verbis pronuntians placidissime decessit die, qui nativitatem b. Virginis praecedat anno MDCCXXXI aetatis suae LX quorum duos et quadraginta in societate sanctissime innocentissimeque transegerat.

XXX. Fama eius obitus vulgata, tota urbs sedibus commoveri visa est. Omnium consentiens opinio fuit, a s. Philippo Nerio urbis apostolo similem numquam totius urbis motum exstitisse. Itaque aegre admodum cadaver in templum delatum est, obsepto immensa populi multitudine omni aditu; non minus aegre solitae preces a nostris persolutae sunt. Crescens magis ac magis frequentia verius tumultus quam concursus speciem exhibuit, atque adeo excrevit ut eam magnificentissimi templi summa laxitas atque amplitudo non caperet. Non defuerunt in tanto numero viri principes ac matronae nobilissimae, qui Patris funus praesentia sua honestarunt. Nemo non luit Patris obitum, quem vulgo sanctum et urbis apostolum appellabant. Denique tertio ab obitu die, quod ipse diserte his verbis praedixerat, *se nonnisi tertia die quieturum*, lignea in arca cadaver inclusum et in commune sepulcrum illatum est. Eius imago aeri incisa cum hoc elogio circumfertur

P. FRANCISCVS. MARIA. GALLVZZI SOC. IESV

FLORENTINVS

VITAE. INNOCENTIA. CONTEMPTV. SVI

ALIENAE. SALVTIS. STUDIO. SPECTATISSIMVS

OB. ROMAE. VII. SEPTEMBRIS. MDCCXXXI. AETAT. LX

VII.

P. CAMILLVS PACETTVS

I. Honestis parentibus natus est in sabinis anno **MDCLXXXVII** die **XXXI** maii p. Camillus Pacettus omnium qui singulari opinione virtutis in romana provincia decesserunt, recentissimus. Romae educatus liberalibus disciplinis operam dedit in collegio romano. De eius adolescentia nihil habeo comperti; dubitari tamen minime fas est, quin ita se gesserit ut cooptari in societatem meruerit. Itaque in eam ingressus tyrocinium posuit in domo s. Andreae; tum decursis de more studiorum spatiis et magisterii munere defunctus, confecto item tertiae probationis anno ac demum ad quatuor votorum professionem admissus, coepit in vinea Domini laborare, quam strenue naviterque reliquo suae vitae tempore excoluit.

II. Fuit in pluribus provinciae collegiis, prout praesidium ratio ac divinae gloriae res postulabat et ubique muneri suo nunquam defuit. Tandem Perusiam missus, nobilissimam

ditionis pontificiae urbem, in ea fixum ac stabile domicilium collocavit. Neque enim inde unquam a superioribus evocatus fuit, neque fortasse si animum enim loco movere induxissent, id perficere per eos cives patris amantissimos potuissent. Nam vix pedem p. Camillus eam in urbem intulit, omnium animos sanctitatis opinione corripuit: eum omnes tamquam civem suum amabant, tamquam sanctum ac prope angelum e caelo missum venerabantur.

III. Praefectus opificum sodalities totam sodalibus operam impendit suam. Eorum confessiones excipiebat, reficiebat divini verbi pabulo, pauperiores corrogatis elemosinis sustentabat, solabatur aegros: aegrotantibus adsidcbat ac denique ad mortem pie sancteque obeundam eosdem adjuvabat. Quibus rebus factum est ut sodalium numerus incredibiliter creverit, eo pietatis incremento, quod fere ex hoc genere hominum si cultura minime destituantur, consequitur.

IV. Verum p. Camilli caritas angustis unius sodalitii limitibus coerceri non potuit, sed ab illo sodalities initium capiens brevi ad omnes civitatis ordines progressa est. Nemo enim fere erat in frequenti civitate qui illum non conveniret, aut consultandi causa de rebus ad salutem animi pertinentibus, aut onera apud eum conscientiae deponendi. Ipse vero libentissime omnes excipiebat, omnes a se non nisi bene animatos in Dei cultu atque in aeterna animi quaerenda salute dimittebat. Porro ex honestioribus civitatis ordinibus paullatim ad infimos atque adeo ad ipsam urbis faecem descendit. Itaque apparitores lictoresque gentis hominum vulgo invisum non solum non praeterivit, sed etiam peculiari caritatis studio complexus est. Hos p. Camillus frequenter adibat, desides atque otiosos in propriis stationibus convenie-

bat et blande comiterque appellans salutaribus implebat monitis atque alliciebat ad confessionem. Ab his digressus pergebat ad carceres ibique detentos peramanter visitabat et quibus poterat modis solabatur. Siqui vero ad patibulum perducendi erant, eos ad mortem obeundam adinvabat, nec deserebat donec carnificum manu iugulati animam efflassent. Nam quid de publico urbis valetudinario dicam? Hic prope erat assiduus, neque ullum ministerii genus quantumvis abiectum ac sordidum refugiebat. Circuibat lectos, rudes christianam doctrinam edocebat, fere omnium excipiebat confessiones. Porro his ministeriis tot tantisque occupatus, dici non potest quot labores pertulerit, quot noctes insomnes duxerit non sine gravi propriae valetudinis detrimento. Sed carnis infirmitatem sustentabat animi robur; et incensum animarum iuvandarum studium vires tot oneribus pares sufficiebat. Iam ad ea quae supra recensuimus paene assiduus concionandi labor accessit; quo in munere mirum in modum valuit; non quaesito fucatae eloquentiae artificio, sed singulari opinione virtutis. Numquam vero magis eius concionandi vis patuit, quam cum aliquae inciderunt occasiones, aut exorandi nunimis, aut publicae calamitatis quae immineret depellendae. Has arripiebat statim tamquam a Deo oblatas homo salutis animarum et divinae gloriae studiosissimus, prodibatque in publicum et verba ad confertam multitudinem faciebat. Anno nescio quo ingenti terraemotu succussa urbs fuit. Magnus omnibus iniectus timor maioris calamitatis, si novo iterum motu tecta urbis quaterentur. Itaque omnium animi ad placandam divinam iustitiam deprecandamque tantam calamitatem conversi. Oblata opportunitate usus est p. Camillus, prodiit in forum, verba fecit ad incredibilem populi multitu-

dinem eo successu, ut nemo fere ex tanta frequentia inventus fuerit, qui sacramentali confessione conscientiam non expiarit suam. Quod vero divini verbi vim maxime ostendit, omnes confessi sunt magis se patris concionantis sermone et gravioribus divinae irae denuntiationibus, quam ipso terrae motu fuisse concussos.

V. Verum cum terra novis subinde motibus quateretur, nec plane consisteret, supplicatio a p. Camillo indicta fuit. Nulla mora: ad dictum diem tota convenit civitas et forum amplissimum multis hominum millibus refertum fuit. Postquam Pater de superiore loco adstantem multitudinem ad poenitentiam cohortatus est, iussit omnes binos vel ternos incedere et viros a feminis separari. Dicto citius facta discessio fuit. Processerunt primum mulieres, deinde viri bini vel terni ut Pater edixerat, tanta oris compositione, ut satis ipso externo corporis habitu internum animi vere dolentis ac poenitentis affectum declararent. Illud quoque spectaculo fuit, quod nemo sibi comitem delegit, sed illo quem in tanta multitudine sors obiecit, quisque contentus incessit. Itaque patritii cum plebeiis, matronae cum infimi generis mulierculis nulla ratione ordinis ac loci habita, incedebant, ne dominis quidem ipsis proprios famulos comites ac socios dedignantibus. Praesul qui urbem nomine Pontificis administrabat, rei novitate commotus et singularem totius civitatis erga virum Dei demiratus venerationem, ipse quoque se continere non potuit, quin se in turbam coniiceret, comitem primo cuique obvio adiungeret, et sic nulla pompa, nullo famulorum agmine stipatus tamquam unus de plebe incederet.

VI. Haec satis ostendunt quantum apud omnes gratia atque auctoritate valeret p. Camillus, sed eo genere gratiae

atque auctoritatis, quae non nisi perspecta virtute ac probata sanctitate colligi potest. Sed est aliud huius ipsius rei certius argumentum. Domum in edito colle extra urbem, in loco amoeno ac solitario aedificare coeperat, quam spiritualium exercitiorum secessui destinarat. Sed deficiente pecunia, aedificium constiterat. Prope domum erat sacellum in quo Christi crucifixi effigies colebatur. Admonitus novo terrae motu edixit toti civitati, ut ad divini numinis ultionem avertebam, quod se aliis atque aliis subinde terrae succussionibus nondum placatum satis indicabat, edixit inquam, ut omnes ad sacellum illud de quo diximus, ad venerandam Christi Servatoris imaginem se conferrent, nec porro vacuis manibus pergerent, sed saxum vel laterem ad aedificandam exercitiorum domum comportarent. Res mira: nemo non paruit suum quisque saxum ad aedificium contulit. Ipsae etiam primariae urbis matronae, quamquam a p. Camillo numero exemptae essent, suum tamen gestantes lapidem eo pergere non dubitarunt, nec quidquam reliquis civibus in pio illo erga Dei famulum obsequio concedere voluerunt. Ingens itaque lapidum congesta strues, qua si non perfecta domus, eo tamen deducta ut commodum ad viginti capere posset, qui eo exercitiorum spiritualium causa secedere vel-
lent.

VII. Atque haec quidem domus inter praecipua p. Camilli opera censenda est. Carebat enim nobilissima civitas et societatis amantissima singulari aeternae salutis subsidio, quod s. parens Ignatius in spiritualibus exercitiis positum censuit ac constitutum. Hoc illi subsidium comparare aggressus p. Camillus, rem difficilem atque arduam una Numinis confusus providentia suscepit, et eo deduxit homo inops

ac pauperrimus quo demonstravimus. Neque vero dum aedificatio absolveretur expectandum ratus, aliquos qui se omnium primi obtulerant, pro numero cubiculorum, sacris commentationibus excoluit. Hoc autem eo eventu peractum est, quo felicior expectari non poterat. Tanta enim spiritualium charismatum dulcedine ii perfusi sunt, ut secessum illud tamquam caelestis beatitudinis aliquam in terris sedem ubique praedicariunt. Hoc autem acriter adeo multorum tantam gustandi dulcedinem acuit desiderium, ut omnium postulatis satisfieri omnino non potuerit; quod effecit ut principes civitatis non solum de absolvendo, sed etiam de laxando amplificandoque aedificio cogitarint. Et sane nisi servi Dei intercessisset modestia, quae de aliena liberalitate tantum uti voluit, quantum ad Dei gloriam satis esse iudicavit, aedificium illud multo latius ac magnificentius evasisset. Quod autem ad rem attinet, maxime toti civitati existit salutare ex eoque aberrimi ad Dei gloriam atque ad salutem animorum percipiuntur fructus, qui quidem secundum Deum piis p. Camilli cogitatis atque conatibus referri debent accepti.

VIII. Haec habuimus dicere de rebus a p. Camillo gestis; nunc aliqua de eius virtutibus perstringamus. Quo arserit divinae gloriae studio quantaque in Deum fuerit caritate, satis ex iis quae hactenus recensuimus colligi potest. Par in proximos caritas, nec minus incensum bene de omnibus merendi studium. Neque domi neque foris cessabat unquam; et domi quidem nihil recusavit eorum, quae utpote onerosa socii forte detrectarent, captabatque huiusmodi occasiones quibus aliquod sociis levamentum afferre posset. Quod reliquum tot occupationes temporis faciebant, orationi tribuebat, minimam vero partem capiendi somno et curando

corpori. Haec tanta contentio in causa fuit cur maturius, quam proximorum et divinae gloriae ratio postularet decesserit.

IX. Eximius cultor obedientiae fuit. Nihil unquam inconstitulis superioribus aggressus est. Saepe illa usurpabat, atque adeo superiorum ipsorum inculcabat auribus: *ipsos esse praesides, se vero subditum; eorum imperare, suas esse partes parere: proinde tuberent quod vellent, se imperata facturum*. Neque vero solum in rebus maioris momenti, sed in levioribus etiam ac minimis ex eorum pendebat arbitrio. Illud exemplo sit, quod in schedula in qua facultates a superiore impetratas adnotaverat, illa quoque legebatur impertiendi videlicet aliis eum pulverem, quo ad levandam capitis gravedinem utimur et mutuis officiis impertiri solet.

X. Humilitas quoque in sancto viro summa fuit. Ingenii sui tenuitatem verbis exaggerabat, verbis item quantum poterat demissis prudentiam qua ceteroquin valebat plurimum, elevabat. Humilitatis studio nobilium consuetudinem defugiens libentius inter infimae sortis homines versabatur. Hos amabat, hos amplectebatur, hos omnibus christianae caritatis fovebat officiis. Ad humilitatem quoque referri potest, quod aliorum consiliis libentissime adquiescebat. Ipso inconsulto, nescio quis administrationem eius aedificii de quo supra meminimus suscepit, nec ille quidem idoneus cui negotium illud committeretur. Minore enim sumptu et meliori forma aedificium confici poterat. Quod cum humilis servus Dei illi peramanter demonstrasset, responsum tulit peracerbum et illiberale, *ipsum videlicet nescire quae diceret; res quas ignoraret aliorum permetteret tractandas arbitrio*. Hoc responso accepto obmutuit p. Camillus, et ne

verbum quidem contra dicere ausus est. Atque ut aliqua de paupertate dicamus, nudus nudum Iesum sequutus est: vestis detrita, pallium obsoletum, cubiculum uulla re nisi omnino necessaria instructum. Quae moueri sibi mittebantur, ea fere respuere cum gratiarum actione consueverat; si cogeretur acceptare, non suis sed aliorum usibus, ac pauperum praesertim inopiae reservabat.

XI. Ad has virtutes adiecit animi sui mortificationem. Naturam nactus erat peracrem ac fervidam; verum iugi suimet ipsius victoria id assequutus erat, ut mitis evaderet ac mansuetus sic ut natura patiens ac lentus existimaretur. Non defuerunt qui illius famam mordacius carperent, et de rebus ab ipso pro Dei gloria et animarum salute gestis, palam atque impudenter obloquerentur. Ipse vero exemplum mansuetudinis Iesu Christi propositum habens, obloquentium iniurias non solum aequo sed hilari etiam animo tulit. Quo quidem cum hominum genere, modestia semper ac patientia sibi esse agendum ac quodammodo certandum existimavit.

XII. Otii fuit osor acerrimus. Nunquam uou agebat aliquid; domi forisque semper occupatus. Quod supererat temporis ab eius prope assiduis occupationibus, aut flexis genibus in templo aut cubiculo clausus, totum oraudo meditandoque extrahebat. Atque orationi quidem apprime deditus erat: haec illi quies, haec otium, haec laborum solatium ac levamentum quamdiu vixit. Verum ante tempus ut supra diximus ad supernam sempiternamque quietem evocatus est. Ea enim aetate obiit, qua poterat per aliquot annos nisi mors intercessisset, in vinea Domini strenue naviterque laborare.

XIII. Vix tentari morbo coepit qui ei vitam abstulit, Patrem arcessivit quem sibi a confessionibus delegerat, rogavitque ne se in extremo discrimine constitutum desereret: quod autem ad conscientiae suae labes eluendas attinet, nihil sibi occurrere affirmavit quo magnopere commoveretur; se nempe in singulis confessionibus minima quaeque illi aperire consuesse, quibus vel levissime divinam a se laesam bonitatem existimasset. Hac animi tranquillitate p. Camillus adventantem mortem excepit. Inter varias alternantis morbi vices mirum in modum eius eluxit animi moderatio. Neque enim in spem recuperandae valetudinis unquam venit, neque quidquam de pristina sua tranquillitate remisit.

XIV. Ad cumulandam servi sui patientiam multa Deo sic permittente evenerunt, quae cuius potissimum culpa evenerint non facile dixerim. Illud certum est et sine ulla dubitatione affirmari potest, ut verbum quidem excidisse p. Camillo quo vel leviter de aliena incuria conqueri videretur. Sed erumpente tandem morbi vi et supremum exitum minitante, sacrosanto Christi viatico refectus est. Quo sumpto nihil cupidius expectabat ardentiusque exposcebat a Deo, quam dissolvi et esse cum Christo. Haec erant p. Camilli morientis vota, sed alia longe ab his diversa fovebat amantissima civitas. Nihil sive publice sive privatim praetermissum est, quo cives omnes coniunctis precibus, pretiosam adeo vitam et toti civitati maxime salutarem a Numine exorarent. Proposita concurrentium adorationi divina hostia in aede principe, eo ingens concursus factus est omnium ordinum, precibus et lacrimis p. Camilli vitam exposcentium. Sed plus apud Deum incensa aegrotantis patris vota quam pia civitatis preces valuerunt. Itaque sacro oleo inunctus atque il-

Iud psalmi summa devotione iterans; in manus tuas Domine commendo spiritum meum, placidissime obiit die octavo martii anno MDCCLIV, annos natus quinquaginta septem, quorum septem et triginta in societate summa cum laude et sanctitatis opinione traduxerat.

XV. Vix de eius obitu fama percrebuit, dici non potest quanta fuerit totius urbis commotio. Certe non doloris minus quam existimationis tot ac tanta edita fuerunt signa, quanta de paucis vel sanctissimis viris annualium prodita sunt monumentis. Ad honestandum benemerentissimi Patris funus, non solum tota civitas convenit, sed certatum est inter ipsos ordines civitatis, quis in declaranda erga defunctum Patrem sanctitatis existimatione primas ferret. Curato de more cadavere illatoque in ecclesiam, aegre a collegii patribus ei iusta societatis more persoluta sunt, templo vocibus concurrentium ac clangoribus personante. Tantus enim concursus fuit ut prope inmultas speciem exhiberet. Iustis peractis et submoto non sine summa difficultate populo, sub vesperam cadaver dissectum est. Tum iterum sequenti die in ecclesiam primo mane importatum, quo multitudini quae amantissimi Patris adspectu satiari non poterat satisfaceret, stipatum quidem multo satellite, sed qui aegre irruentem turbam submoveret.

XVI. Quamquam diligentissime ab iis ad quos spectat cautum fuerit, ne ullum publicum ederetur a populo testimonium quo defuncti Patris aliquo modo sanctitas declararetur, nullius tamen tanta esse potuit auctoritas quae ad absterrendos ab huiusmodi indiciis perusinos valeret. Sanctum vulgo appellabant et ei prope uti sancto honores habuerunt. Igitur ecclesia magnificentissime nigris peristromati con-

vestita solemne sacrum a canonicis, adstante urbis episcopo, celebratum est adhibito musicorum cantu. Absoluto sacro, populus facto impetu in cadaver irruit et paene sacris indumentis spoliat, aliis aliud diripientibus et frustra satellitibus qui circumstabant feretrum, prohibere conantibus. Discerptae etiam vestes sunt distractaeque laciniae, capilli vero paene omnes praecisi. Postquam populi aestus deferbuit, cadaver humatum est duplici arca inclusum et interiore quidem duabus munita clavibus, quarum unam episcopus qui praesens aderat, penes se habere voluit, alteram duo a magistratu legati ad magistratum ipsum detulerunt.

XVII. Atque hi quidem honores publice habiti sunt p. Camillo. Privatim vero sodalitas opificum quam tot annos Pater rexerat, suae partis esse duxit nihil in honestando optimo moderatore publicis civitatis testificationibus concedere Iterum igitur magnificentissime funebri apparatu ornatur ecclesia, additis ad maiorem pompam facibus trecentis, quae tota ecclesia eleganter distributae ac collucentes mirum in modum pompam ipsam auxerunt. Et mane quidem iterum a canonicis non sine cantu musicorum solemne sacrum peractum est: minora sacra ad CXX celebrata. A prandio vero sub vesperam exposita publicae adorationi divina hostia et aucto maiorum facum quas sodales detulerant numero, ab episcopo benedictio impertita est confertissimo populo, qui ad celebritatem perinde convenit ac si primus hic honos defuncto patri habitus esset.

XVIII. At ne hic quidem amantissimae civitatis motus adquevit. Qui a Patre spiritualibus exercitiis exculi fuerant, ipsi quoque publicum observantiae et amoris erga eum edere documentum voluerunt. Eadem fere peracta quae supra re-

censuimus, nisi quod et splendidius ornata ecclesia, et in medio excitata funebris moles, adiectis ad latera pyramidibus quatuor, quae magnificum ad speciem mausoleum intuentibus exhibebant, auctior etiam uti minorum sacrorum, ita cœrearum facum numerus fuit, concursus idem omnium civitatis ordinum, qui paene modum in honestando amantissimo patre tenere non potuerunt.

XIX. Quaedam etiam prodigia a Deo patrata narrantur ad declarandam servi sui sanctitatem. Inter alia ferunt Ioannem quemdam, disrupta quae intestina sustinet foedum in modum pelle, brevi eo redactum ut certissime moriturus crederetur. Nam disraptionem pellis effectus ii consequuti sunt, qui imminenti interitus indicia a peritis iudicantur. Itaque desperata salute et frustra medicorum adhibita opera, pannus sanguine servi Dei imbutus morituro applicatur. Quo facto praeter opinionem somnum cepit et somno post aliquot horas expectatus, nullum morbi vestigium inventum et aegrotus pristinae perfectaeque sanitati restitutus.

Aeri incisa est servi Dei imago cum hac inscriptione quam exhibemus:

P. CAMILLVS . PACETTI . SOC . IESV

REGVLARI . OBSERVANTIA

CONTEMPTV . SVI . ANIMARVM . ZELO

CVLTV . IN . DEIPARAM . EXIMIVS

OBIIIT . PERVSIAE . VIII . MARTII

AN . REPARATAE . SALVTIS . MDCCLIV

ÆTATIS . SVÆ . LVII

IOSEPHI MARIANI PARTHENII

AD SODALES SOCIETATIS IESV

IOANNIS MARIANI FRATRIS

ELLOGIVM

I. Verecundor equidem , post exhibitas vobis virorum e societate Iesu sanctissimorum vitas iampridem a me latine contextas, his fratris mei vitam sive ellogium attexere, qui nullo modo sit cum illis de quibus scripsi comparandus. Verum cum eius virtutes mihi propono , cum vitam integerrime actam, cum mortem pie ac sancte obitam considero , propemodum cogor castigare pudorem meum ; susceptum certe consilium damnare non possum. Nam etsi cum illis comparari nequeat, ad illos tamen et studio pietatis et commendatione virtutis propius accessit. De fratre vero frater quod scribam, id exemplo Gregorii qui de fratre Basilio et de Macrina sorore, nec non Ambrosii qui de fratre Satyro et de sorore Marcellina scribere non dubitarunt, facere me si-

militer posse atque ulla sine reprehensione existimo. Fratres utique sancti de sanctis fratribus sanctisque sororibus scripserunt; sed hoc ab historico requirendum non arbitror, ut de sanctis viris scribens, sanctitate aequè excellat atque ii de quibus scribit. Satis, opinor, est si vere scribat atque historica plane fide scribat. His de causis ne fraternae virtutis memoria prorsus interiret et aliquid ad commune exemplum et imitationem exstaret, ea litterarum monumentis consignare visum est quae de Mariano fratre partim ego perspecta habui, partim ab iis qui eius contubernio usi sunt verissima accepi. Multo sane plura persequi potuissem, si una cum eo vitam agere contigisset; sed Deo aliter visum qui nos invicem dissociavit in hac vita, in altera ut confido consociaturus. Ab inita societate alter alterum nunquam convenit; unum tantum litterarum usurpatum adloquium, quo dissidium nostrum desideriumque solaremur. Scripturus igitur eius sive vitam sive potius commentariolum, ita fraterno obsequor amori ut in primis serviam veritati.

II. Natus est Pisauri die secunda octobris, angelis tutelaribus sacra anno MDCCXIV, ubi iampridem familia consedit. Eo enim Cremona unde originem ducit, ab avo Ioanne Baptista 1 traducta est, qui captus urbis pulcritudine et

1 Fuit vir commemorabili pietate et singulari erga Deiparam Virginem studio, cuius lauretanam domum, dum vixit, vixit autem octoginta quatuor annos, Cremona digrediens, septuagies septies, ut in imagine scriptum est, visitavit. Egrege etiam de eadem sanctissima domo meritis, eius Procurator Generalis honorificentissimo fuit diplomate constitutus.

frequentia illic stabile Philippo filio parenti nostro, domicilium constituit. De Anna Maria Caecilia matre nihil hoc loco dicam, propterea quia de eximia eius probitate editum iam a me exstat commentariolum, ut hac etiam de causa filii laudes cum materna lande coniungere libuerit, ne quos uatura tam arcte adstrinxit et multo arctius virtus colligavit, in virtutum commemoratione separarem.

III. Transacta Pisauri infantia, Cremonam ineunte pueritia a patre de liberorum iustitutione vehementer sollicito, missi fuimus, educandi sub optima Andreae patris viri sanctissimi disciplina. Parens autem cum uos Cremonam misit, non tam avitae domus, quam, et vero etiam praesertim, collegii societatis Iesu opportunitatem qua Pisaurum carebat sequutus est, ubi ad omnem pietatem ac doctrinam ab iis ipsis a quibus ipse edoctus fuerat, erudiremur. Quo patris consilio nihil nobis fuit nec vero esse potuit salutaris, ut maximas Deo habere gratias debeamus, quod antequam tanto bono quam iusto Dei iudicio mortalibus esset interceptum, frui potuimus.

IV. Dati igitur ambo in patrum societatis Iesu disciplinam vix fuimus, dici uou potest quantos ille tum in pietate, tum in doctrina processus effecerit. Quod ad pietatem attinet, tanta inuocentia vixit, tanta integritate morum, ut aetatem maxime lubricam gravi ulla sine prolapsione traduxerit. Maximum certe ac prorsus singulare innocentiae documentum. Neque vero hanc solam vitae partem, sed totam ad extremum usque spiritum vitam eadem animi integritate transegit, quod ipso extincto conscientiae eius moderatoris testimonio confirmatum est. In prima aetate uihil in eo puerile, nihil non ad gravitatem modestiamque compositum, ut

iam tum conici posset qualis eadem progrediente esset evasurus. Mihi certe fratris exempla quae proposita quotidie ob oculos habebam, summo ad virtutem omnem fuerunt incitamento; quibus utinam quantum debuerim profecissem.

V. Inter ceteras virtutes singulare in eo eminuit erga Deiparam Virginem studium, quo a pia matre ambo ab infantia imbuti fuimus. Quanquam ad hoc ipsum studium plurimum etiam contulit patrum disciplina quae effectum est, ut nulla concessa vacatione, Marianum sodalitium celebraremus in quo pietas erga divinam matrem alitur ac fovetur. Singulare est quod subiicio et minime reticendum. Totos octo annos quibus ambo florentissimum illud societatis gymnasium celebravimus, mihi semel tantum vacatio indulta a sodalitate fuit et fratri ne semel quidem, nulla neque imbrium, neque ventorum, neque nivium, neque hyemis, quae in Insubria frigidissima est, ratione habita. Ad eandem disciplinam et ipsum studium revocandum est, quod eodem iubente et saepe deducente sacra Deiparae templa frequenter adire coepimus, quem ego morem semper retinui.

VI. Quod vero ad doctrinam spectat, quo summo praeditus erat ingenio, quidquid tradebatur, quam citissime arripiebat, ut condiscipulos longe et discendi celeritate et acumine intelligendi superaret. Paene puer odam saphicam scripsit quae prope habita prodigio fuit, et Pisaurum ad patrem missa tanquam singulare eius ingenii specimen ac documentum. De facultate quam ad omnem in omni doctrina excellentiam a natura nactus erat, plura in exordio libri V epistolarum mearum quas ad eum scripsi, sum prosequutus; ex quibus intelligi potest quam miros in omni facultate processus fuisset facturus, nisi valetudo qua semper imbecilla usus

est impedimento fuisset, et primum illum iam ab adolescentia institutum cursum non repressisset modo, sed etiam praecidisset.

VII. Hac pietate et ingenio cum esset, animum ad ineundam societatem adiecit, eodem fere tempore quo ego de eadem vitae ratione capessenda cogitabam. Interea exacto a me philosophiae curriculo, ab eo autem nondum perfecto, Pisaurum visendorum parentum causa ambo remeavimus, ubi ad aliquot menses commorati sumus; quibus elapsis ego Romam societati Iesu nomen daturus profectus sum, ille Cremonam philosophiae confecturus curriculum reversus est. Ego vero in societatem admissus qui probe consilii ab eo suscepti conscius eram, hortatu p. Francisci Piccolomini, viri sanctissimi meique in tyrocinio institutoris, cuius erga me insignibus promeritis nunquam pares habere potero gratias, illum Romam invitavi, ubi multo celerius quam in provincia mediolanensi, in qua aditus in societatem propter recens pedemontanum edictum quo societati gymnasia adimebantur, si non obstructus certe minus patens erat, voti sui compos fieri posset. Sed p. Ignatius Vicecomes tunc ei provinciae, post universae societati praepositus, id quod agitabatur suspicatus, eiusque eximiis dotibus captus moras omnes abruptit, et confestim in societatem admissum provinciae suae sodalem adscripsit die IX octobris anno MDCCXXXII.

VIII. In tyrocinio earum virtutum fundamenta iecit, quibus postea *spirituale* aedificium super exstruxit quod non ad vulgarem celsitudinem fastigiumque provexit. Absoluto tyrocinio, iterum philosophum audivit et interceptum philosophiae cursum absolvit. Huic facultati cum studeret, nimia

sciendi cupiditate accensus studium mathematicae et linguae graecae coniunxit, et huius quidem ita, ut graecas epistolas properante calamo recte scriberet et graecos apices eleganter efformaret. Ex hac tanta tamque exaggerata contentione afflicta prorsus eius valetudo fuit doloremque capitis contraxit, quo se toto vitae suae tempore liberare non valuit. Ab his studiis, more apud nos recepto, primum grammaticam docuit, deinde Cremonam missus est rhetor. Ibi vix demandatum munus suum inchoarat, lethali morbo correptus est ut ego eum pro mortuo luxerim; sed uberrimus repente consequutus sudor et illum ab instanti discrimine eripuit et carissimum fratrem ab interitu vindicatum mihi restituit. Verum tanta debilitatio virium consequuta est, vix ut aegre posset consistere. Quare ego cui fratris valetudo summopere cordi erat, datis ad p. provinciae praepositum litteris, illum rogavi ut eum alio minus laborioso gymnasio praeficeret, ubi paucos discipulos minima qua fieri posset et animi et virium defatigatione erudiret. Humanissime ille quidem respondit, facile se ei posse ab omni munere vacationem indulgere, sed eum paucorum discipulorum gymnasio quod ego postulabam, praeficere nequaquam posse, propterea quia omnia in tota provincia quam refertissima essent et summa discipulorum frequentia celebrarentur.

IX. Ille vero oblatam vacationem aversatus concessu provincialis Mediolanum se contulit, ubi theologiae operam daret. Porro in hac facultate adeo praestitit, ut in affluenti optimorum ingeniorum copia eminuerit. Hoc praecipua ei delata munera declararunt. Verum haec cum summam contentionem requirerent, et moderatorum concessu et rogatu meo qui verebar ne eius in dies valetudo deterior evaderet, his

nuncium remisit, quo omni onere levatus uni theologiae vacare posset.

X. Solemnem professionem edidit ut ego die II februarii, purificationi B. Virginis sacra, sed non eodem anno. Ipse anno MDCCXLIV; ego vero duos ante annos. Ab emissa professione et secundo confecto tyrocinio, valetudine impeditus alium ab illo qui ei ob praestans ingenium et excellentiam doctrinae patuisset, cursum tenere coactus est; totumque se urgendae proximorum *saluti* dedit. Itaque et habendis concionibus et expiandis sacra confessione animis omni ope invandis uberrimo non sine fructu vitam omnem impendit suam, non laboribus, non vigiliis parcens, affecta semper valetudine et assiduo quo laborabat dolore capitis conflictatus; quibus incommodis nunquam adduci potuit, ut cessandum et sibi quidquam indulgendum putaret.

XI. Primis annis Bormium missus fuit. Bormium est oppidum caput unius ex septem Helvetiorum liberis regionibus, quae recepto vocabulo *Cantones* appellantur, in asperimis montibus situm, aditu prope inaccessum et perpetuis fere in nivibus conscriptum. Deficientibus conterminis regionibus a catholica fide, non solum ab ea non descivit sed ei perpetuo adhaesit, opera praesertim nostrorum patrum, qui malam pestem vigilantia sua ab oppidanorum animis averterunt. Ibi domicilium societas habebat; verum cum illud tum propter caeli inclementiam, tum propter summam egestatem deserere cogitaret, magna confestim fuit proximis regionibus iniecta spes fore, ut iesuitis abeuntibus facile ad eandem defectionem finitimi Bormienses attraherentur. Quod ubi a nostris auditum est, consilium damnarunt et perstare in loco, quaecumque subeunda essent incommoda, decreve-

runt. Eo igitur missus aliquandiu in illa statione mansit non libentissime solum, sed in eadem nisi aliter moderatoribus visum esset perpetuam sibi commorationem elegit. Hoc autem quanti faciendum sit, quivis aestimare potest, quod florentissimae provinciae adscriptus concludenti ambitu suo nobilissimas urbes quae certe ipsi patuissent, ut postea patuerunt, celebritati solitudinem, nobilitati urbium oppiduli humilitatem, rerum omnium copiae summam inopiam praetulerit.

XII. Epistolam hac super Bormiensi commoratione sua ad me conscripsit, dignam sane quae saepius legeretur et summa diligentia custodiretur. Custodita autem separatim a me quam diligentissime et diutissime fuit; sed nescio quomodo aut inutilibus permixta chartis, aut proximo absorpta naufragio periit. Huius iacturam fateor aegre tuli; nihil enim scribi potuit neque disertius neque ad communem quam appellamus *aedificationem* conducentius. Praeter graphicam regionis descriptionem moresque gentis expressos, vetus illa sanctorum patrum qui Aegypti, Nitriae ac Palaestinae coenobia incoluerunt, disciplina sic exhibita legentium oculis obiciebatur, ut propemodum tanto post tempore revocata et ad Bormiense collegium traducta videretur.

XIII. Vix igitur Bormium venit, incolarum omnium animos statim corripnit sibi que mirum in modum conciliavit, quippe qui non curae, non diligentiae, non laboribus ullis unquam pepercit, quibus eos quacumque ope posset iuaret. Assiduus in templo, frequens in publico habendis utrobique concionibus, et totus in eo ut omnes ad omnem christianam institutionem erudiret atque formaret. Dubitari non potest, quin fructus labori et iactae sementi seges cum fœ-

nore responderit. Verum cum nihil tale cogitaret sic inben-
tibus moderatoribus, carissimam stationem relinquere et Bor-
mio discedere coactus est; discedens autem summum sui
desiderium reliquit eiusque abitum nemo non aegerrime tulit

XIV. Bormio digressus Cremonam se contulit, illi colle-
gio a moderatoribus destinatus, ubi more nostro diebus fe-
stis concionaretur. Auditus est summa et electissima frequen-
tia, nec sine admiratione. Et ea quidem Cremona urbs erat,
quae de oratoribus certum ferre iudicium poterat, doctis abun-
dans viris e iesuitarum disciplina profectis, quae cuiusmodi
fuerit, ego ipse expertus testis idoneus esse possum. Neque
vero hoc cuiquam minus credibile videri debet. Sic enim di-
cebat ut ab eo neque doctrinam, neque eloquentiam requi-
reres, quae dno sic in illo eminebant, ut summi oratores
quibus si unquam alias provincia Mediolanensis, his certe
temporibus maxime floruit; illum suspexerint et concionum
suarum cognitorem emendatoremque adhibuerint. Hoc mihi
ii ipsi qui eius opera usi sunt affirmarunt, disertissimi to-
taque Italia celeberrimi oratores. Ille vero non de vana qua-
dam sive doctrinae sive eloquentiae captanda opinione labo-
rans, illud unum propositum semper habuit, ut auditores sui
meliores fierent, atque alii plane sive boni sive mali ac ve-
nerant, reverterentur. Hoc autem efficere divina adspirante
gratia, ei facile fuit qui quod ipse persuasum habebat, aliis
non difficili negotio snadebat, in quo tota sita vis est cum
omnis eloquentiae, tum praesertim eius quae ex evangelico
fonte petita ad proximorum salutem utilitatemque derivatur.

XV. Aliquot Cremonae annos commoratus Comum mis-
sus est, mutato quidem domicilio, sed eodem retento concio-
nandi munere. Ea in urbe usque ad obitum mansit, in qua

et singularis doctrinae et non vulgaris sanctitatis opinione floruit. Diuturnior commoratio effecit, ut eius apostolicum munus latius ad plurium utilitatem se diffunderet eiusque virtutes magis in dies ac magis exsplendescerent. Nullum enim hominum genus divina qua flagrabat caritate complexus non est; summum, medium, infimum; sacras Deo dicatas virgines; ecclesiasticos ipsos; singulis vero ordinibus separatim suam cuique propriam culturam adhibuit. Ipse urbis antistes qui nunc viventis decessor fuit vir plane sauctus, sibi illum animi sui moderatorem elegit et consiliarium adscivit; quo factum est, ut iucensum eius omnibus iuvandi studium longius pertinuerit et totam quam latissime patet dioecesim comprehenderit.

XVI. Nullam porro curandae proximorum saluti accommodatam rationem praetermisit. Re, studio, opera, consilio omnibus praesto fuit. Illa vero quae uostri iustituti sunt, frequenter habere conciones, confessiones continuo excipere, sacras sancti Patris nostri commentationes et publice et privatim proponere, aegrotos iuvare, morientibus adesse, carceres, uosocomia celebrare aliaque huiusmodi, praecipuam eius operam sibi vindicarunt; quibus muneribus obeundis parem semper attulit et alacritatem et assiduitatem. Divinum sacrificium summo maue celebrabat, quo expeditius proximorum saluti vacare posset. In excipiendis confessionibus octo, novem et decem continenter perstabat horas. Aegrotantibus et morientibus assidebat assiduus, omnibus eos caritatis officiis iuvabat, ut vulgo evocaretur et nemo se non felicem putaret, cui illum in summo discrimine constituto praesentem habere contingeret. Hoc autem in eo mirabilis existit, quod cum parem valetudinem propter gravia quae

supra diximus incommoda afferre non potuerit, nihil tamen unquam de tanta assiduitate et contentione remiserit.

XVII. Quamquam haec laus non tam illi propria, quam cum reliquis illius collegii alumnis pro sua cuiusque parte communicanda, navis oppido ac strenuis in vinea Domini operariis. Provinciae enim mediolanensis praefectus hanc eis laudem tribuit, mihi quoque affirmavit cum Romam venit ad conventum generalem, in quo p. Laurentius Riccius toti societati praepositus est renunciatus, se tota perlustrata provincia, nullum reperisse collegium in quo magis regularis disciplina vigeret, sociique inter se arctiori caritatis vinculo adstringerentur et sua quique munera diligentius obirent. Hoc ipsum crebrae ad me a fratre conscriptae litterae confirmarunt.

XVIII. Nec mirum: electissimis enim collegium illud constabat sodalibus, in quibus Ignatius Veninus, Iosephus Martorinus et Nicolaus Ghezzius eminebant; atque hic quidem cum vir valde pius, tum editis in diverso doctrinae genere libris celeberrimus. Martorinus vero singulari doctrina, insigni prudentia et eximia sanctitate praestabat, cui p. Aloisius Centurionus praepositus generalis praeclearum illud, cum de eo mecum loqueretur testimonium dedit, quod delatum a p. Mntio Vitelleschio praeposito item generali p. Nicolao Zucchio in eius elogio legimus: nimirum in societate universa neminem inveniri qui spectatis coniunctim omnibus, ei videretur anteposendus. Veninus autem orator plane summus in praecipuis Italiae urbibus singulari doctorum omnium assensu auditus est. Novo enim quodam eloquentiae genere excelluit. Ego vero ne quid dissimulem optassem ut communem ad doctorum virorum assensum vulgi etiam

et popularis adprobatio accessisset, quae duo coniungit Cicero, cum nobis perfecti oratoris imaginem exhibet formamque proponit.

XIX. Sed ut ad fratrem revertar, laborum assiduitate et conteutione rursus lethalem in morbum incidit. Ut enim spiritus promptus esset, caro tamen infirma tantam ferre contentionem non poterat. Hic vero dici nequit quam effusa in eum Martorini tunc rectoris caritas fuerit, sic plane ut ei uni illa qualiscumque restituta aegroti gravissime laboranti et vita periclitanti sanitas deberetur. Hac utcumque recuperata, ad pristina munia rediit impiger ut antea ac laboriosus, nihil optans magis quam ut in obeunda suorum functione munerum mortem oppeteret. Sed haec quam semel et iterum instantem supremumque ictum minitantem adspexerat, ei dilata fuit, et vita Deo sic disponente producta quoad usque ipse quoque communis calamitatis et spectator et particeps esset, quae calamitas ei quavis morte acerbior fuit.

XX. Verum non ita de proximorum salute sollicitus fuit ut propriae securus esset. Orationis studio apprime deditus plures in ea extrahebat horas. Summo mane surgebat e strato et divinum multo ante sacrificium celebrabat, quam dato signo omnes de indicta omnibus rerum caelestium commentatione admonerentur. Legibus nostris diligentissime paruit nihilque magis cavit quam ut ne quidquam, quod illis minus consentaneum esset, faceret. Voluntatem moderatoris, iuxta s. p. Ignatii praescriptum, duxit suam. Nihil illo vel inconsulto vel inscio vel non consentiente sibi licere arbitrabatur. Qua de re solebat ad me identidem scribere, si quid huiusmodi incideret quod sibi concedendum a praeposito generali putaret, ut ei facultatem ab illo impetrarem. Quare

et recte institutae vitae ratione et constanti eiusdem tenore, quoad coniunctim vivere carissimis cum sodalibus licuit, domesticis omnibus et exemplo fuit et incitamento.

XXI. Consequuta est calamitas quae societatem subvertit. Itaque emigrare e collegio et optatissimum contubernium relinquere una cum sociis coactus fuit. Tantam calamitatem moderate ut aequum erat ac patienter tulit. Hoc autem non obstitit, quin eius animum intime pervaserit gravissimeque perculerit. Quod eius litterae plenae luctus et lacrimarum significarunt. Primis diebus recenti infortunio sic incessit attonitus, ut sibi vix constaret et sui compos nequaquam esse videretur. Statim ab episcopo apud quem gratia et virtutis ac doctrinae existimatione valebat, plura illi exhibita sunt solatia. Ei statim potestatem fecit concionandi, confessiones vel in templo societatis excipiendi, et omne hominum genus, ne exceptis quidem Deo dicatis virginibus, pristino more excolendi. Collata insuper in sacro foro amplissima iurisdictio fuit, nullis adstricta vinculis quae laxanda reservare sibi episcopi solent. His facultatibus nullo exemplo cuiquam e sodalibus ab episcopis in tota Insubria factis non parum relevari visus est. Publice ante ferias eius anni natalitias conciones habuit, summa auditus frequentia et approbatione; neque vero omisit reliqua quibus assueverat obire munera: sed animo altius inflictum vulnus haerebat quod recrudescens quotidie magis omnem prope respuit medicinam, ut reliquos vitae suae dies in summa aegritudine transegerit.

XXII. Plurimum autem ad leniendum contulerunt litterae quas ego ad eum dedi, et in unum separatim volumen quod est mearum epistolarum quintum, compegi. Sed nequidquam recurrebat animus ad ea quae moerorem auge-

rent angoremque exaggerarent. Quamquam non tam ei sese dedit ut ad caelestia animum non erigeret, et ad ea quae instant homini novissima non adverteret. Sed hinc Deo sic permittente, non solatii sed nova aegritudinis et angoris origo emersit. Imminentis aspectus mortis, consequens districtum severissimumque indicium, incertus aeternae salutis exitus, sempiterni sordibus constituti cruciatibus continuo menti obversabantur totumque horrore concutiebant, perinde quasi illis iam addictus esset. His in cogitationibus plures continenter haerebat horas, unde animus contractior fiebat, ut laxari nequaquam posse videretur. Atque haec eius epistolarum quas ad me tunc scripsit fere materies erat, quae siccis oculis legi non poterant.

XXIII. Cessavit igitur a consuetis muneribus quibus vacare omnino non poterat, et novum vitae genus instituit, caritatis et patientiae documentum. Haec quae subiciam, ab ipso eius hospite accepi aliisque qui eius consuetudine usi sunt, ut testatiora esse non possint et plane digna quae memoriae mandentur. Digressus e collegio nobili hospitio exceptus est; sed veritus ne ob male affectam valetudinem cuiquam periculo esset, hospitium bona hospitis gratia deseruit et in aliud immigravit. Ante vero quam ad stabilem hospitem diverteret, gravissima ei incommoda fuerunt toleranda. Duobus enim uno tempore diversoriis usus est, longissimo inter se intervallo dissitis, in quorum altero capiebat cibum in altero cubabat. Sed tandem aliquando eum hospitem nactus est qualem neque sanctiorem, neque sui amantiorem nancisci poterat, qui eum libentissime excepit et humanissime habuit. Hic fuit Dominicus Toja comensis civis ex medio ordine vir plane sanctus, a cuius contubernio quamdiu vi-

xit non recessit, qui plures eius virtutes notavit et scripto commisit quas breviter persequar.

XXIV. Eius patientia iu primis laudatur quae praecepue enituit in fereudis quos diximus animi angoribus maximis et omni morte acerbioribus, quorum hospes testis fuit, qui infelicem eius vicem miseratus dici non potest quantum inde dolorem caperet. Nimirum sic illum exercuit Deus et *tamquam aurum in fornace probavit* ut quidquid terrenae labis eius animo adhaeserat, igne tribulationis excoqueret. In tantis vero angoribus constitutus nulla vox paullo asperior, nulla paullo acerbior conquestio, nullum denique ne vel minimum quidem animi minus divinae voluntati consentientis indicium. Solatium amicis afferentibus fere responsum non dabat, sed sublati in caelum oculis tacebat. Si quam vero emitteret vocem, quae patiebatur ea sibi merito sua ob scelera irrogari et mitius quam merebatur, a Deo secum agi affirmabat.

XXV. Duplex quod dixi diversorium incredibile dictu est quantam ei tolerautiae occasionem attulerit. Intempesta nocte, frigidissima hieme, caelo pluvio, decidente uive, debacchantibus ventis post coenam ab uno pergendum erat ad alterum; quo. fere adventabat aut imbre diffuens, aut nivibus obrutus, totis artubus contremiscens, ut vel solus hominis adspectus miserationem commoveret. Ipse vero laetus et alacer commiserantibus plura afferebat exempla sauctorum qui multo graviora passi erant, addebatque regnum caelorum comparari sine tolerautia non posse. Oblatum ignem quo se foveret et lectulum calefaceret recusabat, affirmans ita se uti erat glacie concretus, velle cubitum ire et experiri num quiret somnum capere; si nequiret et tres conti-

nenter noctes ducere cogeretur insomnes, tum eo levamento usurum.

XXVI. Succedit caritas quae princeps virtutum est et in qua maxime excelluit. De caritate erga Deum nihil dicam propterea quia ex dictis conici potest. De caritate erga proximum dicam quae ex eodem fonte profinit. Liberalitas erga pauperes pro facultatis modo eximia plane fuit ac singularis. Oblatam pro divino sacrificio eleemosynam accipere non rennebat quam continuo in panperes distribueret. Rogabat aeditum, ut sibi minutos obolos numeraret quo pluribus satisfaceret. Hospitem suum sibi constituerat, ut aiebat, *thesaurarium*, cuius opera ut ipse lateret utebatur. Hic vero testatur non vulgares a se elargitas summas. Nescio cui inopi ut aliquid stipis erogaret superarat: nummus argenteus erogatus; ut rescivit anrem, inquit, submittito: scito valde misericors ac liberale erga panperes cor a Deo mihi esse tributum. At enim tibi nihil reliqui fiet: non moror, subdidit, nec abnoquin rebus omnibus exspoliatus in nosocomio migrem e vita. Valens erat vetulis ac panperibus genitoribus filius, cuius labore sustentabantur. Hic in morbum incidit et semel iterum ac tertio in nosocomium admissus et totidem vicibus tanquam sanitati restitutus ab eo dimissus, nunquam tamen recte convaluit, quin rursus morbo quem contraxerat tentaretur. Curam ipse suscepit et sumptu suo aegrotanti medicamenta et medicum operam nec non cibum quo electiore aleretur, suppeditavit. Hac ope recreatus aegrotus perfecte convaluit, vires recepit et pium parentibus labore suo praestare officium potuit.

XXVII. Aliud insigne caritatis documentum subiiciam et eo libentius quia vaticinium adinectum habet quod fra-

tris sanctitatem confirmat. Ronchetus clericus erat principis ecclesiae famulatus addictus, sed pauper admodum et nulla spe ad ulteriorem gradum progressus. Hic forte divinum celebranti sacrificium se ministrum praeiit. Absoluto sacrificio, quo pergeret et quid acturus esset rogatus, respondit, pergere se ad exscribendas pagellas musicas qua industria sibi et pauperibus parentibus victum quaereret. Quin, inquit, Latinae linguae et musicae studes, quae studia tibi profutura erunt et quorum subsidio ad sacerdotium evades? Hoc autem valde asseverans affirmavit inculcavitque. Libenter equidem, reposuit ille; sed qui possum cum mihi pecunia non suppetat paraudo necessario ad musicam addiscendam instrumento, et quotidie egestas iustet mihi et parentibus alimenta comparare? Bono animo sis, retulit frater, nulla difficultas est quae superari non possit; de instrumento musico sollicitus esse ne velis; meo sumptu tibi suppeditabitur; et continuo pecunia pro eo emendo persoluta. Ne longum faciam, vaticinium adseruit eventus. Post aliquot annos ita rerum vicissitudines tulerunt, ut Ronchetus praeter omnem spem et aedituus esset constitutus et sacerdos consecratus. Generatim affirmari potest, nullum ab ipso a se iuvenem dimissum fuisse inopem, omnes aliqua stipe recreatos. Nubilibus puellis non tenues summas impertivit quo honesto matrimonio collocarentur. Omnibus omnia denique factus, nemini re, consilio et quacumque potuit ope, defuit. Haeredi quem appellant fiduciario pauperes eosque egentiores enixe commendavit quos et haeredes instituit.

XXVIII. Quod ad reliqua pertinet, sobrius admodum in victu fuit: fere vino abstinuit, aut modico, iuxta praescriptum Apostoli usus est. Hospitis mensae accumbens, si quis

exquisitior cibus apponebatur, gustare renuebat nisi eiusdem convivae reliqui pro rata portionis participes fierent, victu communi contentus. Comis et urbanus in quotidiana consuetudine, hilaris interdum et festivus, exceptis dumtaxat annis quibus illis quos diximus animi angoribus afflictatus est, quos totos in moerore ac gemitu transegit. Quamquam a natura ad gravitatem potius quam ad hilaritatem comparatus erat. Morborum quibus assidue obnoxius fuit diuturnitas enim ad extremam usque maciem redegit, ut pelle tantum et ossibus constare videretur. Prope miraculum habitum est tantos tam alacri animo ac tanta et nunquam intermissa contentione labores ferri ab eo potuisse. Stupebant omnes et animi vim corporis infirmitatem sustentantis mirabantur. Sed tandem aliquando ei cessit atque ad extrema devenit.

XXIX. Quamquam negari non potest, quin communis calamitas eius vitam contraxerit, quam rebus integris longius produxisset. Hic vero non est reticendum quod mirifice valeat ad ostendendam Dei alternantis providentiam qui *deducit ad inferos et reducit*. Aliquot ante obitum mensibus respirare a suis angoribus coepit, Deo tandem aliquando servi sui vicem miserante. *Increpavit ventis et facta est tranquillitas magna*. Cessavit aestus, tempestas conquievit, reddita animo quies, pax consequuta. Atque hanc quidem insperato oblatam sic accepit ut ei instantis lethi indicium fnerit, quo solutiore ac pacatiore animo se ad obitum compararet. Et sane non ita multo post contractus nescio qua de causa morbus, sive potius intestini quibus laborabat morbi facto agmine et uno impetu erumpentes eum brevi in summum discrimen adduxerunt. Frustra evocati medici, nequidquam

adhibitae medicinae. Desperata valetudine aegrotans, de una salute aeterna sollicitus, ad illam unam curas omnes cogitationesque convertit. Tridnos quos appellant indixit duos; unum ad Christi crucifixi simulacrum; alterum ad Virginis effigiem a doloribus nonnatae, quae summa Comi religione coluntur. Ut ab hospite intellexit orationem recitari *pro infirmo* valetudini restituendo, iussit illam substitui *pro remissione peccatorum* illius negligens, de hac una anxius ac laborans.

XXX. Quamdiu aegrotavit tamdiu virtutum omnium edere documenta non destitit. Dolores quibus acerbissimis cruciabatur patientissime toleravit; hos sibi et peccatis suis debitos affirmabat. Aegrotanti assidue pius hospes adstitit, nec ullum caritatis officium omisit. Exhaustis prorsus viribus afflicto corpore deficiente spiritu moveri vix poterat nulla tamen emissa vox quae doloris acerbitatem indicaret; verba omnia divinae voluntati de se ita statuenti congruentia. Cum acrius et vehementius torquebatur, illa Augustini usurpabat: *Domine... hic non parcas, ut in aeternum parcas*. His aliquantum remittentibus relinqui solus amabat, animo interim in caelestium contemplatione defixo et ad supernam patriam erecto, quo bonae spei plenus se perventurum non dubitabat. Saepe imagines Christi crucifixi et B. Virginis cruci adstantis osculabatur, a quibus nequibat nec oculos amovere nec cor avertere. Demum summa religione susceptis omnibus sacramentis quibus procurari morientes solent, assidente lecto P. Iosepho Gazzano quo conscientiae moderatore usus erat, non tristatus mortis aspectu sed consecuturae sortis praescius, innocens uti vixit excessit e vita. Obiit XXIX Ianuarii anno MDCCCLXXVIII. Elatus est non vulgari pompa funeris;

funus aliquot prosequentibus honoris gratia sodalitatibus. Exsequiae celebratae in templo s. Fidelis, et corpus in ipso canonicorum sepulcro tumulatum. Honestata insuper mors ellogio sane luculento et in ephemeride florentina ad perennem eius et sanctitatis et doctrinae memoriam vulgato.

XXXI. Haec habui quae de fratre meo scriberem vobisque potissimum inscriberem, sodales carissimi, qui toto orbe dispersi invicemque distracti, sanctissimam disciplinam consideratis et tot bona una cum ea lugetis amissa, nihilque a Deo magis exposcitis, quam ut dispersos nos iterum colligat pristinumque in statum restituat. Ego vero confido fore ut bonum Numen tot honorum precibus ut ita dicam defatigatum et tandem aliquando pro sua clementia exoratum, nos respiciat votorumque nostrorum compotes faciat. Quae vero acciderint, tametsi gravissima ac luctuosissima sunt, ea tamen non ad gentis nostrae interitum accidisse, sed ad *corruptionem* evenisse nostram certissime teneamus. Interim *praestolemur cum silentio salutare Dei* quod profecto aderit, et nos non tam ista spe atque expectatione quam sanctissimis sodalium nostrorum exemplis consolemur, quorum nunc bene multos ut eorum perscriptae virtutes declarant superis transmissimus, qui tanta calamitate non afflicti sed erecti, nihil minus alacris institutum ad caelestem patriam urgere iter perpiterunt, ut si imminutam hic societatem lugere cogimur, eam certe laetari aetnam esse in caelo amplificatamque debeamus.

ILLVSTRIVM
E SOCIETATE IESV ITALORVM
QUI HOC SAECVLO MDCC
SANCTITATIS OPINIONE
FLORVERVNT ET DECESSERVNT
ELLOGIA

I.

Iosephus de Alexandro Vezini in Sicilia uatus duo mirabiliter coniunxit quae non nisi summa cum difficultate copulari videntur posse: lenis erga alios supra quam credi possit in se vero prope crudelis. Iustrumenta quibus ad suum corpus in servitutem redigendum utebatur plane horrenda erant. Ferreis suberi insertis acuminibus non tam sua membra cruentabat quam lacerabat; et sua non contentus aliorum operam ad huiusmodi lauienam adhibebat. Tot corporis macerationibus et laboribus pro salute animorum susceptis consumptus illa usurpans: *Domine pati et contemni pro te*, obiit die XXII decembris anno MDCC.

II.

Lucas Rota Firmi in Piceno natus societatem amplexus in ea vixit sine querela omnibus carus propter morum suavitatem, ab omnibus propter singulares virtutes magna in veneratione habitus. De eo ad Praepositum Generalem in haec verba scriptum est; *nunquam curarum ac negotiorum varietate impeditus est quin assiduas contentibus aures praeberet*. Tres virtutes in eo praecipue enituerunt; contemptus sui, zelus animarum, studium erga B. Virginem singulare cui etiam nobile sacellum collatis piorum eleemosynis in templo societatis construxit. Plenus annorum et meritornm diem supremum obiit Senis die XXV iunii anno MDCCII.

III.

Vincentius Maria Verdinus panormitanus eximius B. Mariae Virginis et s. Ioachimi patris eius cultor, vita in saeculo innocentissime acta sanctissimeque in societate transacta, cum annum ageret vigesimum tertium in Monte Regali migravit in caelum die I ianuarii anno MDCCIII. Singularia eius merita cum adhuc viveret insigni prodigio tabulis publicis consignato Deus testatus est.

IV.

Carolus Ambrosius Cataneus mediolanensis societatem amplexus concionator egregius et vere apostolicus evasit; ab

omnibus avide semper auditus, non sine ingenti auditorum fructu quem eius opera saepius recusa perennant. Quam a natura nactus erat robusti corporis *habitudinem* assiduis laboribus pro salute animorum et divina gloria susceptis attrivit omnino et consumpsit. In suis scriptis adhuc superstes eandem animarum salutem curare et Dei gloriam promovere vel extinctus dici iure ac merito potest. Obiit Mediolani die XIX novembris an. MDCCV.

V.

Stanislaus Maria Pilius nobilissima familia Panormi natus sed virtutibus multo nobilior, ad societatem Iesu a Deo vocatus durum cum patre qui a se primogenitum suum avelli aegerrime patiebatur certamen sustinuit; quo superato victor in societatem ingressus est. In ea non diu vixit sed morae brevitatem religiosissimae vitae exemplo et perfectionis studio abunde compensavit. Morti proximus tentatus a daemone qui se illi videndum praebuit, impurum aggressorem invicte repulit ac superavit: mox praesentia B. Virginis et infantis Iesu quasi reportatam victoriam gratulantium dignatus placidissime obiit Panormi die XXIV maii an. MDCCVI.

VI.

Carolus Gregorius Rosignolius in oppido Burgi Mainerii novariensis dioecesis honestissimis parentibus natus, editis libris celeberrimus mortem anteactae sanctissimae vitae re-

spondentem nactus est. In eo articulo constitutus illud affirmare ingenne potuit, se toto vitae suae tempore nihil nisi de Deo de B. Virgine Maria ac de sanctis ea conditione cogitasse ut illi de se morti proximo vicissim cogitarent: quare de sua aeterna salute minime sollicitum esse quam iamdiu et Deo et B. Virgini et sanctis commisisset. Plenus optimae spei decessit die V ianuarii an. MDCCVII.

VII.

Ioannes Michael Rosales ex clarissima tum in Hispania tum in Italia familia Mediolani natus et in societatem adlectus consummatus in brevi explevit tempora multa. B. Virginem Mariam insigniter coluit et impensius amavit. Tres annos tantum in societate transegit religiosae tamen perfectionis maturitatem adeptus. Obiit Mediolani in Collegio braydensi anno aetatis suae XXII die III ianuarii an. MDCCVII.

VIII.

Aloisius Costa nobilis placentinus singularem innocentiam singularis poenitentiae accessione cumnavit exemplo s. Aloisii cuius nomen ferebat et mores referebat. Beatissimam Virginem impense coluit et carissimae matris loco semper habuit. Societatem Iesu ardentissime concupivit, sed morte praeventus qui societatem militantem in terris inire non potuit in eandem triumphantem in caelo emissis votis, ut pie credere fas est, meruit cooptari. Placidissime obiit die XXX

aprilis an. MDCCVII haec verba usurpans; *Veni veni; festina festina*; quasi mortem invitaret quae sibi aditum ad caelestem patriam aperiret. Elatus est magna populi frequentia populo ipso illum sanctum inclamante.

IX.

Nicolaus Maria Capicius Piscicellus nobilissimo genere Neapoli natus et societati adscriptus talis evasit ut vir *potens opere et sermone* haberetur. Diversis praefectus muneribus *omnibus omnia factus ut omnes Christo lucrifaceret*, singulis egregie satisfecit. Inlibatum innocentiae candorem ad mortem usque custodivit. Integerrimam et laboriosissimam vitam Romae finivit die XV ianuarii an. MDCCIX.

X.

Camillus Maria Burghesius patricius senensis vita in saeculo integerrime acta iam sacerdos consecratus Romam pedes venit et ad tyrocinii ianuam constitit, certus inde non discedere quoad usque in societatem admitteretur. Admissus vir admirandae virtutis evasit sacris missionibus Latium, Sabinam, patrimonium quod vocant s. Petri atque Etruriam incredibili animarum fructu perlustravit. Summum in daemones exercuit imperium quos ab obsessis corporibus saepissime abegit. Prophetiae dono inclaruit. Ob vitae austeritatem inter rigidiores poenitentiae cultores recensendus. Decessit Politiani die XXVII aprilis an. MDCCX.

XI.

Peregrinus Manfredinus honestissimis parentibus Bononiae natus societatem Iesu cunctis religionis ordinibus praeoptavit. S. Aloisii Gonzagae exemplo quem mirifice coluit mortificationi in primis deditus fuit. De se demisse admodum sensit; viliora exsequi domi ministeria in deliciis habuit. Morti proximus illa quae a s. Aloisio prolata feruntur hilaris et gestiens pronunciavit: *in domum Domini ibimus*. Admodum iuvenis obiit Faventiae die XVIII iunii anno MDCCIX dum ea in urbe pueros pietate ac litteris sedulo institueret. Auditoeius mortis nuncio Ioannes Rasponus eo tempore faventinus antistes, o *iuvenem sanctum* exclamavit addiditque se eum vidisse nunquam quin sanctum sibi videre Aloisium videretur.

XII.

Ioannes Antonius Iannellius in oppido Novi ditionis genuensis ortum habuit. Emenso summa cum laude et proximorum utilitate religiosae vitae curriculo mortem laetus adspexit illud s. Aloisii exemplo ex psalmo davidico usurpans: *Laetatus sum in his quae dicta sunt mihi in domum Domini ibimus*; et illa s. Simeonis: *Nunc dimittis servum tuum Domine secundum verbum tuum in pace*: quibus pronuntiatis placidissime quievit in Domino die II ianuarii an. MDCCXII.

XIII.

Hieronymus Centoflorinius Recineti nobili genere natus et duorum patrum Iulii Caesaris et Constantii quorum ob eximiam sanctitatem memoria perseverat in societate fratris filius, in societatem admissus totam fere vitam in sacris missionibus consumpsit, quas nudis pedibus incedens parcus in cibo obsoletis usus vestibus somnum brevissimum carpens ad annos XXX produxit. Plures obivit dioeceses ab episcopis certatim expetitus. Tandem Tossiciae Apuliae oppido in ipso apostolicae praedicationis obeundo munere pie decessit die XXV februarii an. MDCCXII.

XIV.

Fabius Mansius lucensis patriciae familiae primogenitus relicto saeculo societatem amplexus est. Plura in ea exercuit ministeria pari diligentia et fructu animarum. Virtutem obedientiae praecipue adamavit et honorificentiora munera non nisi ex eiusdem virtutis praescripto suscepit. In ipso praepositi Provincialis munere obeundo invisendisque de more collegiis, morbis quibus afflictabatur debilitatus laboribusque consumptus Senis decubuit, et ea in urbe die sacro Praesentationi B. Virginis quam impense coluit sanctissime decessit XXI novembris an. MDCCXII.

XV.

Iosephus Maria de Hieronymo frater coadiutor non longe a Torrento in oppido quod vocant *Cryptaleas* natus est. Ellogiornm omnium instar illa tria sunt; quod p. Francisci de Hieronymo frater fuit; quod eius sanctitas s. fratri maxime probata fuerit; et demum quod ab exacto tyrocinio magistri novitiorum socius adlectus ad mortem usque eo in munere perseveraverit. Ea qua praedixerat hora pie Neapoli vita functus est die IV ianuarii an. MDCCXIII.

XVI.

Simon Damianus frater coadiutor in oppido quod Cryptas s. Laurentii vocant natus et societati adscriptus, strenue admodum patribus in celeberrimo s. Francisci Xaverii romano oratorio pro salute animarum diu nocturne laborantibus totos quadraginta septem annos adlaboravit. Orationi deditus et mortificationi nullum nunquam solatium admisit; propriae perfectioni et saluti animarum impensius studuit. Plenus meritorum obiit in collegio romano die XXX decembris an. MDCCXV.

XVII.

Ioannes Baptista Ptolemaeus S. R. E. Cardinalis antiquissima et nobilissima Ptolemaeorum familia Pistorii natus se Deo in societate Iesu adolescens dicavit. Summam perspicacitatem ingenii singularem eruditionem et sacrarum facultatum scientiam plane eximiam virtute et religiosa perfectione longe superavit. Non nisi Clementis XI auctoritate impulsus et iussu adactus Cardinalium dignitatem accepit. In ea ita se gessit ut nihil de religiosae vitae studio remis-erit. Summis pro ecclesia catholica exantlatis laboribus vivere desiit Romae die IX ianuarii an. MDCCXVI.

XVIII.

Ignatius Martinellius nobili genere Perusiae ortus, cum illa sibi inculcari audisset: *memorare novissima tua et in aeternum non peccabis* vehementer commotus, quo ea saepius recoleret et certius saluti suae consuleret relicto saeculo se Deo in societate devovit. De insigni hoc Dei servo illud omnium ellogiorum instar sit quod eo auctore et adiutore Rosa Venerina singulari probitate femina saluberrimum institutum puellas educandi Viterbii inchoaverit; quod quidem in multis Italiae urbibus ac dioecesibus incredibili animarum fructu et nunquam satis aestimanda sequioris sexus utilitate propagatum fuit. Clemens XI illud summopere collaudavit et Cardinalis Barberinus Montis Falisci episcopus ipsis semi-

nariis ubi pueri ad pietatem et bonas artes erudiuntur anteferre non dubitavit. Obiit Viterbii die XXIII iunii an. MDCCXVI.

XIX.

Annibal Marchettus nobili familia Maceratae natus, latine graece hebraice eruditus, missionem indicam expetivit: ea non obtenta se totum moderatoribus regendum permisit illud saepe usurpans *nihil petere et nihil recusare*. Diversis muneribus perfunctus infirma fere semper valetudine cui nullam nisi flagrorum et cilicii usum medicinam adhibuit, laboribus tandem ac morbo consumptus Florentiae obiit die XX ianuarii an. MDCCXIX. Cosmus III Magnus Etruriae, Dux et idoneus sanctitatis aestimator allato sibi eius mortis nuncio hominem prolixè laudavit.

XX.

Franciscus Pepe societatis Iesu, amore in sanctissimam Triadem in Christum Salvatorem et in eius intemeratam parentem eximius: dicendi dono, libris editis, laboribus pro animarum salute ad mortem usque susceptis plane admirabilis. Obiit Neapoli die XXIX maii an. MDCCXIX aetatis suae LXXIV mens. II diebus II. Hoc autem ellogium ad verbum exscriptum ex eius imagine impressa Neapoli.

XXI.

Philippus Notus in oppido S. Mauri in Sicilia natus a prima aetate se vitae ecclesiasticae addixit. Sacerdos initiatus sacras habere conciones coepit sed maioris perfectionis studio incensus societatem ingressus est. Sacris missionibus destinatus incredibili fructu animarum in eo perstitit ministerio quoad ei per obedientiam licuit. Ad summam pervenit senectutem et votum quod adolescens emiserat se nunquam peccatum lethale admissurum sancte observavit. In extremis constituto cum sacrae unctionis sacramentum administraretur, eius corpus acutis catenulis ferreis non tam cinctum quam involutum apparuit. Sic fortis athleta se ad summum agonem armavit. Obiit Messanae die XXXI maii an. MDCCXXII.

XXII.

Ioannes Baptista de Comitibus nobilis Asculanus in ipso ineuntis aetatis flore societatem iniit in eaque sanctissime vixit. Summam doctrinam cum summo religiosae perfectionis studio coniunxit. Dilectus Deo propter singularem pietatem et innocentiam et hominibus propter comitatem et caritatem. Desideratus est in collegio romano die XX aprilis an. MDCCXXIII.

XXIII.

Andreas Alcenago Veronensis e collegio nobilium parmensi ubi adolescens institutus fuit ad societatem transiit. Philosophiae professor et missionem indicam cogitans, aegrotos in nosocomiis invisebat carceres obibat et sic indicae missioni proindebat. Ea obtenta sed navigatione intercepta in Italia subsistere coactus, missionem indicam summis pro salute animarum quotidie suscipiendis laboribus et inextenuabili quodam zelo abunde supplevit. Diem supremum obiit Venetiis die XX decembris an. MDCCXXIV. Eius mortem qui sibi omnes suis beneficiis demeruerat nemo non summi doloris significatione prosecutus est.

XXIV.

Ioannes Baptista Fridericus Panormitanus contempta praeclarissima generis nobilitate atque opulentia, societati adscribi voluit. Impetrata a moderatoribus indica missione in regno Maissur indiarum orientalium operam locavit suam per aliquot annos, ubi immodicis laboribus fractus apostolicae vitae cursum absolvit. In morte caelesti visione B. Mariae Virginis s. Franciscii Xaverii et ipsius Christi Domini recreatus illa usurpans *ad te venio bone Iesu*, spiritum Deo reddidit die XXX ianuarii an. MDCCXXVI.

XXV.

Vincentius Dondinus frater coadiutor societatis Iesu, honestis parentibus Florentiae natus in eo quem humilem in societate gradum tenuit reliquis fratribus adiutoribus forma factus, iis et obedientiae et orationis et humilitatis et devotionis et omnium virtutum exemplar praeluxit. Pictoriam artem quam secum cum in societatem ingressus est attulerat exercuit, sed non tam effigendis sanctorum imaginibus operam dedit quam ei perficiendae quam ad Dei similitudinem expressam in animo suo habere se noverat. Obiit Romae in domo professa die XII ianuarii an. MDCCXXXIV.

XXVI.

Aloisius Hyacinthus Ferrerius societatis Iesu, nobilissimo genere Augustae Taurinorum natus virtutem s. Aloisii Gonzagae et Ven. Ioannis Berchmans aemulator egregius, morum innocentia orationis studio exactissima regularum observantia praecelluit. Missionem indicam adeo expetivit ut de eadem precibus exoranda si per superiores liceret votum emisserit; sed immatura morte praeventus voti compos factus non est. Sanctissime obiit Mediolani in collegio braydensi indicae missionis desiderio magis quam lenta febris consumptus die XI octobris an. MDCL aetatis suae an. XXII.

XXVII.

Franciscus Picenardius patricius Cremonensis sodalitat^{is} Purificationis B. Mariae Virginis in collegio cremonensi institutae alumnus, s. Aloisium Gonzagam impense coluit et eius virtutes feliciter expressit. Mornm innocentia corporis afflictatione orationis studio summa erga parentes observantia claruit. Ad societatem Iesu vocatus, quum in eo esset nt saeculo valediceret ac Deo vocanti obtemperaret morte interceptus sanctissime obiit Cremonae pridie assumptionis B. Mariae Virginis, quam parentis loco vivens habuerat et dilexerat an. MDCCLIV.

XXVIII.

Ioannes Maria Cribellins patricia stirpe Mediolani ortus inita societate strenuus in vinea domini si quis alius operarins fuit. Populari eloquentia maxime floruit. In sacris missionibus fere totam religiosam vitam cum incredibili animarum fructu exegit: B. Mariae Virginis cultum circumlata eius imagine mirabiliter amplificavit; s. matris Veronicae a Typherno nuncupatae moderator conscientiae quoad illa vixit fuit: eius spiritum examinavit direxit probavit. Demum attrita assidnis laboribus valetudine in tiburtinm collegium secessit ubi in summo neglectu atque contemptu quod illi eadem s. Veronica diserte praedixerat aliquot annos commoratus, pie sancteque decessit die XXVI septembris an.

MDCCLXI. Eius corpus pingue admodum humoribusque redundans post aliquot menses integrum repertum est atque incorruptum.

XXIX.

Emmanuel Adellius Neapoli nobilibus parentibus natus admodum adolescens societatem iniit. Remisso conspicuis in re litteraria muneribus nuncio, totum se animarum saluti modis omnibus procurandae dedit. Orationi in primis adiectus in divina scientia ita profecit ut Mariam Russam eximiae sanctitatis feminam et caelestium illustrationum donis insignem, in summae perfectionis curriculo dirigere potuerit; cuius feminae prima vitae parte in lucem ab eo emissa, dum perficiendae secundae parti instaret morte praeventus obiit Neapoli, eo quem praedixerat die XXI novembris Praesentationi B. Mariae Virginis sacro quam pie vivens colnerat an. **MDCCLXI.**

XXX.

Ioannes Philippus Gavinus Corsus in societatem Iesu ingressus in ea innocentissime vixit. Sacrarum missionum onns supra vires ex obedientia suscepit illudque magno cum animarum fructu alacriter pertulit. Cum illum moderatores eo levare cogitarent Tusculi in ipso virilitatis flore pie sancteque decessit anno **MDCCLXIX.** Eius funus magna populi frequentia honestatum fuit eiusque sanctitatem Deus editis

signis comprobavit. Lux paene oculis capto eius implorata ope restituta et mulier apostemate liberata.

XXXI.


Hieronymus de Sanctis Tiburtinus societatem amplexus navus in ea operarius fuit. Externis collegii romani auditoribus ad pietatem informandis destinatus, p. Galluzii viri apostolici eodem in munere indefessam assiduitatem et contentionem prope adsecutus est. Plures sodalitates discipulorum quibus praecipua separatim a reliquis cultura adhibetur instituit quae adhuc vigent. Demum nimis laboribus attritus ante tempus in ipso collegio extinctus magnum sui desiderium reliquit.

XXXII.

Dionysius Franciscus Ponti origine Hispanus natus est Neapoli. Post initam societatem religiosi virtutibus maxime enituit, et qua erat humaniorum litterarum scientia praestans nobilibus seminarii neapolitani convictoribus erudiendis annos XXII operam suam praestitit. Eiectus cum reliquis sociis anno MDCCLXIX se totum perfectionis studio erudiendis rudibus sublevandis egenis invisendis aegrotis Terracinae deditit qua in urbe gloriosus exsul occubuit.

XXXIII.

Franciscus Piccolomineus ex nobilissima familia Senis natus est. Romae ingressus in societatem doctrina et singulari sanctitate floruit. Ven. p. Antonio Baldinuccio propter idem religiosae perfectionis studium familiarissime usus est. Humilitate excelluit ut propterea relicto Volunnii nomine Franciscus voluerit appellari. Sibi austerus aliis blandus eximia caritate omnes amplexus est. Ego eius et caritatem expertus et sanctitatem admiratus, nunquam non suorum erga me meritorum non sine intimo grati animi sensu recordabor. Acerbissimis doloribus patientissime toleratis obiit rector collegii romani.



SI . QVID . OCCVRRAT . IN . MEIS . MANVSRIPTIS
QVOD . VEL . INIVRIOSIVS . VEL . ACERBIVS . CONTRA
IVSTITIAM . VEL . CARITATEM . SCRIPTVM . SIT
ODI . ABOMINOR . DETESTOR . ET . OMNINO
DELETVM . ET . PRORSVS . INDICTVM . VOLO
NEC . NON . DELERI . A . QVOVIS . QVI . MEA . SCRIPTA
LEGAT . VETOQVE . NE . QVID . EIVSMODI . CONTRA
VOLVNTATEM . MEAM . TYPIS . MANDETVR
HAEC . GRAVI . MORBO . LABORANS
ET . PROXIME . VEL . DE . OMNI . VERBO . OTIOSO
IVDICANDVS . ADDERE . NECESSARIVM . DVXI

IMPRIMATUR

Fr. D. Buttaoni O. P. S. P. A. Magister

IMPRIMATUR

Fr. Ant. Ligi Bussi Archiep. Icon. Vicesgerens.




P

41A92017538

Digitized by Google



A rectangular frame with decorative corner ornaments. The top-left corner has a small circle with a cross inside. The top-right corner has a small square with a cross inside. The bottom-left corner has a small circle with a cross inside. The bottom-right corner has a small square with a cross inside. The frame is composed of thin lines.

Proprietà laterale.



